

佛尼牟迦釋師本無南



北天目沙門釋智旭 編
唐玉華寺沙門釋玄奘 譯
釋迦比丘 彙整

大般若波羅密多經知津

佛陀教育基金會 印贈

一切佛經及闡揚佛法諸書。無不令人趨吉避凶。改過遷善。明三世之因果。識本具之佛性。出生死之苦海。生極樂之蓮邦。讀者必須生感恩心。作難遭想。淨手潔案。主敬存誠如面佛天。如臨師保。則無邊利益。自可親得。若肆無忌憚。任意褻瀆及固執管見。妄生毀謗。則罪過彌天。苦報無盡。奉勸世人。當遠罪求益。離苦得樂也。

大般若波羅密多經知津 目錄

初分

緣起品第一	一
學觀品第二	二
相應品第三	五
轉生品第四	六
讚勝德品第五	六
現舌相品第六	六
教誡教授品第七	七
勸學品第八	一〇
無住品第九	一
般若行相品第十	一
譬喻品第十一	一六
菩薩品第十二	一七
摩訶薩品第十三	一七
大乘鎧品第十四	一八
辯大乘品第十五	一九

讚大乘品第十六	二一
隨順品第十七	二二
無所得品第十八	二二
觀行品第十九	二三
無生品第二十	二四
淨道品第二十一	二六
天帝品第二十二	二七
諸天子品第二十三	二九
受教品第二十四	三〇
散花品第二十五	三一
學般若品第二十六	三一
求般若品第二十七	三三
歎眾德品第二十八	三五
攝受品第二十九	三六
校量功德品第三十	三九
隨喜回向品第三十一	四九
讚般若品第三十二	五四
謗般若品第三十三	五六
難信解品第三十四	五七

讚清淨品第三十五	六〇
著不著相品第三十六	六一
說般若相品第三十七	六五
波羅密多品第三十八	六六
難聞功德品第三十九	六六
魔事品第四十	六九
佛母品第四十一	六九
不思議等品第四十二	七〇
辦事品第四十三	七一
眾喻品第四十四	七二
真善友品第四十五	七三
趣智品第四十六	七五
真如品第四十七	七七
菩薩住品第四十八	八二
不退轉品第四十九	八三
巧方便品第五十	八六
願行品第五十一	八九
殞伽天品第五十二	八九
善學品第五十三	八九

斷分別品第五十四	九一
巧便學品第五十五	九三
願喻品第五十六	九五
堅等讚品第五十七	九八
囑累品第五十八	一〇〇
無盡品第五十九	一〇一
相引攝品第六十	一〇二
多問不二品第六十一	一〇二
實說品第六十二	一一一
巧便行品第六十三	一二四
徧學道品第六十四	一二六
三漸次品第六十五	一三〇
無相無得品第六十六	一三三
無雜法義品第六十七	一三五
諸功德相品第六十八	一三六
諸法平等品第六十九	一三九
不可動品第七十	一四二
成熟有情品第七十一	一四六
嚴淨佛土品第七十二	一四九

淨土方便品第七十三	一五一
無性自性品第七十四	一五二
勝義瑜伽品第七十五	一五四
無動法性品第七十六	一五八
常啼菩薩品第七十七	一五九
法涌菩薩品第七十八	一六〇
結勸品第七十九	一六二

第二分

緣起品第一	一六三
歡喜品第二	一六三
觀照品第三	一六四
無等等品第四	一六六
舌根相品第五	一六六
善現品第六	一六六
入離生品第七	一六八
勝軍品第八	一六九
行相品第九	一七〇
幻喻品第十	一七二
譬喻品第十一	一七三

斷諸見品第十二	一七三
六到彼岸品第十三	一七三
乘大乘品第十四	一七三
無縛解品第十五	一七四
三摩地品第十六	一七四
念住等品第十七	一七五
修治地品第十八	一七五
出住品第十九	一七五
超勝品第二十	一七六
無所有品第二十一	一七六
隨順品第二十二	一七六
無邊際品第二十三	一七六
遠離品第二十四	一七七
帝釋品第二十五	一七八
信受品第二十六	一七九
散花品第二十七	一八〇
授記品第二十八	一八一
攝受品第二十九	一八一
宰堵波品第三十	一八一

福生品第三十一	一八一
功德品第三十二	一八一
外道品第三十三	一八二
天來品第三十四	一八二
設利羅品第三十五	一八二
經文品第三十六	一八二
隨喜回向品第三十七	一八三
大師品第三十八	一八三
地獄品第三十九	一八三
清淨品第四十	一八三
無標幟品第四十一	一八三
不可得品第四十二	一八四
東北方品第四十三	一八四
魔事品第四十四	一八五
不和合品第四十五	一八五
佛母品第四十六	一八五
示相品第四十七	一八五
成辦品第四十八	一八六
船等喻品第四十九	一八六

初業品第五十	一八六
調伏貪等品第五十一	一八六
真如品第五十二	一八七
不退轉品第五十三	一八八
轉不轉品第五十四	一八八
甚深義品第五十五	一八八
夢行品第五十六	一八九
願行品第五十七	一八九
殞伽天品第五十八	一八九
習近品第五十九	一九〇
增上慢品第六十	一九〇
同學品第六十一	一九〇
同性品第六十二	一九〇
無分別品第六十三	一九〇
堅非堅品第六十四	一九一
實語品第六十五	一九二
無盡品第六十六	一九二
相攝品第六十七	一九二
巧便品第六十八	一九二

樹喻品第六十九	一九四
菩薩行品第七十	一九四
親近品第七十一	一九五
徧學品第七十二	一九五
漸次品第七十三	一九五
無相品第七十四	一九六
無雜品第七十五	一九六
眾德相品第七十六	一九七
善達品第七十七	一九八
實際品第七十八	一九八
無闕品第七十九	一九八
道士品第八十	一九九
正定品第八十一	一九九
佛法品第八十二	二〇〇
無事品第八十三	二〇〇
實說品第八十四	二〇〇
空性品第八十五	二〇一
第三分	二〇一
緣起品第一	二〇一

舍利子品第二	一一〇
善現品第三	一一〇
天帝品第四	一一〇
現宰堵波品第五	一一〇
稱揚功德品第六	一一〇
佛設利羅品第七	一一〇
福聚品第八	一一〇
隨喜回向品第九	一一〇
地獄品第十	一一〇
歎淨品第十一	一一〇
讚德品第十二	一一〇
陀羅尼品第十三	一一〇
魔事品第十四	一一〇
現世間品第十五	一一〇
不思議等品第十六	一一〇
譬喻品第十七	一一〇
善友品第十八	一一〇
真如品第十九	一一〇
不退相品第二十	一一〇

空相品第二十一	二〇三
菟伽天品第二十二	二〇三
巧便品第二十三	二〇三
學時品第二十四	二〇三
見不動品第二十五	二〇三
方便善巧品第二十六	二〇四
慧到彼岸品第二十七	二〇四
妙相品第二十八	二〇四
施等品第二十九	二〇四
佛國品第三十	二〇四
宣化品第三十一	二〇四
第四分	二〇四
妙行品第一	二〇四
帝釋品第二	二〇四
供養窣堵波品第三	二〇五
稱揚功德品第四	二〇五
福門品第五	二〇五
隨喜回向品第六	二〇五
地獄品第七	二〇五

清淨品第八	二〇五
讚歎品第九	二〇五
總持品第十	二〇五
魔事品第十一	二〇五
現世間品第十二	二〇五
不思議等品第十三	二〇五
譬喻品第十四	二〇五
天讚品第十五	二〇五
真如品第十六	二〇五
不退相品第十七	二〇六
空相品第十八	二〇六
深功德品第十九	二〇六
殞伽天品第二十	二〇六
覺魔事品第二十一	二〇六
善友品第二十二	二〇六
天主品第二十三	二〇六
無雜無異品第二十四	二〇六
迅速品第二十五	二〇六
幻喻品第二十六	二〇六

堅固品第二十七 二〇六

散花品第二十八 二〇六

隨順品第二十九 二〇六

第五分 二〇七

善現品第一 二〇七

天帝品第二 二〇七

宰堵波品第三 二〇七

神咒品第四 二〇七

設利羅品第五 二〇七

經典品第六 二〇七

回向品第七 二〇七

地獄品第八 二〇七

清淨品第九 二〇七

不思議品第十 二〇七

魔事品第十一 二〇七

真如品第十二 二〇八

甚深相品第十三 二〇八

船等喻品第十四 二〇八

如來品第十五 二〇八

不退品第十六	二〇八
貪行品第十七	二〇八
姊妹品第十八	二〇八
夢行品第十九	二〇八
勝意樂品第二十	二〇八
修學品第二十一	二〇八
根栽品第二十二	二〇八
付囑品第二十三	二〇八
見不動佛品第二十四	二〇八
第六分	二〇九
緣起品第一	二〇九
通達品第二	二〇九
顯相品第三	二〇九
法界品第四	二〇九
念住品第五	二〇九
法性品第六	二〇九
平等品第七	二〇九
現相品第八	二〇九
無所得品第九	二〇九

證勸品第十	二二二
顯德品第十一	二二二
現化品第十二	二二二
陀羅尼品第十三	二二三
勸誡品第十四	二二三
二行品第十五	二二三
讚歎品第十六	二二三
付囑品第十七	二二四
第七曼殊室利分	二二四
第八那伽室利分	二二五
第九能斷金剛分	二二六
第十般若理趣分	二二七
第十一布施波羅密多分	二二八
第十二淨戒波羅密多分	二三一
第十三安忍波羅密多分	二二三
第十四精進波羅密多分	二三四

第十五靜慮波羅密多分	一一五
第十六般若波羅密多分	一二六
大般若經異譯本一覽表	一三〇
般若部別行經一覽表	一三二
大般若經易檢表	一三四

大般若波羅密多經知津

北天目沙門釋智旭編
唐玉華寺沙門釋玄奘譯

初分

緣起品第一

佛住鷲峰山頂。與千二百苾芻。五百苾芻尼。無量鄔波索迦。鄔波斯迦。無量無數菩薩眾俱。世尊於師子座上。自敷尼師壇。結跏趺坐。入等持王妙三摩地。從定而起。觀察十方。從兩足。乃至眉間毫相。一切毛孔。各出六十百千俱胝那庾多光。各照大千世界。乃至十方殑伽沙等諸佛世界。遇斯光者。必得無上菩提。

又演常光。出廣長舌。流雜色光。現寶蓮華。華有化佛。皆演般若。聞者必得無上菩提。復入師子遊戲等持。令大千界。乃至十方佛刹。六種震動。惡道離苦。生人天中。同來佛

會。佛以神力。現本色身。令此大千有情。皆悉覩見。諸天散華。變成華臺。量等大千。此土莊嚴。猶如極樂。又從面門放光。照十方土。令此彼有情。互得相見。

東方寶性佛所。普光菩薩。南方無憂德佛所。離憂見菩薩。西方寶燄佛所。行慧菩薩。北方勝帝佛所。勝授菩薩。東北方定象勝德佛所。離塵勇猛菩薩。東南方蓮華勝德佛所。蓮華手菩薩。西南方日輪徧照勝德佛所。日光明菩薩。西北方一寶蓋勝佛所。寶勝菩薩。下方蓮華德佛所。蓮華勝菩薩。上方喜德佛所。喜授菩薩。及一切世界上首菩薩。各奉佛命。以千莖金色蓮華寄上。

佛受此華。還散各方。徧諸佛土。諸華臺中。各有化佛。說大般若。聞者必得無上菩提。爾時此界。如眾蓮華世界普華如來淨土。

學觀品第二

佛告舍利子言。菩薩欲於一切法。等覺一切相。當學般若波羅密多。謂以無住而為方便。安住般若。所住。能住。不可得故。以無捨無護無取無勤無思無著而為方便。圓滿六波羅密。施者。受者。及所施物。不可得。犯無犯相不可得。動不動相不可得。身心勤怠不可得。有味無味不可得。諸法性相不可得故。復以無所得而為方便。

應圓滿三十七品。三解脫門。四靜慮。四無量。四無色定。八解脫。八勝處。九次第定。十徧處。九想。十隨念。十想。十一智。三三摩地。三無漏根。不淨處觀。徧滿處觀。一切智智。奢摩他。毗鉢舍那。四攝事。四勝住。三明。五眼。六神通。六波羅密多。七聖財。八大士覺。九有情居智。陀羅尼門。三摩地門。十地。十行。十忍。二十增上意樂。如來十力。四無所畏。四無礙解。十八不共法。三十二相。八十隨好。無忘失法。恆住捨性。一切智。道相智。一切相智。一切

相微妙智。大慈。大悲。大喜。大捨。及餘無量無邊佛法。如是一切。不可得故。

舍利子問。云何修行般若波羅密多。能如實知如是六度。由方便善巧故。各互能滿六度。佛言。以無所得而為方便。能滿六度。又菩薩欲得一切不可思議功德。皆應學般若波羅密多。知一切法。皆但有名。不生執著。若五蘊。若十二處。若十八界。若觸。若受。若六界。若四緣。及所生法。若十二支。若六度。若二十空。若三十七品。若三解脫門。若四聖諦。若四靜慮。四無量。四無色定。若八解脫。八勝處。九次第定。十徧處。若陀羅尼門。三摩地門。若極喜等十地。若正觀等十地。若五眼。六通。十力。四無所畏。四無礙解。大慈悲喜捨。十八不共法。若三十二相。八十隨好。若無忘失法。恆住捨性。若一切智。道相智。一切相智。一切智智。若永拔習氣。若四果獨覺。若一切菩薩行。若諸佛無上菩提。

以要言之。世出世法。有漏無漏。有為無為。十六知見。皆但有名。實不可得。菩薩於名。所名。俱無所得。以不觀見。無執著故。如是智慧。勝於聲聞智慧。不可比喻。以能成勝事故。聲聞智慧如螢。菩薩智慧如日。從初發心。乃至菩提。常與二乘作真福田。已報諸施主恩。

相應品第三

謂與一切蘊處界。乃至無上菩提空相應故。與般若波羅密多相應。亦不見若相應若不相應等。又於一切諸法。不著有。不著非有。不著常無常。不著樂苦。不著我無我。不著寂靜不寂靜。不著空不空。無相有相。無願有願。又不為一切法故。修行般若。不見有所修般若。

如是善能安立有情於涅槃界。魔不得便。煩惱伏滅。諸佛菩薩。皆共護念。設有罪業。轉現輕受。如是菩薩。不見空與諸法相應。不見諸法與空相應。是為第一與空相應。畢竟不起

慳貪犯戒忿恚懈怠散亂惡慧障礙之心。六度任運現前。無間無斷。

轉生品第四

舍利子問。安住般若菩薩。從何處沒。來生此間。從此處沒。當生何處。佛為廣分別答。無量大苾芻眾。以新淨衣獻佛。發無上心。佛為授菩提記。又有無量有情。願生十方淨土。佛亦授記。

讚勝德品第五

舍利子。大目連。大飲光。善現等。同讚菩薩般若。佛印成之。

現舌相品第六

佛復現廣長舌。放光照十方土。十方菩薩雲集供養。諸天亦來供養。佛令諸供養具。合成臺蓋。徧覆佛土。百千俱胝那庾多眾。悟無生忍。授記作佛。

教誡教授品第七

佛命善現。為菩薩說般若相應法。善現告舍利子。諸佛弟子所說教法。皆承佛威神力。非以自慧辯才力也。因即問佛。何法名為菩薩。何法名為般若。佛言。菩薩但有名。般若亦但有名。如是二名。亦但有名。如是假名。不生不滅。不在內外中間。不可得故。譬如我人等十六知見。乃至色等。但是假名。不可得故。菩薩於一切法。名假。法假。及教授假。應正修學。

復次不應觀色等若常。若無常。若樂。若苦。若我。若無我。若淨。若不淨。若空。若不空。若有相。若無相。若有願。若無願。若寂靜。若不寂靜。若遠離。若不遠離。若有為。若無為。若有漏。若無漏。若生。若滅。若善。若非善。若有罪。若無罪。若有煩惱。若無煩惱。若世間。若出世間。若雜染。若清淨。若屬生死。若屬涅槃。若在內。若在外。若

在兩間。若可得。若不可得。

菩薩於一切法。住無分別。能修六度。能住二十空。及真如等。能修三十七品。能住四聖諦。能修十二門禪。乃至三脫。十地。及三智等。不見菩薩及菩薩名。不見般若及般若名。唯正勤求一切智智。何以故。於一切法。善達實相。了知其中無染淨故。復次於名假施設。法假施設。如實覺已。不著色等。乃至不著方便善巧。以一切法。皆無所有。能著。所著。著處。著時。不可得故。

次問善現。即色等是菩薩不。異色等是菩薩不。色等中有菩薩不。菩薩中有色等不。離色等有菩薩不。善現一一答云。不也。又問。汝觀何義。言即色等非菩薩。乃至非離色等有菩薩耶。善現一一答言。若菩提。若薩埵。若色等。尚畢竟不可得。性非有故。況有菩薩。此既非有。如何可言即色等是菩薩

(云云)。佛讚印之。

又問。即色等真如是菩薩不。乃至離色等真如有菩薩不。善現一一答言。不也。又問。汝觀何義。言即色等真如非菩薩。乃至非離色等真如有菩薩耶。善現一一答言。若色等尚畢竟不可得。性非有故。況有色等真如。此真如既非有。如何可言即色等真如是菩薩（云云）。佛讚印之。又問。即色等增語。色等常無常等增語。是菩薩不。善現一一答言。不也。

又問。汝觀何義。言即色等增語非菩薩。乃至即色等若可得若不可得增語非菩薩耶。善現一一答言。若色等。若色等常無常。乃至可得不可得等。尚畢竟不可得。性非有故。況有色等乃至可得不可得等增語。此增語既非有。如何可言即色等增語。乃至即色等若可得若不可得增語是菩薩。佛讚印之。

次明諸法不見諸法。諸法不見法界。法界不見諸法。法界不見法界。乃至非離有為施設無為。非離無為施設有為。於一切法。都無所見。其心不驚。不恐不怖。於一切法。心不沈

沒。亦不憂悔。

勸學品第八

善現白佛言。菩薩欲滿六度。欲徧知一切法。欲永斷一切惡法。欲修習一切善法。欲得一切佛法。欲滿一切有情心願。欲滿殊勝善根。當學般若。舍利子問菩薩頂墮。答言。無方便善巧。住三解脫而起想著。是為順道法愛。如宿食生。能為過患。若於二十空門。不見不得。若作是觀。名入菩薩正性離生。又於一切法。及一切名。皆應知不應著是心非心。本性淨故。與一切法非相應。非不相應。無變異。無分別。

舍利子問。如心無變異。無分別。色等一切法亦無變異無分別耶。善現一一答言。如是。舍利子讚言。欲學聲聞地。獨覺地。菩薩地。如來地者。皆當於般若聽習讀誦受持。如理思惟。令其究竟。何以故。般若廣說開示三乘法故。菩薩若學般若。則為徧學三乘。亦於三乘法皆得善巧。

無住品第九

善現白佛。我於諸法。不得見若集若散。諸法名義。既無所有。故色等名皆無所住。亦非不住。云何令我以般若相應法。教誡教授諸菩薩。必當有悔。諸法因緣和合。施設假名。於蘊處界。乃至佛菩薩聲聞僧等。皆不可說。又一切若有名。若無名。皆無處可說。若菩薩聞時。心不沈沒憂悔。不驚。不恐。不怖。當知已住不退地。以無所住方便而住。

又修行般若菩薩。不應住色。不應住受想行識等。何以故。色。色性空。受想行識。受想行識性空。是色非色空。是色空非色。色不離空。空不離色。色即是空。空即是色。受想行識。乃至一切陀羅尼門。一切三摩地門。亦如是。故不應住。若菩薩無方便善巧。我我所執所纏擾故。心住色等。於色等作加行故。不能攝受修行圓滿般若波羅密多。不能成辦一切智相。是故色等一切法。皆不應攝受。既不應攝受。便非色等

一切法。

所以者何。本性空故。其所攝受修行圓滿般若波羅密多。亦不應攝受。既不應攝受。便非般若波羅密多。本性空故。菩薩應以本性空。觀一切法。作此觀時。於一切法。心無行處。是名無所攝受三摩地。此三摩地。微妙殊勝。廣大無量。能集無邊無礙作用。其所成辦一切相智。亦不應攝受。既不應攝受。便非一切相智。以內空故。乃至無性自性空故。是一切相智。非取相修得。諸取相者。皆是煩惱。

勝軍梵志。由勝解力。於一切法不取不捨。實相法中。無取捨故。菩薩於一切法無所取著。能從此岸到彼岸故。若於諸法少有取著。則於彼岸非為能到。雖無所取。而以本願。不於中間而般涅槃。雖圓滿一切佛法。亦不見一切佛法。以一切法。非法非非法故。於一切法雖無所取。而能成辦一切事業。

般若行相品第十

善現白佛。菩薩修行般若。審諦觀察。若法無所有。不可得。是為般若。於無所有不可得中。何所徵責。舍利子問。何法為無所有不可得耶。善現言。謂般若等六度無所有不可得。由內空故。乃至無性自性空故。又蘊處界觸受等。乃至菩薩法。如來法。若常。若無常。乃至若內。若外。若兩間。一一皆爾。菩薩審諦觀察一切法皆無所有不可得時。心不沈沒憂悔。不驚恐怖。當知能於般若。常不捨離。以如實知一切法。離一切法自性故。

舍利子問。何者是般若自性。乃至一切法自性。善現答言。無性是般若自性。乃至無性是一切法自性。又般若離般若相。乃至一切法離一切法相。自性亦離自性。相亦離相。自性亦離相。相亦離自性。自性相亦離相自性。相自性亦離自性。舍利子言。菩薩於此中學。則能成辦一切相智。善現言。如是如是。知一切法無生無成辦故。

舍利子言。何因緣故。一切法無生無成辦。善現言。色等空故。色等生成辦不可得。菩薩作如是學。便近一切相智。得身語意清淨。得相清淨。不墮胎生。不生惡趣。乃至菩提。常不離佛。善現白佛。若菩薩無方便善巧。若行色。若行色相。非行般若。若行色常無常等。若行色常無常相等。非行般若。廣說一切法亦如是。乃至若作是念。我行般若。我是菩薩。彼行般若。彼是菩薩。皆是有所得行相。非行般若。

又語舍利子。若於色住想勝解。便於色作加行。由加行故。不能解脫生老病死。及當來苦。乃至於獨覺菩薩如來。及於彼法。亦如是。是名無方便善巧。若有方便善巧。不行色。不行色相。不行色常無常等。不行色常無常相等。乃至一切法。亦如是。於一切法。不取有。不取非有。不取亦有亦非有。不取非有非非有。於不取亦不取。由一切法自性不可得。以無性為自性故。於般若波羅密多。不取行。不取不行。不取

亦行亦不行。不取非行非不行。於不取亦不取。由般若自性不可得。以無性為自性故。是名於一切法無所取著三摩地。恆住不捨。速證無上菩提。

更有健行三摩地等。略舉一百五十七名。復有無量無數三摩地門。陀羅尼門。若善修學。亦令速證菩提。菩薩雖住諸三摩地。而不見不著。亦不念我已入。今入。當入。唯我能入。非餘所能。如是尋思分別。皆不現行。以無所有中。分別想解無由起故。佛讚印之。兼勸菩薩應如是學。

舍利子問。此為正學般若。乃至正學一切相智耶。佛言。如是。又問。以無所得為方便。為何等法不可得耶。佛言。我不可得。畢竟淨故。有情命者等。乃至如來不可得。畢竟淨故。諸法不出不生。不沒不盡。無染無淨。無得無為。是名畢竟淨義。如是學時。於一切法。都無所學。若於無所有法不能了達。說名無明。由無明。及愛勢力。分別執著斷常二邊。

不知不見諸法無所有性。墮於愚夫異生數中。不能出離三界。不能成辦三乘。不能信受一切法空。不能住於三十七品六度等法。是故欲學般若。欲成辦一切智。道相智。一切相智。當以無所得為方便。如應而學。

譬喻品第十一

善現與如來問答。明一切法不異幻。幻不異一切法。一切法即幻。幻即一切法。若無方便善巧。不為善友之所攝受。聞說甚深般若。其心有驚恐怖。若以應一切智智心。觀一切法常無常相等不可得。是有方便善巧。其心不驚恐怖。

次明善友之相。雖說一切法不可得。而勸依此法勤修善根。不令回向二乘。唯令證得一切智智。若離應一切智智心。於修一切法有所得。有所恃。以有所得為方便故。聞說甚深般若。有驚恐怖。

次明惡友之相。若教厭離般若等相應法。若不為說魔事魔

過。是名惡友。應速遠離。

菩薩品第十二

善現白佛。菩薩是何句義。佛言。菩提不生。薩埵非有。故無句義。是菩薩句義。如空中鳥跡句義。幻事等句義。真如等句義。又如幻士色相等句義。如來色相等句義。當知一切句義。無所有。不可得。菩薩句義亦如是。菩薩於一切法皆無所有。無礙。無著。應學。應知。

次為善現分別解釋善法。非善法。有記法。無記法。世間法。出世間法。有漏法。無漏法。有為法。無為法。共法。不共法。菩薩於如是自相空法。不應執著。應以無二而為方便。覺一切法。以一切法無動相故。

摩訶薩品第十三

佛答善現。發金剛喻心。發殊勝廣大心。發不可傾動心。發利益安樂心。愛法。樂法。欣法。喜法。以無所得而為方

便。亦不自恃而生憍舉。故於大有情眾。定為上首。又以無所得而為方便。安住二十空四靜慮等。故於大有情眾。定為上首。舍利子。善現。滿慈子。亦各廣說摩訶薩義。

大乘鎧品第十四

佛答善現。菩薩擐大乘鎧。謂六度。十二禪。三十七品。二十空。五眼。六通。十力。無畏。無礙。大慈悲喜捨。十八不共法。三智。身相諸功德等。擐如是鎧。放光徧照。令諸世界六三變動。息三途苦。為讚三寶。令生天人。覲佛稟法。猶如幻師。雖有所為。而無一實。諸法性空。皆如幻故。

善現白佛。不擐功德鎧。是為擐大乘鎧。以一切法自相空故。佛言。如是。當知一切智智。無造無作。一切有情。亦無造無作。菩薩為是事故。擐大乘鎧。由諸作者不可得故。我非造非不造。非作非不作。我畢竟不可得故。廣說乃至一切法皆爾。善現白佛。如我解佛所說義。一切諸法。性無所有。性遠

離。性寂靜。性空。性無相。性無願。性無生。性無滅。性無染。性無淨故。皆無縛無解。

滿慈子問。何等色。受。想。行。識。無縛無解。善現答言。如幻。如夢。如像。如響。如光影。如空華。如陽燄。如尋香城。如變化事色等。無縛無解。以性無所有。乃至性無淨故。又過去未來現在色等。善。不善。無記。有染。無染。有罪。無罪。有漏。無漏。雜染。清淨。世出世間色等。皆無縛無解。以性無所有。乃至性無淨故。廣說一切法亦如是。

菩薩於是無縛無解法門。以無所得而為方便。應如實知。應勤修學。應住無縛無解一切相智。應成熟無縛無解有情。應嚴淨無縛無解佛土。應親近供養無縛無解諸佛。應聽受無縛無解法門。

辯大乘品第十五

善現白佛。云何知菩薩大乘相。云何知發趣大乘。如是大

乘。從何處出。至何處住。如是大乘。為何所住。誰乘大乘而出。佛言。六度是大乘相。發應一切智智心。大悲為上首。以無所得而為方便。修行施等。持此善根。與一切有情。回向無上菩提。

又大乘相者。謂二十空。一百五十七三摩地。三十七品。空無相無願三三摩地。十一智。三無漏根。有尋等三三摩地。十隨念。四靜慮。四無量。四無色定。八解脫。八勝處。九次第定。十徧處。佛十力。四無所畏。四無礙解。大慈悲喜捨。五眼。六通。三智。十八不共法。四十二字陀羅尼門（多有細釋）。

從一地趣一地。是為發趣大乘。初地修治十種勝業。二地思惟修習八法。三地應住五法。四地應住十法。五地遠離十法。六地圓滿六法。應遠六法。七地離二十法。滿二十法。八地應滿四法。九地應滿四法。十地滿十二法（各有徵釋）。

如是大乘。從三界中出。至一切智智中住。然無二故。無出無至。非已出已至。非當出當至。非今出今至。無相之法。無動轉故。如是大乘。都無所住。諸法住處不可得故。然此大乘。住無所住。如一切法非住非不住。大乘亦爾。若所乘乘。若能乘者。由此為此。所出所至。及出至時。如是一切。皆無所有。都不可得。以一切法畢竟淨故。非已可得。非當可得。非現可得。

如是菩薩修行般若。雖觀一切法皆無所有不可得畢竟淨故。無乘大乘而出至者。然以無所得為方便。乘於大乘。出三界生死。至一切智智。利益安樂一切有情。窮未來際。常無斷盡。

讚大乘品第十六

善現略讚。如來廣讚。菩薩住此三世平等相中。精勤修學一切智智。無取著故。速得圓滿。菩薩安住如是大乘相中。超

勝一切世間。

隨順品第十七

滿慈子問。如來令善現宣般若。而今何故乃說大乘。佛言。一切善法。無不攝入般若。若大乘。若般若。其性無二。無二分故。

無所得品第十八

善現白佛。三際菩薩不可得。色等無邊故。菩薩亦無邊。即色等菩薩無所有不可得。離色等菩薩無所有不可得。我於一切法。以一切種一切時求菩薩。都無所見。竟不可得。云何令我以般若教誡教授諸菩薩。世尊。菩薩但有假名。如說我等。畢竟不生。諸法亦爾。都無自性。

世尊。色等諸法若畢竟不生。則不名色等。我豈能以畢竟不生般若。教誡教授畢竟不生諸菩薩。世尊。離畢竟不生。亦無菩薩能行無上菩提。若菩薩聞作是說。其心不驚恐怖。不沈

沒憂悔。當知能行般若。舍利子問善現。何緣故作是說。善現廣答釋之。

觀行品第十九

善現白佛。菩薩修行般若。觀諸法時。於色等不受不取不執不著。亦不施設為色等。又修行般若時。不見色等。以色等性空。無生滅故。又色等不生。則非色等。色等與不生。無二無二分。以不生法。非一非二。非多非異故。色等不滅亦爾。又色等不二。則非色等。又色等皆入不二無妄法數。

舍利子問。何謂菩薩。何謂般若。何謂觀諸法。善現答言。為有情類求大菩提。亦有菩提。故名菩薩。能如實知一切法相而不執著。故復名摩訶薩。所謂如實知色相等而不執著。有勝妙慧。於一切煩惱見趣。一切六趣四生。一切蘊處界等。而得遠離。有勝妙慧。於色等實性而得遠到。故名般若波羅密多。

觀色等非常非無常。非樂非苦。非我非無我。非淨非不淨。非空非不空。非有相非無相。非有願非無願。非寂靜非不寂靜。非遠離非不遠離。是謂觀諸法。

舍利子問。何緣故說色等不生。則非色等。善現答言。色等。色等性空。此性空中。無生無色等。故說色等不生則非色等。問答色等不滅亦爾。反問。何緣故說色等不二。則非色等。答。若色等若不二。如是一切。皆非相應非不相應。非有色非無色。非有見非無見。非有對非無對。咸同一相。所謂無相。故說色等不二。則非色等。

又問。何緣故說色等入不二無妄法數。答。色等不異無生滅。無生滅不異色等。色等即是無生滅。無生滅即是色等。故說色等入不二無妄法數。

無生品第二十

善現白佛。菩薩修行般若。觀諸法時。見我等無生。畢竟

淨故。見色等無生。乃至見如來法無生。畢竟淨故。舍利子問。若如是者。六趣受生。應無差別。又若一切法定無生者。何緣為預流果。修斷三結道。乃至何緣諸佛為有情故。轉妙法輪。善現答言。非於無生法中。見有六趣受生差別。乃至非於無生法中。見有諸佛證無上菩提。轉妙法輪。度無量眾。

又但隨世間言說施設。有得有現觀。非勝義中。有得有現觀。乃至六趣差別。亦隨世間言說施設故有。非勝義也。色等是不生法。我不欲令生。以自性空故。又色等是已生法。我不欲令生。以自性空故。生與不生。俱非相應非不相應。乃至非有對非無對。咸同一相。所謂無相。

故我不欲令生生。亦不欲令不生。乃至於不生法起不生言。此不生言亦不生。以色等皆本性空故。諸佛弟子能隨問答。以一切法無所依故。色等本性空。依內。依外。依兩中間。不可得故。

淨道品第二十一

善現謂舍利子。菩薩修行六度。應淨色等。乃至應淨一切相智。應淨菩提道。具明六度各有二種。一者世間。二出世間。以有所得為方便。著三輪而行施等。名為世間。三輪清淨。以大悲為上首。所修施等。普施有情。於諸有情。都無所得。雖與一切有情同共回向無上菩提。而於其中不見少相。由都無所執而行施等。名出世間波羅密多。

又二十空。真如等。四諦。六度。四靜慮等。八解脫等。四念住等。乃至一切相智。名菩提道。如是功德。皆由般若勢力所致。如是般若。能與一切善法為母。一切三乘善法從此生故。如是般若。普能攝受一切善法。一切三乘善法依此住故。若菩薩聞說般若。心無疑惑。亦不迷悶。

當知住如是住。不離大悲作意。以有情等非有故。作意亦非有。有情等無實故。無自性故。空故。遠離故。寂靜故。無

覺知故。作意亦無實。乃至無覺知。佛讚印之。大千六種轉變。如來微笑明益。

天帝品第二十二

諸天來會。帝釋問言。何者是菩薩般若。云何應住。云何應學。善現答言。以應一切智智心。用無所得為方便。思惟蘊。處。界。觸。受。六大。十二因緣。皆無常。苦。無我。不淨。空。無相。無願。寂靜。遠離。如病。如癰。如箭。如瘡。熱惱逼切。敗壞衰朽。變動速滅。可畏可厭。有災有橫。有疫有癘。性不安隱。不可保信。無生無滅。無染無淨。無作無為。是為般若。

復次以應一切智智心。用無所得為方便。觀察二十空真如等。無我我所。無相。無願。寂靜遠離。無生無滅。無染無淨。無作無為。是為般若。復次以應一切智智心。用無所得為方便。行六度十二禪。乃至修一切相智。是為般若。復次作

如是觀。唯有諸法。互相緣藉。滋潤增長。徧滿充溢。無我我所。雖觀諸法。而於諸法都無所見。佛讚印之。

善現又答。色等。色等性空。菩薩。菩薩性空。若色等性空。若菩薩性空。如是一切。皆無二無二分。菩薩於般若。應如是住。不應住色等。不應住此是色等。不應住色等若常若無常。乃至若有願若無願。以有所得為方便故。又不應住預流等是無為相。是福田。不應住初地等殊勝事。不應住我當圓滿六度十二禪。乃至我當成辦三十二相。八十隨好等。又不應住願我當得淨佛土中。無一切法名聲。以有所得為方便故。一切如來得菩提時。覺一切法都無所有。名字音聲。皆不可得。

舍利子作是念。若菩薩於一切法不應住者。云何應住般若。善現謂曰。諸如來心為何所住。舍利子言。諸佛之心。都無所住。以色等不可得故。如來之心。於一切法都無所住。亦非不住。善現謂言。菩薩雖住般若。而同如來。於一切法都無

所住。亦非不住。以色等無二相故。以無所得而為方便。應如是學。

諸天子品第二十三

有諸天子竊作是念。諸藥叉等言辭咒句。雖復隱密。而尚可知。尊者於此般若。雖以種種言辭顯示。而我等輩竟不能解。善現告言。我曾於此不說一字。汝亦不聞。當何所解。何以故。甚深般若。文字言說皆遠離故。由此於中說者聽者。及能解者。皆不可得。如來所證無上菩提。其相甚深。亦復如是。如化。如夢。如響。如幻。

時諸天子復作是念。尊者雖復方便顯說。欲令易解。而其意趣甚深轉甚深。微細更微細。善現告言。色等非甚深。非微細。色等深細性不可得故。諸天子復作是念。尊者所說法中。不施設色等。色性等不可說故。亦不施設文字語言。文字語言性等不可說故。善現告言。如是如是。應住無說。無聽。無

解。甚深般若。常勤修學。不應捨離。乃至我今欲為如幻如化如夢有情。說如幻化夢法。設更有法勝涅槃者。我亦說為如幻化夢所見。所以者何。幻化夢事。與一切法。乃至涅槃。皆悉無二無二分故。

受教品第二十四

舍利子等同聲問善現曰。所說般若。如是甚深。誰能信受。善現答言。菩薩住不退地。能深信受。已見聖諦。及漏盡羅漢。亦能信受。已於多佛植眾善本。諸善知識所攝受者。亦能信受。如是人等。終不以空不空分別色等。亦不以色等分別空不空。有相無相。有願無願。生不生。滅不滅。寂靜不寂靜。遠離不遠離。以對色等。廣說亦如是。

舍利子問。豈不於此般若甚深教中。廣說三乘法等。善現答言。誠如所說。如是深教諸有所說。以無所得而為方便。謂於我有情等。色等。處等。乃至有為界。無為界。以無所得而

為方便。又問。何因緣故。答言。由內空故。由外空乃至無性自性空故。

散花品第二十五

諸天化花散供。佛力合成花臺。覆大千界。善現念言。非草木水陸所生。從心化出。天帝釋言。亦不從心實能化出。但變現耳。善現言。是花不生。則非花也。帝釋問。為但是花不生。為餘法亦爾。善現答。色亦不生則非色。乃至無上乘亦不生則非無上乘。以不生法。離諸戲論。不可施設為色等故。

學般若品第二十六

帝釋心念。尊者智慧甚深。不壞假名而說法性。佛便印言。色等但假名。如是假名。不離法性。善現不壞如是色等假名。而說色等法性。以色等法性。無壞無不壞故。善現所說。亦無壞無不壞。善現語帝釋言。菩薩知一切法但假名已。應學般若。如是學時。不於色等學。不見色等可於中學故。

帝釋問言。何緣不見色等。善現答言。色等色等性空故。菩薩不見色等。不見色等故。不於色等學。何以故。不可色等空見色等空。不可色等空於色等空學故。若菩薩不於空學。是菩薩為於空學。無二分故。不於色等空學。為於色等空學。無二分故。若於色等空學無二分故。是能於布施等學。是能於內空等學。是能於真如等學。乃至是能於三乘學。何以故。無二分故。

若能於布施等學無二分故。是能學無量無數無邊不可思議清淨佛法。何以故。無二分故。若能學無量清淨佛法。是不為色等增減故學。以色等無二分故。若不為色等增減故學。是不為色等攝受壞滅故學。以色等無二分故。舍利子問。不為色等攝受壞滅故學耶。善現答言。如是如是。舍利子問。何緣不為色等攝受壞滅故學。善現答言。不見有色等是可攝受。及所壞滅。亦不見有能攝受色等。及壞滅者。以色等若能若所。內外

俱空。不可得故。

若菩薩於色等。乃至於無上乘。不見是可攝受及可壞滅。亦不見有能攝受及壞滅者。而學般若。是菩薩能成辦一切智。是不見色等若生若滅。若取若捨。若染若淨。若集若散。若增若減。以色性等。空無所有。不可得故。是菩薩於一切法不見若生若滅等而學般若。則能成辦一切智智。以無所學無所成辦為方便故。

求般若品第二十七

帝釋問舍利子。菩薩所行般若。當於何求。舍利子言。當於善現所說中求。帝釋問善現言。舍利子所說。是誰神力。誰為依處。善現報言。是如來神力。如來為依處。帝釋言。一切法無依處。如何可言如來為依處。善現答言。如是如是。如來非所依處。亦無所依。但隨順世俗施設說為依處。

非離無依處。如來可得。非離無依處真如。如來可得。非

離無依處法性。如來可得。非離無依處。如來真如可得。非離無依處。如來法性可得。非離無依處真如。如來真如可得。非離無依處法性。如來法性可得。

又非無依處中。如來可得。非如來中。無依處可得。非無依處真如中。如來可得。非如來中。無依處真如可得。非無依處法性中。如來可得。非如來中。無依處法性可得。非無依處中。如來真如可得。非如來真如中。無依處可得。非無依處中。如來法性可得。非如來法性中。無依處真如可得。非無依處法性中。如來法性可得。非如來法性中。無依處法性可得。廣歷色等一切法。各作二十一句亦如是。

憍尸迦。如來於色等非相應非不相應。於色等真如非相應非不相應。於色等法性非相應非不相應。如來真如於色等非相應非不相應。於色等真如非相應非不相應。如來法性於色等非

相應非不相應。於色等法性非相應非不相應。又如來於離色等非相應非不相應。例作七句。

彼舍利子所說。是於一切法。非離非即。非相應非不相應。如來之神力。如來為依處。以無依處為依處故。善現復告帝釋。菩薩所行般若。不應於色等求。不應離色等求。所以者何。若色等。若離色等。若菩薩。若般若。若求。如是一切。皆非相應非不相應。非有色非無色。非有見非無見。非有對非無對。咸同一相。所謂無相。何以故。菩薩所行般若。非色等。非離色等。

如是一切。皆無所有。性不可得。是故不應於色等求。不應離色等求。色等真如。廣說亦如是。色等法性。廣說亦如是。

歎眾德品第二十八

帝釋白善現言。菩薩所行般若。是大波羅密多。是無量波

羅密多。是無邊波羅密多。三乘皆於此中學而得果。善現印之。廣明色等大故。般若亦大。以色等前中後際皆不可得。故說為大。色等無量故。般若亦無量。譬如虛空量不可得。色等亦如是。量不可得。色等無邊故。般若亦無邊。以色等若中若邊皆不可得故。

又一切智智所緣無邊故。般若亦無邊。法界無邊故。所緣亦無邊。所緣無邊故。法界亦無邊。真如無邊故。所緣亦無邊。所緣無邊故。真如亦無邊。法界所緣真如所緣無邊故。般若亦無邊。又有情無邊故。般若亦無邊。以諸有情本性淨故。彼從本來無所有故。

攝受品第二十九

天仙三返唱善。若有菩薩於此般若能如說行。不遠離者。我等於彼敬事如佛。如是甚深教中。無色等法可得。而有施設三乘之教。佛讚印之。廣明非即布施等如來可得。非離布施等

如來可得。若菩薩以無所得為方便。於一切法能勤修學。便得不離一切佛法。如我於然燈佛時。便得受記。

天仙讚言。如是般若。甚為希有。令諸菩薩。速能攝取一切智智。謂於色等不取不捨為方便故。世尊照知四眾諸天。同為明證。顧命帝釋。若有不離一切智智心。以無所得為方便。於此般若受持讀誦。精勤修習。如理思惟。為他演說。廣令流布。魔不得便。以善住色等空無相無願。不可以空而得空便。不可無相得無相便。不可無願得無願便。以色等自性皆空。能惱所惱。及惱害事。不可得故。又人及非人。無能惱害。由是人以無所得為方便。於一切有情。善修慈悲喜捨心故。又不橫為諸險惡緣所害。亦不橫死。以修行布施。於諸有情正安養故。又不怖畏驚恐毛豎。以善修內空等故。於是諸天發願恭敬擁護。以由是菩薩。令諸有情斷四惡趣。離一切苦。由是菩薩便有十善四禪等一切善法。由是菩薩。便有人天三乘勝果。佛

讚印之。較量供養一初發心功德。展轉乃至供養十方二乘聖眾所不能及。

帝釋復歎受持般若功能。復歎攝受般若。則為攝受一切善法。佛印述之。並示現法後法功德勝利。若有魔外惡慢。暫聞般若聲故。眾惡漸滅。功德漸生。如莫耆妙藥。能消蛇毒。及般若能滅貪等惡法。增彼對治。乃至能滅般涅槃取。增彼對治。如是能滅一切魔所住法。及能生長一切善事。以無所得為方便故。是菩薩自離十惡。教他離十惡。讚說離十惡法。歡喜讚歎離十惡者。自行施等。教他行施等。讚說施等法。歡喜讚歎行施等者。是菩薩行六度時所行施等。以無所得為方便。與一切有情。同共回向無上菩提。常作是念。我不應隨慳貪破戒等勢力。若隨彼力。則施戒等不得圓滿。終不能成一切智智。帝釋歎言。如是般若。甚為希有。調伏菩薩。令不高心。而能回向一切智智。謂世間施等。無方便善巧。遂起高心。不

能回向一切智智。我我所執。擾亂心故。若出世間施等。善修般若故。不得三輪。能如實調伏高心。亦能如實回向一切智智。

佛告帝釋。念誦般若。不為刀仗所傷。以自除貪等刀仗。亦能除他貪等刀仗故。毒不能害。水不能溺。火不能燒。邪不能傷。以是般若。是大神咒。大明咒。無上咒。無等等咒。一切咒王。是人精勤修學如是咒王。不為自害。不為害他。不為俱害。所以者何。了自他俱。皆不可得。所謂不得色等。乃至不得無上乘。是人學此般若大咒王時。於我及法。雖無所得。而證無上菩提。觀諸有情心行差別。隨宜為轉無上法輪。令如說行。皆獲饒益。三世菩薩皆爾。此大咒法。諸天守護。不令有留難者。

校量功德品第三十

帝釋問書經福聚。供設利羅福聚。何者為多。佛言。我於

般若修學。得一切智智及相好身。不以獲相好身。說名如來。但以一切智智。說名如來。一切智智及相好身。並設利羅。皆以般若為根本故。是故書經福多。以一切善法。皆從般若而出生故。又十方有情。發心定趣無上菩提。而由遠離甚深般若方便善巧。多分退墮二乘地中。若欲住不退轉地。速證無上菩提。應於般若數數聽聞。受持讀誦。精勤修習。如理思惟。好請問師。樂為他說。書寫供養。

又於餘攝入般若諸勝善法。亦應聽聞。乃至樂為他說。所謂五度。二十空。乃至三智等。又隨順般若蘊處界等無量法門。亦應聽受思惟。不應非毀。令於菩提而作留難。以諸如來。昔皆修學如是等無量法門。證得無上菩提。如是等法。是三乘真實法印。是一切聖凡利益安樂所依處故。帝釋問持經福。佛展轉較答。而此般若在瞻部洲人中住。則三寶皆住不滅。則世間常有十善六度等一切善法。則世間常有人天三乘等

一切勝果。

於是欲色諸天同白帝釋。勸令受持讀誦。精勤修學。如理思惟。供養恭敬尊重讚歎如是般若。能令惡法損減。善法增益。普攝一切三乘法故。佛告帝釋。依因般若大咒王故。一切勝因勝果。出現世間。復次依因般若。故有菩薩。依因菩薩。故一切勝因勝果顯現。譬如依因滿月輪故。一切藥物星辰山海皆得增明。若如來未出世時。唯菩薩具方便善巧。為諸有情。無倒宣說世出世法。當知菩薩能出生五乘。而菩薩所有方便善巧。皆從是般若生長。若於此般若聽受。乃至流布。成就現在未來功德勝利。

爾時外道為求佛過。來詣佛所。帝釋念誦般若。惡魔退還。惡魔化作四兵。來詣佛所。帝釋念誦般若。惡魔退還。諸天化供。願此般若人中久住。

慶喜問佛。何緣不廣稱讚施等。但廣稱讚般若。佛言。由

此般若與彼一切善法為尊為導。若不回向一切智智而修施等。不名真修施等。故我但讚般若。慶喜又問。云何回向一切智智。佛言。以無二為方便。無生為方便。無所得為方便。修習施等。是名回向一切智智。慶喜又問。以何無二無生無所得為方便。佛言。

佛言。以色等無二無生無所得為方便。回向一切智智。修習施等。慶喜又問。云何以色等無二無生無所得為方便。回向一切智智。修習施等。佛言。色等。色等性空。以色等性空。與布施等無二無二分故。由此故說以色等無二無生無所得為方便。修習施等。慶喜當知。由此般若故。能回向一切智智。復由回向一切智智。能令修習施等得至究竟。故此般若於彼施等為尊為導。譬如大地。以種散中。眾緣和合。則得生長。應知大地與種生長。為所依止。為能建立。如是般若及所回向一切智智。與施等一切善法為所依止。為能建立。故此般若。與彼

施等為尊為導。

帝釋更廣說般若功德。佛更廣說般若功德。若此般若隨所在處。周帛除去諸不淨物。掃拭塗治。香水散灑。敷設寶座而安置之。燒香散華。莊嚴供養。便有威德天龍。來觀禮讀。歡喜護念。是人身心安樂。寢得善夢。不貪四事。因問帝釋。佛設利羅及此般若。汝取何者。帝釋白佛。寧取般若。

舍利子言。般若無色無見。無對一相。所謂無相。汝云何取。帝釋言。若於般若能如是知。是為真取般若。亦真修行般若。以不隨二行。無二相故。前五度亦不隨二行。無二相故。佛讚印之。帝釋又更廣讚。乃至若無般若。施等不能到彼岸故。譬如無價大寶神珠。又若欲得常見一切如來法身色身智慧身等。當於般若供養。乃至流布。若修般若。應以法性。於諸如來。修隨佛念。

法性有二。如實知我智有情智等無量門智。皆名有為法

性。一切法無生無滅等無性自性。皆名無為法性。佛言。三世三乘。皆因般若得果。如是般若祕密藏中。廣說三乘相應法故。然此所說。以無所得為方便故。無性無相為方便故。無生無滅為方便故。無染無淨為方便故。無造無作為方便故。無入無出為方便故。無增無減為方便故。無取無捨為方便故。如是所說。由世俗故。非勝義故。如是般若。非般若非非般若。乃至非境非智。不與三乘法。不捨異生法。

帝釋白佛。如是般若。是大波羅密多。是無上波羅密多。是無等等波羅密多。雖知一切有情心行境界差別。而不得我等。不得色等。乃至不得三藐三佛陀法。以能得所得。及二依處。性相皆空。不可得故。佛言。菩薩以無所得為方便。具行六度。由甚深般若為尊為導。修習施等。無所執著。速得圓滿。又於色等一切法。以無所得為方便。修習般若。由此因緣。無所執著。令所修習。速得圓滿。如瞻部洲諸樹。枝莖花

葉菓實。雖有種種形色不同。影無差別。如是施等雖各有異。而由般若攝受。回向一切智智。以無所得為方便故。亦無差別。

次較量書寫供養功德。不若書寫施他功德。次明佛成道已。還依此法而住。供養恭敬。尊重讚歎。況欲求無上菩提者。而不至心歸依甚深般若。次更展轉較量福多。乃至教化十方一切世界有情。皆學四禪四等四定五通。不如書寫般若。施他流布。以此祕密藏中。廣說施等一切無漏之法。三乘種性修學此法。各速獲果證故。

又教化一切有情。皆修四禪。乃至五通。不免三惡。不如教一有情。住預流果。教化一切有情。令住四果。不如教一有情。安住獨覺菩提。教化一切有情。皆住獨覺。不如教一有情。趨無上覺。則令世間佛眼不斷。由有菩薩。便有三乘三寶。由此般若祕密藏中所說法故。便有世出世間善果善因施設

可得。

若於般若如理思惟。所獲福聚。勝於教化一切有情。住五神通。如理思惟者。謂以非二非不二行覺。於此般若。及六度二十空等。如理思惟。又若於此般若。以無量門。廣為他說。宣示開演。顯了解釋。分別義趣。令其易解。勝自受持讀誦如理思惟功德。所言般若義趣者。非二非不二。非有相非無相。乃至非實際非非實際。如是義趣。有無量門。若能廣教他令易解者。勝自受持功德無量倍數。帝釋白言。諸善男子善女人等。應以種種巧妙文義。宣說開示如是般若。佛讚印之。

次明有所得而為方便。但名施等。不名波羅密多。無所得為方便。能滿六種波羅密多。若說相似般若。乃至相似布施。初心聞者。心便迷謬。失於中道。是故應以無所得慧。及以種種巧妙文義。為發無上菩提心者。宣說六度。若說有所得六度。名說相似六度。若說色等若常若無常。若樂若苦。若我若

無我。若淨若不淨。復說行般若者。應求色等若常若無常等。若人如是求色等若常若無常等。皆是說有所得相似般若。廣說靜慮。乃至布施亦爾。

又凡以有相為方便。有所得為方便。及時分想。教他修學六度。乃至隨喜回向。皆是說相似法。若說無所得六度。是名宣說真正六度。作如是言。汝應修般若。不應觀色等若常若無常。何以故。色等。色等自性空。是色等自性。即非自性。若非自性。即是般若。於此般若。色等不可得。彼常無常亦不可得。所以者何。此中尚無色等可得。何況有彼常與無常。汝若能修如是般若。是修般若波羅密多。若樂若苦。若我若無我。若淨若不淨。亦如是說。是為宣說真正般若。廣說靜慮。乃至布施亦爾。

又言。汝修學時。勿觀諸法有少可住。可超可入。可得可證。可受持等。所獲功德。及可隨喜回向菩提。何以故。於此

般若。乃至布施波羅密多。畢竟無有少法可住可超入等。以一切法自性皆空。都無所有。若無所有。即是般若。乃至布施波羅密多。於此般若等。畢竟無少法有入有出。有生有滅。有斷有常。有一有異。有來有去。而可得者。作此等說。是說真正般若。乃至布施波羅密多。

次又廣較福德。乃至若十方一切有情。皆於無上菩提得不退轉。有人於此般若。以無量門巧妙文義。為他廣說。令其易解。復作是言。來。善男子。汝當於此甚深般若。聽受通利。如理思惟。隨此般若所說法門。應正信解。則能修學。則能證得一切智法。則修般若增益圓滿。便證無上菩提。是人所獲功德。甚多於前。

復次乃至若教十方一切有情。皆於無上菩提不退。復以般若說令易解。有人於中。勸一速證無上菩提。令說三乘救度一切。復以般若說令易解。功多於前。何以故。速趣大菩提菩

薩。要甚假藉所說法故。於無上覺。求速趣故。觀生死苦。運大悲心。極痛切故。於是帝釋歎述。善現讚印。

隨喜回向品第三十一

彌勒菩薩白上座善現言。菩薩於一切有情所有功德。隨喜俱行諸福業事。以此福業事。與一切有情同共回向無上菩提。以無所得為方便故。於彼異生二乘諸福業事。為最。為勝。為尊。為高。為妙。為微妙。為上。為無上。無等。無等等。以諸異生。但為令己自在安樂。二乘為自調伏寂靜涅槃。菩薩普為一切有情故。

善現白言。是菩薩普緣十方佛及聖眾諸事。起隨喜回向心。為有如是所緣事。如彼菩薩所取相不。彌勒答言。實無如是所緣事。如彼菩薩所取相。善現言。如是所起隨喜回向。將非想顛倒。心顛倒。見顛倒。彌勒答言。若菩薩久修行六度。曾供養諸佛。宿植善根。久發大願。為諸善友所攝受。善學諸

法。自相空義。能於所緣事。及一切法。皆不取相。而能發起隨喜回向無上菩提。

如是隨喜回向。以非二非不二為方便。非相非無相為方便。非有所得非無所得為方便。非染非淨為方便。非生非滅為方便故。於所緣事。乃至無上菩提。能不取相。非顛倒攝。若不久修六度等所起隨喜回向。以取相故。猶顛倒攝。復次不應為新學菩薩宣說般若。乃至一切法自相空義。以雖有少分信敬愛樂。而聞已尋皆忘失。驚疑恐懼。生毀謗故。若不退轉菩薩。或曾供養諸佛等者。應為廣說般若。乃至一切法自相空義。以能受持。終不廢忘等故。

善現言。此所用心。盡滅離變。此所緣事。及諸善根。亦皆盡滅離變。何等是所用心。復以何等為所緣事。及諸善根。而說隨喜回向無上菩提。是心於心。理不應有隨喜回向。以無二心俱時起故。心亦不可隨喜回向心自性故。若菩薩修行般

若。能如實知色等皆無所有。以隨喜俱行福業事。回向無上菩提。是名無顛倒隨喜回向菩提。

帝釋問言。新學菩薩聞如是法。將無驚疑怖畏。云何以所修善根回向。云何攝受隨喜俱行諸福事業回向。善現承彌勒加被答言。新學菩薩修般若。以無所得為方便。無相為方便。攝受般若。乃至修無上菩提亦爾。由此因緣。多信解般若。乃至多信解無上菩提。由此因緣。常為善友之所攝受。以無量門巧妙文義。為其辨說六度相應之法。令其乃至得入菩薩正性離生。常不遠離般若等法。

復次新學菩薩。隨所修習施等。隨所安住內空等。皆應以無所得為方便。無相為方便。與一切有情同共回向無上菩提。復次新學菩薩。應普於十方佛及弟子功德。人天善根。一切合集稱量現前。發起無等等隨喜心。復以隨喜福業。與一切有情同共回向無上菩提。

彌勒問善現言。云何不墮想顛倒。心顛倒。見顛倒。善現答言。於所念佛及弟子眾所有功德。不起佛弟子眾功德之想。於人天等所種善根。不起善根人天等想。於所發起隨喜回向之心。亦復不起隨喜回向心想。是菩薩無想顛倒。心顛倒。見顛倒。若取其相。是有顛倒。復次正知此心盡滅離變。非能隨喜。正知彼法。其性亦然。非所隨喜。又正了達能回向心。法性亦爾。非能回向。及正了達所回向法。其性亦爾。非所回向。若能依是所說隨喜回向。是正非邪。

彌勒又問。云何不取相而能隨喜回向。善現答言。菩薩所學般若中。有如是善巧方便。雖不取相。而所作成。非離般若。有能發起隨喜回向。彌勒言。勿作是說。以般若中。佛弟子眾功德善根。皆無所有。不可得故。所作隨喜發心回向。亦無所有。不可得故。應作是觀。過去佛弟子眾功德善根。性皆已滅。所作隨喜發心回向。性皆寂滅。若取相分別。佛所不

許。妄想分別。雜毒藥故。大德應說云何隨喜回向。

善現答言。應作是念。如諸佛以無上智。徧知諸功德善根。有如是類。如是體。如是相。如是法。而可隨喜。我亦是隨喜。又如諸佛以無上智。徧知應以如是福業回向菩提。我亦如是回向。則不謗佛。隨佛所教。隨法而說。不雜眾毒。復次如色等。不墮三界。非三世攝。隨喜回向亦應如是。以彼諸法自性空故。又如實知色等自性不生。則無所有。不可以彼無所有法。隨喜回向無所有故。若以有相為方便。或有所得為方便。發生隨喜回向。佛不稱讚。不能圓滿六度等法。於是佛讚印之。諸天亦皆讚印。

佛告善現。菩薩欲於三世佛。及三乘功德。人天福業。發起無倒隨喜回向心者。應作是念。如解脫。色等亦如是。乃至一切有情亦如是。一切法性亦如是。一切隨喜回向亦如是。如諸法性無縛無解。無染無淨。無起無盡。無生無滅。無取無

捨。我於如是功德善根。現前隨喜回向菩提。如是隨喜。非能隨喜。無所隨喜故。如是回向。非能回向。無所回向故。如是所起隨喜回向。非轉非息。無生滅故。是隨喜回向。為最。為勝。乃至為無等等。疾證無上菩提。功德無比。

讚般若品第三十二

舍利子向佛廣讚般若。佛以一切善法皆由般若出現答之。帝釋與舍利子問答。廣顯五度如盲。般若如導。佛又廣答舍利子。菩薩不為引發色等一切法故。應引發般若。以一切法。無作無止。無生無滅。無成無壞。無得無捨。無自性故。舍利子問。如是引發般若。與何法合。佛言。不與一切法合。如是般若。於一切法無所得故。帝釋問。豈亦不合一切智智。佛言。亦不合。由此於彼不可得故。如是合得而無合得。於一切法。亦如是合得而無合得。

善現白佛。若菩薩起如是想。般若與一切法合。般若與一

切法不合。是俱棄捨般若。遠離般若。佛言。復有棄捨遠離般若。謂菩薩起如是想。般若無所有。非真實。不堅固。不自在。是俱棄捨遠離般若。善現問。若菩薩信般若。為不信何法。佛言。信般若。則不信色等一切法。以行般若時。觀一切法不可得故。善現白佛。菩薩般若。名大波羅密多。佛言。緣何意說。善現白佛。菩薩般若。於色等一切法。不作大。不作小。不作集。不作散。不作有量。不作無量。不作廣。不作狹。不作有力。不作無力。緣此意說。名大波羅密多。

復次新學菩薩。依般若等六度。起如是想。如是般若。於色等一切法不作大不作小等。由起此想。非行般若。若依六度。起如是想。如是般若。於一切法作大作小等。若不依六度。起如是想。如是般若。於一切法不作大不作小等。若不依六度。起如是想。如是般若。於一切法作大作小等。如是一切。皆非行般若。皆非般若等流果故。是名大有所得。非能證

無上菩提故。

所以者何。有情無生故。無滅故。無自性故。無所有故。空故。無相故。無願故。遠離故。寂靜故。不可得故。不可思議故。無覺知故。勢力不成就故。當知般若亦無生。乃至勢力亦不成就。色等一切法。一一廣說亦如是。故名大波羅密多。

謗般若品第三十三

舍利子問。於此般若能信解者。從何處來生。發菩提幾時。供幾所如來。修六度久如。佛言。從十方如來法會來生。發菩提經無數劫。供無數如來。常修六度。經無數劫。善現白佛。甚深般若。為有能聞能見者不。佛言。實無能聞及能見者。亦非所聞。及非所見。何以故。色等一切法無聞無見。諸法鈍故。

善現復問。菩薩積行久如。便能修學甚深般若。佛言。有菩薩從初發心。即能修學六度。有方便善巧故。不謗諸法。於

一切法不增不減。常不遠離六度相應之行。亦常不離諸佛菩薩。有菩薩雖曾見多佛。亦多修習六度。而有所得為方便故。不能修學甚深般若。及靜慮等。聞說如是甚深般若。便從座去。不敬般若。亦不敬佛。既捨般若。亦捨諸佛。乃至造作增長能感匱正法業。墮三惡道。各無數劫。

諸愚癡人。謗毀般若。由四因緣。一者為諸邪魔所扇惑故。二者於甚深法不信解故。三者不勤精進。堅著五蘊。諸惡知識所攝受故。四者多懷瞋恚。樂行惡法。喜自高舉。輕毀他故。

難信解品第三十四

善現白佛。不勤精進。未種善根。具不善根。為惡知識所攝受者。於佛所說甚深般若。實難信解。佛言。如是如是。善現復問。如是般若。云何甚深難信難解。佛言。色等非縛非解。以色等無所有性。為色等自性故。色等前後中際廣說亦

爾。又色等清淨。即果清淨。果清淨。即色等清淨。是色等清淨。與果清淨。無二無二分。無別無斷故。色等清淨。與般若清淨。廣說亦如是。色等清淨。與一切智智清淨。廣說亦如是。我清淨。有情清淨。命者清淨。乃至見者清淨。一一對色等清淨。廣說亦如是。

復次我清淨故。色等清淨。色等清淨故。一切智智清淨。何以故。若我清淨。若色等清淨。若一切智智清淨。無二無二分。無別無斷故。有情清淨。乃至見者清淨。一一廣說亦如是。復次貪清淨。即色等清淨。色等清淨。即貪清淨。何以故。是貪清淨。與色等清淨。無二無二分。無別無斷故。瞋清淨。癡清淨。廣說亦如是。

復次貪清淨故。色等清淨。色等清淨故。一切智智清淨。乃至無二無二分。無別無斷故。瞋癡廣說亦如是。復次色清淨故。受清淨。受清淨故。色清淨。無二無二分。無別無斷故。

受清淨故。想清淨。乃至一切菩薩行清淨故。諸佛無上菩提清淨。展轉廣說亦如是。

復次般若波羅密多清淨故。色清淨。色清淨故。一切智智清淨。無二無二分。無別無斷故。廣說乃至無上菩提亦如是。靜慮波羅密多清淨。乃至布施清淨。一一廣說亦如是。復次內空清淨故。色等清淨。色等清淨故。一切智智清淨。無二無二分。無別無斷故。外空清淨。乃至無性自性空清淨。一一廣說亦如是。

真如清淨。乃至不思議界清淨。一一廣說亦如是。苦聖諦清淨。乃至道聖諦清淨。一一廣說亦如是。四靜慮清淨。乃至十徧處清淨。一一廣說亦如是。四念住清淨。乃至八聖道支清淨。一一廣說亦如是。空無相無願三解脫門清淨。一一廣說亦如是。

菩薩十地清淨。五眼清淨。六神通清淨。佛十力清淨。乃

至十八佛不共法清淨。無忘失法清淨。恆住捨性清淨。一切智清淨。道相智清淨。一切相智清淨。一切陀羅尼門清淨。一切三摩地門清淨。預流果清淨。一來果清淨。不還果清淨。阿羅漢果清淨。獨覺菩提清淨。一切菩薩摩訶薩行清淨。諸佛無上正等菩提清淨。一一廣說亦如是。

復次一切智智清淨故。色等清淨。色等清淨故。般若波羅密多清淨。無二無二分。無別無斷故。以對靜慮。乃至布施波羅密多。對內空等。乃至諸佛無上菩提。一一廣說亦如是。復次有為清淨故。無為清淨。無為清淨故。有為清淨。無二無二分。無別無斷故。過去未來現在。互對亦爾。（此品共一百零三卷。具

明一切諸法。互攝互融。）

讚清淨品第三十五

舍利子白佛言。如是清淨。最為甚深。佛言。如是。畢竟淨故。廣說色等一一畢竟淨故。復言。極為明了。不轉不續。

本無雜染。本性光潔。無得無觀。無生無顯。一一廣說亦如是。又如是清淨。不生欲界。不生色界。不生無色界。三界自性不可得故。又如是清淨。本性無知。以一切法本性鈍故。又色等性無知。即是清淨。畢竟淨故。自相空故。

又般若於一切智智無益無損。畢竟淨故。法界常住故。清淨般若於一切法無所執受。畢竟淨故。法界不動故。又我清淨故。色等一切法清淨。畢竟淨故。我無所有故。色等一切法無所有。是畢竟淨。又我無邊故。色等無邊。以畢竟空無際空故。是畢竟淨。菩薩修行般若。不住此岸。彼岸。中流。即畢竟淨。以三世法性平等故。成道相智。

著不著相品第三十六

善現白佛。菩薩若無善巧方便。於此般若起般若想。以有所得為方便故。棄捨遠離甚深般若。佛言。如是。彼等著名著相。是故於此棄捨遠離。謂於此般若。取名取相。耽著般若。

或恃此般若而生憍慢。不能證得實相般若。若有善巧方便。以無所得為方便。於此般若。不取名相。不起耽著。不生憍慢。便能證得實相般若。

舍利子問。云何為著及不著相。善現答言。若無方便善巧。於色等謂空。起空想著。又或於色等謂色等。起色等想著。又從初發心。於六度二十空等。起行想著。名為著相。若有方便善巧。於色等不起空不空想。乃至不作是念。我能行施。惠彼受者。此所施物及惠施性等。以無所得為方便。無一切分別妄想執著。由普通達內空。乃至無性自性空故。是名無執著相。

帝釋問。云何著相。善現答言。起六度二十空等想著。乃至起於佛所種諸善根想著。起和合回向無上菩提想著。是名修行般若時所有著相。由著想故。不能修行無著般若。回向無上菩提。何以故。非色等本性可能回向故。復次應以如實相意。

示現教導勸勵讚喜有情。謂行六度二十空等。不應分別我能惠捨。乃至我能住內空等。若能如是於自無損。亦不損他。便能遠離一切想著。佛讚印之。

更說微細著相。謂於佛及弟子有情善法。不應取相而憶念故。諸取相者。皆虛妄故。如是般若。最為甚深。以一切法本性離故。皆應禮敬。功德多故。然無造無作。無能覺者。以一切法。一性非二。諸法一性。即是無性。諸法無性。即是一性。若如實知諸所有法一性無性。無造無作。則能遠離一切執著。

如是般若。難可覺了。無能見聞覺知者。離證相故。不可思議。不可以心知。離心相故。不可以色等知。離色等相故。無所造作。色等不可得故。作者不可得。若不行色等。不行色等若常若無常。乃至若淨若不淨。是行般若。何以故。色性等尚無所有。況有色等若常若無常等。

復次不行色等圓滿及不圓滿。是行般若。何以故。若色等圓滿及不圓滿。俱不名色等。亦不如是行。是行般若。復次不行色等著不著相。是行般若。如是行般若時。於色等不起著不著想。如是般若甚深法性。若說不說。俱無增減。如彼虛空。亦如幻士。若讚若毀。不增不減。

善現白言。菩薩修行般若。甚為難事。謂若修不修。無增無減。亦無向背。而勤修學如是般若。乃至菩提。曾無退轉。何以故。如修虛空。都無所有。如虛空中。無色等可施設。所修般若。亦復如是。是菩薩能擐大功德鎧。我等皆應敬禮。會中有一苾芻心念領解。佛讚印之。

帝釋問善現言。菩薩當如何學。善現答言。當如虛空學。帝釋白佛。若人受持般若。我當云何守護。善現謂言。汝見有法可守護不。帝釋言。不也。善現言。若人住如所說甚深般若。即為守護。一切求便欲害。終不能得。若欲守護。無異欲

護虛空。

帝釋問言。云何菩薩修行般若。雖知諸法如幻。夢。響。像。陽燄。光影。變化事。尋香城。而不執是幻等。亦不執由幻等。亦不執屬幻等。亦不執依幻等。善現答言。若菩薩不執是色等。由色等。屬色等。依色等。是菩薩雖知諸法如幻等。而不執是幻等。乃至依幻等。

說般若相品第三十七

諸天由佛神力。於十方面。各見千佛宣說般若。請說上首。皆名善現。問難上首。皆名帝釋。佛告善現。彌勒等當來諸佛。亦於此處宣說般若。善現白佛。彌勒得菩提時。以何諸行相狀宣說。佛言。當以色等非常非無常。非樂非苦。非我非無我。非淨非不淨。非寂靜非不寂靜。非遠離非不遠離。非縛非解。非有非空。非過去非未來非現在。宣說如是甚深般若。善現復問。彌勒得菩提時。證何等法。復說何法。佛言。

證色等畢竟淨法。說色等畢竟淨法。善現復問。如是般若。云何清淨。佛言。色等清淨故。無生無滅無染無淨故。復次色等無染汙故。不可取故。復次色等唯假說故。如依虛空。二事響現。色等亦復如是。復次色等不可說故。無可說事故。復次色等不可得故。無可得事故。復次色等不生不滅不染不淨故。畢竟空故。

善現白佛。於六齋日。讀說般若。諸天來聽。獲勝功德。佛言。如是般若。名大寶藏。爾時諸天散華。慶慰唱言。今見第二轉妙法輪。佛告善現。如是法輪。非第一轉。非第二轉。於一切法不為轉故。不為還故。出現於世。以無性自性空故。

波羅密多品第三十八

善現與佛酬唱廣歎。

難聞功德品第三十九

帝釋心念難聞。舍利子向佛分別信解不信解。由於夙因。

帝釋自言敬禮般若。即為敬禮一切智智。佛言。一切智智。皆從般若而得生故。菩薩應學般若。帝釋問佛。菩薩修行般若。云何住色等。云何習色等。佛言。若於色等不住不習。是為住習色等。以所住習色等不可得故。復次若於色等非住非不習。非習非不習。是為住習色等。以觀色等前後中際不可得故。

舍利子言。般若最為甚深。佛言。色等真如甚深故。舍利子言。般若難可測量。佛言。色等真如難測量故。舍利子言。般若最為無量。佛言。色等真如無量故。舍利子言。云何菩薩行般若。佛言。不行色等甚深性。是行般若。以色等甚深性。則非色等故。不行色等難測量性。不行色等無量性。一一廣說亦如是。

舍利子言。如是般若。不應在新學前說。忽彼聞此。不能信解。但應在不退轉菩薩前說。帝釋問。頗有未受記菩薩。聞說不驚恐怖者不。舍利子言。有。是菩薩不久當受大菩提記。

舍利子向佛說王都前相譬。見海近相譬。樹枝滋潤譬。懷孕身重譬。佛讚印之。善現歎佛甚奇希有。善能付囑菩薩。攝受菩薩。佛為說菩薩四攝。

善現又問。云何修行般若。速得圓滿。佛言。不見色等若增若減。又不見是法非法。有漏無漏。有為無為。過去未來現在。善不善無記。欲色無色。乃至不見六度二十空等。是菩薩修行般若。速得圓滿。以一切法無性相故。無作用故。不可轉故。虛妄誑詐。性不堅實。不自在故。無覺受故。離我有情。廣說乃至知見者故。善現白佛。如來所說不可思議。

佛言。如是色等不可思議故。若菩薩於色等不起不思議想。修行般若。速得圓滿。若菩薩不思惟分別色等。色等相。色等性。以色等不可思議故。齊此應知已久修六度。久種善根。供養多佛。事多善友。又色等甚深故。般若極為甚深。如是般若。是大寶聚。能與有情一切功德寶故。又色等清淨故。

相。無性空相。自性空相。無性自性空相。純空相。純無相。無願相。由是能示諸佛世間實相。名諸佛母。謂令不起此世間想。他世間想。以實無法可起此世他世想故。

不思議等品第四十二

善現白佛。甚深般若。為大事故而現於世。為不可思議事。為不可稱量事。為無數量事。為無等等事。而現於世。佛言。如是如是。善現復言。為但佛性。如來性。自然法性。一切智智性。不可思議。不可稱量。無數量。無等等。為更有餘法耶。佛言。色等亦不可思議。乃至無等等。復次色等不可施設。不可思議。乃至無等等性。善現白佛。何因緣故。佛言。色等不可施設。思議。稱量。數量。平等不平等性故。

善現又問。何因緣故。佛言。色等自性不可思議。不可稱量。無數量。無等等。無自性故。於意云何。色等不可思議。乃至無等等無自性中色等可得不可。善現言。不也。佛言。如

是。由此一切法皆不可思議。乃至無等等。以一切法皆不可思議。乃至無等等故。一切如來所有佛法。如來法。自然法。一切智智法。亦不可思議。乃至無等等。思議滅故。稱量滅故。數量滅故。等等滅故。但有增語。如虛空故。於是四眾得益。菩薩得記。

辦事品第四十三

佛答善現。般若能辦六度二十空等。如王以諸國事付囑大臣。如來亦爾。以三乘法付囑般若。般若不取著色等。出現世間。能成辦事。善現白言。云何般若出現世間。不取著色等。佛言。汝頗見色等可取可著不。頗見有法能取能著不。頗見由是法有取有著不。善現一一答言。不也。佛言。善哉。如是。是故菩薩亦不應取著色等。

諸天子白佛。假使大千有情。皆成四果獨覺。不如有人。一日於此甚深般若所成就忍。勝彼智斷無量無邊。以諸四果獨

覺所有智斷。皆是菩薩忍少分故。佛言。如是。

眾喻品第四十四

善現問言。若菩薩信解般若。復能修習。從何處沒。來生此間。佛言。從人趣來。亦有從他方佛處來。亦有從觀史多天來。若於先世。雖得聞般若等。而不請問甚深義趣。今聞說是般若。其心迷悶。猶豫怯弱。或生異解。若於先世。雖曾請問甚深義趣。而不能經一日二日三四五日。隨順修行。今聞說是般若。設經一日乃至五日。其心堅固。若離所聞。尋便退失。復次若不以般若等攝他有情。若不隨順修行深般若等。或墮聲聞及獨覺地。如海船破。不取木器屍等以為依附。如度曠野。不攝受資糧器具。如執壞瓶。如船未具裝治。如老病無人扶。若能攝受般若。方便善巧者。反是。善現白佛。云何不攝受般若。亦不攝受方便善巧。退墮聲聞及獨覺地。

佛言。從初發心。住我我所執。修行施等。所以者何。施

等波羅密中。無如是分別。何以故。遠離此彼岸。是施等波羅密多相故。此人不知此彼岸相故。不能攝受施等一切善法。由是或墮二地。不證無上菩提。又修施等時。執為我所而生憍慢。由不攝受甚深般若。亦不攝受方便善巧。退墮二地。若從初發心。離我我所執。修行施等。了知此岸彼岸相故。便能攝受施等一切善法。不墮二地。疾證菩提。

真善友品第四十五

佛答善現。初業菩薩應先親近真善知識。謂說修施等時。普施有情。同共回向無上菩提。不應以色等而取無上菩提。若不取色等。便得無上菩提。勿於色等而生貪愛。以色等非可貪愛。一切法自性空故。善現白佛。菩薩能為難事。於一切法自性空中。希求菩提。欲證菩提。佛言。如是。

雖知一切法如幻。夢。響。像。影。燄。化。尋香城。自性皆空。而為世間得義利故。得利益故。得安樂故。欲救拔

故。作歸依故。作舍宅故。作究竟道故。作洲渚故。作光明故。作燄炬故。作導師故。作將帥故。作所趣故。發趣菩提。善現白佛。云何為世間得義利。乃至作所趣。佛一一詳答。

是中作舍宅者。說一切法皆不和合。色等不和合。即色等不相屬。不相屬即無生。無生即無滅。無滅即不和合。作究竟道者。色等究竟。即非色等。如此諸法究竟相。一切法相亦如是。善現白佛。若一切法相如究竟相者。云何菩薩於一切法應現等覺。佛言。如是色等究竟中。無如是分別。謂此是色等。是為菩薩難事。謂雖觀一切法皆寂滅相。而心不沈沒。作是念言。我於是法現等覺已。證得菩提。為諸有情宣示寂滅微妙之法。

作洲渚者。色等前後際斷。即是寂滅微妙如實。作將帥者。開示色等無生無滅。無染無淨。作所趣者。開示色等以虛空為所趣。開示色等非趣非不趣。以色等性空。空中無趣無不

趣故。所以者何。一切法皆以空為趣。彼於是趣不可超越。以空中趣非趣不可得故。

無相為趣。無願為趣。無起無作為趣。乃至尋香城為趣。無量無邊等為趣。我有情等為趣。常樂我淨為趣。無常。苦。無我。不淨。為趣。貪事。瞋事。癡事。見所作事。真如等。色等。為趣。一一廣說亦如是。

趣智品第四十六

善現白佛。誰於甚深般若。能生信解。佛言。久發意。供多佛。善根熟。善友攝。乃能信解。善現復問。生信解者。何性。何相。何狀。何貌。佛言。調伏貪瞋癡性為性。遠離貪瞋癡相狀貌為相狀貌。又調伏貪無貪瞋無瞋癡無癡性為性。遠離貪無貪等相狀貌為相狀貌。

又問。信解般若。當何所趣。佛言。當趣一切智智。能與一切有情為所歸趣。又問。菩薩能為難事。擐堅固甲。度脫有

情。令證涅槃。而都不見有情施設。佛言。如是。

復次菩薩所擐甲冑。不屬色等。以色等畢竟無所有。非菩薩非甲冑故。善現白佛。是菩薩無容當墮二地。所以者何。菩薩非為度脫少分有情。非為求少分智故。普為救拔一切有情。但為求得一切智智。而擐甲冑。佛言。如是。善現白佛。般若甚深。無能修者。無所修法。亦無修處。亦無由此而得修習。所以者何。非此甚深義中。而有少分實法可得。若修虛空。是修般若。若修一切法。是修般若。若修不實法。若修無所有。若修無攝受。若修除遣。是修般若。所謂修除遣色等。佛印述之。

復次於般若等不生執著。驗知是不退菩薩。諸不退轉菩薩。不觀他語。及他教勅。以為真要。非但信他而有所作。不為貪瞋癡慢餘雜染心之所牽引。相續隨順趣向臨入一切智智。善現白佛。是菩薩行色等不。

佛言。不行色等。是菩薩隨順趣向臨入一切智智。無能作。無能壞。無所從來。無所去處。亦無所住。無方無域。無數無量。無往無來。亦無能證。不可以色等證。何以故。色等即是一切智智。所以者何。若色等真如。若一切智智真如。若一切法真如。皆一真如。無二無別。

真如品第四十七

諸天散華禮讚。言一切佛般若經中。皆作是說。色等即是一切智智。一切智智即是色等。若色等真如。若一切智智真如。若一切法真如。皆一真如。無二無別。亦無窮盡。

佛印述云。我觀此義。心恆趣寂。不樂說法。謂深般若。即佛所證無上菩提。無能證。非所證。無證處。無證時。此法深妙。不二現行。非諸世間所能比度。虛空等甚深故。此法甚深。我等甚深故。色等甚深故。此法甚深。

諸天白佛。此深妙法。不為攝取色等故說。不為棄捨色等

故說。世間有情。多行攝取行。起我我所執。謂色是我我所。乃至一切相智是我我所。佛印述云。若菩薩為攝取色等故行。為棄捨色等故行。不能修六度等。不能證二十空等。一一廣說。

善現白佛。此深妙法。隨順般若。乃至三智等一切法。於色等都無有礙。以無礙為相。虛空等平等性故。色等無生無滅故。色等足跡不可得故。諸天白佛。善現隨如來生。佛真弟子。善現謂諸天言。一切法真如平等故。如來真如平等。如來真如平等故。一切法真如平等。同一真如平等。無二無別。善現於此真如。能深信解。故說善現隨如來生。說是真如相時。大千震動。天散香華。

善現復言。善現不由色等故。隨如來生。不由色等真如故。隨如來生。不離色等故。隨如來生。不離色等真如故。隨如來生。是一切法。都無所有諸隨生者。若所隨生。由此隨

生。及隨生處。皆不可得。

舍利子白佛。此中色等不可得。色等真如亦不可得。何以故。色等尚不可得。況有色等真如可得。佛印述之。六萬菩薩。成阿羅漢。佛言。此諸菩薩。雖有菩薩道空無相無願解脫門。而遠離般若。及方便善巧力故。於實際作證。取聲聞果。舍利子問。何因緣故。有菩薩修三脫門。不攝受般若。無方便善巧力。便證實際。取二乘果。有菩薩修三脫門。攝受般若。有方便善巧力。不證實際。趣無上覺。佛言。若遠離一切智智心修三脫門。是不攝受般若。無方便善巧力。若不離一切智智心修三脫門。是攝受般若。有方便善巧力。

次說大鳥無翅喻。以喻菩薩依聲執相。若不取相。直趣無上菩提。以離相心。修行施等。安住二十空等。舍利子言。是菩薩從初發心。乃至究竟。都不見有少法可得。謂若能證。若所證。若證處。若證時。若由此證。都不可得。若色等乃至一

切相智都不可得。有人遠離般若方便善巧而求菩提。當知彼於所求。或得不得。於所修行六度等。於所安住二十空等。皆取相故。若欲證無上菩提。決定不應遠離般若方便善巧。用無所得為方便。以無相俱行心。應修六度等。應住二十空等。

諸天白佛。無上菩提。極難信解。甚難證得。所以者何。菩薩於一切法自相共相。皆應證知。方得無上菩提。而所知法相。都無所有。皆不可得。佛言。我亦現覺一切法相。證得無上菩提。而都不得勝義法相。可說名為此是能證。此是所證。此是證處。此是證時。及可說為由此而證。以一切法畢竟淨故。有為無為畢竟空故。

善現白佛。如我思惟佛所說義。無上菩提。極易信解。甚易證得。若能信解無法能證。無法所證。無有證處。無有證時。亦無由此而有所證。則能信解無上菩提。若有證知無法能證等。則能證得無上菩提。以一切法畢竟皆空。若增若減。都

不可得。不應於中謂難信解。及難證得。所以者何。色等。色等自性空。若於如是自性空。深生信解。無倒證知。便得無上菩提。

舍利子言。由是因緣。無上菩提極難信解證得。譬如虛空。不作是念。我當信解。速證菩提。菩薩亦應如是。要信解一切法與虛空等。及能證知。乃得無上菩提。若信解一切法皆與虛空等。便於菩提易生信解易證得者。則不應有恆沙菩薩擯大功德鎧而有退屈。

善現問言。色等與菩提有退屈不。離色等。有法於菩提有退屈不。色等真如於菩提有退屈不。離色等真如。有法於菩提有退屈不。舍利子一一答言。不也。善現語言。若一切法。諦故住故。都無所有。皆不可得。說何等法。可於菩提而有退屈。舍利子言。若爾。何故佛說三種住菩薩乘有情。但應說一。又應無三乘。但有一乘。

滿慈子語舍利子。應問許有一菩薩乘不。然後可難應無三乘建立差別。舍利子以問善現。善現語言。一切法真如中。為有三種住菩薩乘有情差別相不。為有三乘菩薩異不。為實有一定無退屈菩薩乘不。為實有一正等覺乘不。有一有二有三相不。為有一法或一菩薩而可得不。舍利子一一答言。不也。

善現語言。若一切法。諦故住故。都無所有。皆不可得。云何作是念言。如是菩薩。於無上菩提。定有退屈。定無退屈。及不決定。乃至如是為三。如是為一。若菩薩聞說如是諸法真如不可得相。其心不驚恐怖疑悔退沒。疾得無上菩提。佛讚印之。

菩薩住品第四十八

善現白佛。菩薩欲得菩提。當於何住。應云何住。佛言。當於一切有情。住平等心。起平等心。以平等心與語。起大慈心。大悲心。大喜心。大捨心。恭敬心。質直心。調柔心。利

益心。安樂心。無礙心。如父母兄弟姊妹男女親族心。朋友心。如親教師軌範師弟子同學心。如預流一來不還阿羅漢心。如獨覺心。如菩薩心。如如來心。應供養恭敬尊重讚歎心。應救濟憐愍覆護心。畢竟空無所有不可得心。空。無相。無願心。當於此住。

復次。應自離十惡。勸他離十惡。恆正稱揚離十惡法。歡喜讚歎離十惡者。應自修一切善。勸他修一切善。稱揚一切善法。讚歎修一切善者。應如是住。若如是學。如是安住。則於色等得無障礙。所以者何。從前際來。不攝受色等。何以故。色等不可攝受故。若色等不可攝受。則非色等。說是品時。萬二千菩薩。得無生法忍。

不退轉品第四十九

善現白佛。不退轉菩薩。有何行。有何狀。有何相。我等云何知。佛言。菩薩如實知異生地。二乘地。菩薩地。佛地。

於諸法真如中。無變異。無分別。皆無二無二分。雖如實悟入諸法真如。而於諸法真如無所分別。以無所得為方便故。聞真如與一切法無二無別。而無疑滯。以真如與一切法。不可說一異俱不俱故。是菩薩若無義利。終不發言。不觀視他好惡長短。平等憐愍。而為說法。

善現復白佛。以何行狀相。知是不退轉菩薩。佛言。能觀一切法無行狀相。是為不退轉菩薩。謂於色等退轉故。名不退轉。以色等自性無所有。菩薩於中不住。故名退轉。若不退轉菩薩。終不樂觀外道。於毗柰耶。終無疑惑。無戒禁取。不生三惡趣等。受行十善。恆修六度。通利十二分教。持法施善根。

與諸有情回向善提。於深法門。不生疑惑猶豫。都不見有色等。可於中生疑惑猶豫。成就柔潤三業。於諸有情。心無罣礙。決定不與五蓋共居。恆住正念正知。身心清淨。不貪四

事。雖受十二杜多功德。而無所恃。惡魔化現。不信不隨。決定不退一切善法。於色等想退轉。以自相空。觀一切法已入菩薩正性離生。乃至不見少法可得。無所造作。畢竟不生。故名無生法忍。得是忍故。名不退轉。

又答善現。是菩薩不復退墮二乘地中故。說不退轉故。名不退轉。遠離二乘地。於彼二地決定退捨故。說以退轉故。名不退轉。隨意能入十二門禪三十七品等。而不受其果。常不遠離大菩提心。不貴重色等。雖現攝受五欲。而不染著。不行邪命。

復有所餘諸行狀相。通達諸法。皆無所有。常不遠離大菩提心。不樂觀察論說色等。但樂觀察論說般若。常不遠離一切智智相應作意。修行施等。離慳貪等。雖住一切法空。而愛樂正法。不樂非法。雖住不可得空。而常稱讚不壞法性。饒益有情。雖住真如法界。而愛善友。不樂惡友。常樂見佛聞法。常

不遠離念佛聞法作意。生生之處。常不離佛。恆聞正法。護持正法。不惜身命。

巧方便品第五十

佛告善現。不退菩薩。成就廣大無量無邊。不可數。難思議。勝功德聚。住不共二乘智。引發四無礙解。又色等亦名甚深。色等真如甚深故。色等真如。非即色等。非離色等故。善現白佛。甚奇微妙方便。為不退菩薩遮遣色等。顯示涅槃。

佛印述云。菩薩應於如是諸甚深處。依深般若相應理趣。審諦思惟。稱量觀察。應作是念。我今應如所說而住。應如所說而學。則能攝取無數功德。超無量劫生死流轉。疾證菩提。若此功德有形量者。恆沙世界不能容受。

次以遠離般若所修得福。與依深般若所獲功德。重重較勝。善現白佛。分別所作。皆非實有。何緣是諸菩薩獲福無邊。佛言。菩薩行深般若。知一切種分別所作。空無所有。虛

妄不實。善學二十空。如如觀察。即不遠離甚深般若。獲福無數無量無邊。不可數在有為無為界中。不可量在去來現在法中。不可測度彼邊際故。復次。色等亦無數無量無邊。色等空故。

善現白佛。一切法空。即是無盡。亦是無數無量無邊。佛言。如是。善現復問。若不可說義無增無減。則布施等亦無增無減。云何菩薩修行施等。證得無上菩提。佛言。如是。菩薩不作是念。我於般若等若增若減。但作是念。唯有名想。謂為般若等。是菩薩修施等時。持此施等俱行作意。及依此起心及善根。與諸有情平等共有。回向菩提。如佛菩提微妙甚深而起回向。由此回向巧方便力。證得無上菩提。

善現白佛：何謂無上菩提。佛言。諸法真如是。又問。何謂諸法真如。佛言。色等真如是。諸法真如無增無減故。無上菩提亦無增無減。菩薩不離般若。常樂安住諸法真如。都不見

法有增有減。由此不可說義無增無減。施等乃至一切相智。亦無增無減。菩薩依止無增無減。方便修行般若。由此為門。集諸功德。便證無上菩提。

善現白佛。用初心證。用後心證。佛言。如然燈時。為初燄能焦炷。為後燄能焦炷。善現言。非初燄亦不離初燄。非後燄亦不離後燄。其炷實焦。佛言。菩薩亦爾。善現言。菩薩不作是念。我當壞相及壞相想。亦不作是念。我當壞無相及壞無相想。於一切種無分別故。是菩薩雖能離諸分別。而佛十力等未圓滿故。未證無上菩提。由此善巧方便力故。於一切法。不取不壞。知一切法自相空故。住一切法自相空中。為度有情。入三三摩地。大悲願力所牽逼故。用此三定。成熟有情。佛言。如是。

舍利子問菩薩。夢中入三三摩地。於深般若。有增益不。善現答言。晝時入三三摩地。於深般若。有增益者。彼夢中入亦有

增益。晝與夢中無差別故。乃至令與慈氏問答。

願行品第五十一

佛告善現。菩薩修行施等。見有情苦。作願勤修。速得圓滿鄰近菩提。又見有情三聚無別。墮三惡趣等。皆悉作願勤修六度。令速圓滿。

殞伽天品第五十二

授天女菩提記。

善學品第五十三

善現白佛。行深般若菩薩。云何修習近空三摩地等。云何入空三摩地等。佛言。應觀色等空。不令心亂。若心不亂。則不見法。若不見法。則不作證。善學諸法自相皆空。無法可增。無法可減。故於諸法不見不證。以勝義諦中。能證。所證。證處。證時。及由此證。若合若離。皆不可得不可見故。所菩薩觀法空時。先作是念。我為學故觀。不為證故觀。今是學

時。非為證時。是菩薩未入定位。繫心於所緣。已入定時。不繫心於境。不退六度二十空等。不證漏盡。

如堅翅鳥飛騰虛空。自在翱翔。久不墮地。雖依空戲。而不住空。亦不為空之所拘礙。又如善射。箭箭相承。不令墮落。次廣明不退轉相。及廣明魔惱亂相。又廣明傲慢餘菩薩罪。申明菩薩真遠離行。並示菩薩真勝善友。勸諸菩薩當學般若。於此經中廣說菩薩所應修學一切法相。

善現白佛。般若以何為相。佛言。以虛空為相。無相為相。諸法諸相。皆不可得。無所有故。又有因緣故。可說般若所有妙相。諸法亦有如是妙相。所以者何。般若以性空為相。諸法亦以性空為相。般若以遠離為相。諸法亦以遠離為相。以一切法皆自性空。離眾相故。

善現白佛。則一切法。一切法空。亦一切法。一切法離。云何有情可施設有雜染清淨。佛言。有情長夜有我我所心。

執我我所不。答言。如是。佛言。彼心所執我及我所。空遠離不。答言。如是。佛言。豈不有情。由我我所執。流轉生死。答言。如是。佛言。如有情流轉生死。由有雜染。以是證知。雜染可得。若諸有情。無心執著我及我所。則無雜染。若無雜染。是則應無流轉生死。流轉生死既現可得。應知有雜染法。既有雜染。亦有清淨。是故應知有情雖自性空。遠離眾相。而有雜染清淨可得。

善現白佛。菩薩若如是行。則不行色等。佛言。如是。乃復廣較宣說般若相應作意功德。當知已到福田彼岸。一切有情無能及者。雖於有情平等發起大慈悲等。而於一切無所執著。

斷分別品第五十四

善現白佛。一切作意。皆自性離自性空。諸法亦爾。云何菩薩不離般若相應作意。不離一切智智相應作意。佛言。如是離空。非二乘菩薩佛作。亦非餘作。然一切法。法住法定等。

法爾常住。是菩薩不離般若相應作意。亦不離一切智智相應作意。何以故。甚深般若一切智智。及諸作意。皆自性離自性空故。如是離空。無增無減。能正通達。名不離故。

善現復問。云何修證般若平等性已。證得無上菩提。佛言。非諸佛法有增有減。亦非一切法住法定等有增有減。以甚深般若非一非二。非三非四。亦非多故。善現復問。為即深般若。空虛非有。不自在性。不堅實性。能行般若不。為離深般若。空虛非有。不自在性。不堅實性。有法可得能行般若不。為即深般若能行般若不。為離深般若能行般若不。為即空性能行空不。為離空性能行空不。為即色等能行般若不。為離色等能行般若不。

佛一一答言。不也。色等空虛非有。不自在性。不堅實性。若即若離。廣作問答亦如是。色等真如。乃至不思議界。若即若離。廣作問答亦如是。善現白佛。若如是諸法。皆不能

行般若。云何菩薩能行般若。佛言。汝見有法。能行般若不。汝見般若。是菩薩所行處不。汝所不見法。是法可得。不可得法。有生滅不。善現一一答言。不也。佛言。如汝所見諸法實性。即是菩薩無生法忍。成就是忍。便為如來授菩提記。

善現復問。菩薩以一切法無生性得記不。以一切法生性得記不。以一切法生無生性得記不。以一切法非生非無生性得記不。佛皆答言。不也。善現白佛。云何菩薩得不退記。佛言。汝見有法得佛記不。善現答言。不也。佛言。如是。菩薩於一切法無所得時。不作是念。我於菩提當能證得。我用是法證得菩提。我由此法。於如是時。如是處證得菩提。所以者何。無分別故。

巧便學品第五十五

帝釋白佛。若於般若聽受修行。正為他說。乃至菩提。不雜諸餘心心所者。當知必不成就微少善根。佛印述較勝已。帝

釋為一苾芻。復廣較勝。兼為阿難明是佛威神力。佛言。般若功德非人天等所能知故。次為阿難分別有擾亂不擾亂相。及明出罪還補善法。或無或有差別。深囑菩薩。於有情類。不應發起瞋忿等心。亦不應生麤惡言說。次答阿難菩薩與菩薩共住之問。

善現白佛。云何菩薩平等性。而諸菩薩於中學故。名平等學。佛言。內空等是平等性。復次色等。色等自性空。是平等性。菩薩於中學故。名平等學。善現復問。為色等盡故學。離故學。滅故學。無生故學。無滅故學。本來寂靜故學。自性涅槃故學。是學一切智智不。

如是廣問竟。佛言。如汝所說。於意云何。色等真如盡滅斷不。答言。不也。佛言。若菩薩於真如如是學。是學一切智智。當知真如無盡。無滅。無斷。不可作證。一一述答亦爾。復次如是學時。是學施等。乃至是學無上菩提。若學施等。是

學一切智智。至一切學圓滿彼岸。

善現白佛。若一切法本性清淨。云何菩薩於諸法中復得清淨。佛言。如是諸法。本來自性清淨。菩薩於中。精勤修學甚深般若。如實通達。無沒無滯。遠離一切煩惱染著。故說菩薩復得清淨。復次雖一切法本性清淨。而諸異生不知見覺。菩薩欲令彼知見覺。修行布施等。安住內空等。如是學時。於佛十力等無量佛法。皆得清淨。不墮二地。於諸有情心行差別。皆能通達至極彼岸。善巧方便。令諸有情證一切法本性清淨。

如是修學。終不發起慳貪破戒等心。終不發起執取色相等相應之心。何以故。都不見法是可得者。無所得故。不起執取色等法相相應之心。修學如是般若。無有一切功德善根而不能得。

願喻品第五十六

帝釋心念歎勝。佛讚印之。散華發願。問隨喜福。佛答不

可數知。

善現白佛。云何菩薩以如幻心。能證無上菩提。佛言。汝見如幻心不。答言。不也。佛言。若處無幻。無如幻心。汝見有是心。能證菩提不。答言。不也。佛言。若處離幻。離如幻心。汝見有是法。

能證菩提不。答言。不也。我都不見即離心法。說何等法。是有是無。以一切法畢竟離故。若法畢竟離。是法不應修。亦不應壞。亦不應引。般若畢竟離故。不應能引。云何離法能證離法。

佛言。善哉。以般若等畢竟離故。菩薩可得無上菩提。若般若等非畢竟離。應非般若等。以般若等畢竟離故。名為般若等。是故菩薩非不依般若。能證無上菩提。雖非離法能證離法。而證菩提。非不依止甚深般若。是故菩薩欲得菩提。應學般若。

善現白佛。菩薩所行法義。極為甚深。佛言。如是。菩薩能為難事。行甚深義而不作證。善現白言。菩薩所作不難。所以者何。所證法義。能證般若。證法。證者。證處。證時。都不可得。譬如虛空。幻士。影像。如來。變化。機關。於一切法。無分別故。

舍利子問。但般若無分別耶。善現答言。靜慮等亦無分別。舍利子問。色等亦無分別耶。善現印答。舍利子問。若一切法皆無分別。云何有五趣差別。云何復有三乘位異。

善現言。有情顛倒煩惱因緣造種種業。感異熟果。依此施設五趣差別。無分別故有。修預流及預流果等三乘聖位。去來現在如來。由無分別。分別斷故。可施設有。由此因緣。知一切法皆無分別。以無分別真如法界法性實際為定量故。菩薩應行如是無分別相般若。便能證得無分別相所求菩提。

堅等讚品第五十七

舍利子問。菩薩行深般若。為行堅實法。無堅實法耶。善現答言。行無堅實法。般若等無堅實故。尚不見無堅實可得。況見有堅實可得。諸天作念。若人發心如深般若義行。不墮二地。甚為希有。應當敬禮。

善現告言。是未希有。若菩薩知一切法及諸有情皆不可得。而發心擐功德鎧。度令究竟涅槃。乃甚希有。如調伏虛空。如與虛空戰。何以故。色等離。故有情離。復次。色等離。故施等離。若菩薩聞說諸法無不遠離。心不沈沒驚怖憂悔。是為行深般若。

佛言。何因緣故。菩薩於深般若。心不沈沒。善現言。以一切法。皆非有故。皆遠離故。皆寂靜故。無所有故。無生滅故。觀一切法。皆不可得。不可施設是能沈沒。是所沈沒。是沈沒時。是沈沒處。是沈沒者。由此沈沒。若能如是行深般若。

若。釋梵禮敬。

佛言。非但釋梵。亦為淨居諸天禮敬。亦為十方佛所護念。則令一切功德圓滿。一切惡魔不能沮壞。以成就二法故。一觀諸法皆畢竟空。二不棄捨一切有情。又一如所言皆悉能作。二為諸佛常所護念。若菩薩聞說般若。心無疑惑。深生淨信。當於不動佛所。及諸菩薩所。廣聞其義。信解不退。證得一切智智。

善現白佛。諸法實性。皆不可得。云何安住真如。精勤修學。疾證菩提。佛言。如佛所化。安住真如。修菩薩行。疾證菩提。宣說正法。菩薩亦復如是。

帝釋白佛。般若極難信解。菩薩甚為難事。觀一切法。都無所有。於深法性。無疑無滯。善現語言。菩薩觀一切法。無不皆空。都無所有。誰沈誰沒。誰怖誰驚。誰疑誰滯。未為希有。帝釋白言。如箭射空。近遠無礙。尊者所說亦復如是。

囑累品第五十八

帝釋白佛。讚善現所說。無不依空等。佛告帝釋。善現安住空故。觀施等尚不可得。況有行施等者。善現於一切法。住遠離住。寂靜住。無所得住。空住。無相住。無願住。如是等無量勝住。比菩薩所住般若最勝行住。乃至鄒波尼殺曇分。所不及一。於是諸天散華。六千苾芻得菩提記。同名散華如來。佛語慶喜。雖種三乘善根。要於甚深般若。修行六度。安住二十空等。令得圓滿。是故我以般若付囑於汝。忘失餘法。其罪猶小。忘失般若。其罪甚大。乃至種種讚說付囑。令受持已。復現神力。令眾皆見不動如來海會說法。彼土莊嚴。佛攝神力。眾忽不見。

佛告慶喜。如彼佛土。非此土眼所行境界。一切法亦如是。皆非眼根之所行境。法不行法。法不見法。法不知法。一切法無行者。無見者。無知者。無動無作。能取所取。性遠離

故。能所思議。性遠離故。如幻事等。眾緣和合。相似有故。無作受者。妄現似有。無堅實故。若如是知如是見如是行者。是行般若。亦不執著此諸法相。如是學時。於諸學中為最。為勝。為長。為尊。為妙。為微妙。為上。為無上。諸有欲取般若量邊際者。如愚欲取虛空量及邊際。

慶喜白佛。何故般若無量。佛言。性無盡故。性遠離故。性寂靜故。如實際故。如虛空故。三世諸佛皆學般若。證得菩提。宣說開示。而此般若。亦無有盡。已不盡。今不盡。當不盡。靜慮等一一皆爾。內空等一一皆爾。所以者何。此等諸法。無生無滅。亦無住異。云何可得施設有盡。佛復出廣長舌。明無虛妄。若能受持般若陀羅尼者。則為總持一切佛法。

無盡品第五十九

善現問佛。般若為無盡不。佛言。實為無盡。猶如虛空。不可盡故。復問。云何應引般若。佛言。色等無盡故。應引般

若。復次色等虛空無盡故。應引般若。復次觀無明等如虛空無盡故。應引般若。

如是觀察十二緣起。遠離二邊。是諸菩薩不共妙觀。不見有法無因而生。不見有法無因而滅。不見有法常住不滅。不見有法有我有情等。不見有法若常若無常。若樂若苦。若我若無我。若淨若不淨。若寂靜若不寂靜。若遠離若不遠離。是菩薩雖行般若等。而不見有所行。亦不見有法能見所行。以無所得而為方便。修行如是般若。一切魔大愁惱。次答善現。菩薩能正修行般若。便能具足修滿六波羅密。

相引攝品第六十

善現白佛。云何安住布施。引攝淨戒等五。乃至安住般若。引攝布施等五。佛廣答之。

多問不二品第六十一

善現白佛。如是菩薩。發心幾時。乃至植幾善根。佛言。

發心甚久。善根無不圓滿。如是般若。如日月輪。照餘五度。如有七寶。乃名輪王。如強夫守護美女。如軍將善備鎧杖。如小王朝侍輪王。如水隨恆河入海。如右手能作眾事。如大海同一鹹味。如聖王輪。最居先導而無分別。何以故。波羅密多。及一切法。自性皆鈍。無所能為。虛妄不實空無所有不自在相。譬如陽燄。光影。水月。鏡中像等。其中都無分別作用。真實自體。

善現白佛。若一切法自性皆空。云何菩薩勤修六度。當得菩提。佛言。菩薩恆作是念。有情心皆顛倒。沒生死苦。我若不修善巧方便。不能解脫彼苦。作是念已。捨內外物。捨已。復作思惟。我於此物。都無所捨。此內外物。自性皆空。非關於我。不可捨故。又復為諸有情。終不犯戒。不起瞋恨。常無懈怠。不起亂心。修學勝慧。由此觀察修行六度。速得圓滿。疾證菩提。

善現白佛。若六度無差別相。皆是般若所攝受故。皆由般若修成滿故。應合成一波羅密多。云何可說般若於布施等。為最。為勝。及無上等。佛言。如諸有情。種種相別。若近妙高山王。咸同一色。善現復問。波羅密多及一切法。若隨實義。皆無此彼勝劣差別。何緣故說般若最勝。

佛言。但依世俗言說作用。說有此彼勝劣差別。施設六度。度脫有情世俗作用生老病死。然諸有情生老病死。皆非實有。但假施設。所以者何。有情無故。當知諸法亦無所有。甚深般若。了達一切都無所有。能拔有情世俗作用生老病死。由此故說般若最勝。

善現白佛。般若於諸善法。有取捨不。佛言。無取無捨。以一切法。皆不可取不可捨故。謂於色等無取無捨。善現復問。般若云何於色等無取無捨。佛言。般若不思惟色等。如是於色等無取無捨。善現復問。般若云何不思惟色等。佛言。般

若於色等。不思惟一切相。亦不思惟一切所緣。如是不思惟色等。

善現復問。若菩薩不思惟色等。云何增長所種善根。云何圓滿波羅密多。云何能得一切智智。佛言。若時菩薩不思惟色等。是時便能增長所種善根。便能圓滿波羅密多。便能證得一切智智。所以者何。要不思惟色等。乃能具足修菩薩行。證得無上菩提。善現復問。何緣要不思惟色等。乃能具足修菩薩行。證得菩提。佛言。若思惟色等。則染著欲界色無色界。不能具足修菩薩行。證得菩提。若不思惟色等。則不染著三界。則能具足修行。證得菩提。

善現復問。菩薩勤學般若。當於何住。佛言。不應住色。乃至不應住諸佛無上菩提。又問。何緣不應住色等。佛言。於一切法無執著故。不應住色等。是菩薩不見有法可於其中而起執著及安住故。如是以無執著及無安住而為方便。行深般若波

羅密多。

復次。若作是念。能如是無所執著安住行深般若。是行般若。能如是無所執著安住修深般若。是修般若。我應如是行。如是修。由如是念。取相執著。遠離般若。亦遠離靜慮等。乃至遠離無上菩提。何以故。甚深般若。於一切法無所執著。非深般若若有執著性。所以者何。甚深般若。都無自性。可於諸法有所執著。是故菩薩修行般若。於一切法及深般若。皆無執著。

復次。若起是想。此是般若。我行般若。則是徧行諸法實相。菩薩由起此想。便退般若。亦退靜慮等。何以故。般若是一切種白法根本。若退般若。則為退失一切白法。復次。若作是念。般若徧能攝受六度二十空等。則退失般若。亦不能攝受六度二十空等。何以故。非離般若。能徧攝受殊勝善法。及證菩提。

復次。若作是念。安住般若。便於菩提定得受記。則為退失般若。不得受記。復次。若作是念。安住般若。則徧引發布施等。亦徧安住內空等。則退失般若。不能引發布施等。不能安住內空等。復次。若作是念。佛知諸法無攝受相。自證菩提。得菩提已。為諸有情宣示諸法實相。則為退失般若。何以故。如來於法。無知無覺。無說無示。以諸法實相。不可知覺。不可施設。云何得有知覺說示一切法者。若言實有知覺說示一切法者。無有是處。

善現白佛。云何遠離種種過失。佛言。若作是念。諸法無所有。不可取。無有能現等覺者。亦無有能宣說開示。若如是行。是行般若。離諸過失。若著無所有不可取法。則離般若。何以故。甚深般若。於一切法無所執著。無所攝受。

善現白佛。般若於般若。為遠離為不遠離。乃至三智於三智。為遠離為不遠離。若般若於般若等。設遠離設不遠離。云

何能無執著引發般若等。（內空等。則云安住。）佛言。非遠離非不遠離。是故能無執著。引發安住。何以故。非即自性。非離自性。而能安住引發自性。

復次。菩薩行深般若時。不執著色等。謂此是色等。此色等屬彼。於如是一切法無執著故。便能引發般若等。安住內空等。若於諸法中有所執著。謂此是法。此法屬彼。則不能隨意引發安住殊勝功德。復次。菩薩行深般若時。不觀色等若常若無常。乃至若遠離若不遠離。便能引發安住殊勝功德。復次。若行深般若。則為行靜慮。乃至行一切相智。復次。甚深般若。隨所行處。餘善皆從。隨所至處。餘善皆至。如四軍隨輪王。又般若如善御者。御餘善法。行於正道。至一切智智。

善現白佛。云何為道。云何非道。佛言。諸異生道。聲聞道。獨覺道。非菩薩道。自利利他道。一切智智道。不住生死及涅槃道。是菩薩道。甚深般若。能為大事示現道非道相。令

菩薩知。速證一切智智。復次。能為大事度諸有情。皆獲利益安樂。雖作無邊利樂他事。而於此事無所取著。雖能示現色等所作事。而無取著。引導菩薩。令趣菩提。定不退轉。而於諸法。無起無滅。以法住性為定量故。

善現白佛。若深般若。於一切法無起無滅。云何菩薩應修六度。佛言。菩薩應緣一切智智。為諸有情而修施等。持此善根。與諸有情平等共有。回向菩提。於回向時。遠離三心。謂誰回向。用何回向。回向何處。是菩薩持此善根。如是回向菩提。則修六度四等。速得圓滿。疾得一切智智。

善現白佛。云何能與六度常共相應。不相捨離。佛言。如實觀色等非相應非不相應。是能與六度常共相應。不相捨離。復次。恆作是念。我不應住色等。以色等非能住非所住故。是能與六度相應不離。善現白佛。菩薩應於般若常勤學耶。佛言。如是。般若如大海。是諸善法生長方便所趣向門。三乘皆

當勤學。

菩薩於般若勤修學時。應勤修學布施等。應勤安住內空等。如善射人。甲冑堅固。執好弓箭。不懼怨敵。菩薩亦是。攝受般若及靜慮等諸功德時。皆以般若而為方便。一切魔外皆不能伏。便為三世諸佛護念。以能行布施。乃至能行一切相智故。

善現復問。云何行布施等。便為諸佛護念。佛言。行施等時。觀施等不可得故。為佛護念。復次。三世諸佛如色等不可得故。護念是菩薩。復次。三世諸佛不以色等故。護念是菩薩。善現白佛。菩薩雖多處學。而無所學。佛言。如是。實無有法。可令菩薩於中學故。善現復言。佛為菩薩。或略或廣宣說六度相應之法。若欲證菩提。皆應聽受讀誦通利。如理思惟。審正觀察。心心所法。於所緣相。皆不復轉。佛言。如是。

又問。云何於一切法。如實了知略廣之相。佛言。若如實了知色等真如相。是於一切法知略廣相。又問。云何色等真如相。菩薩如實了知而於中學。於一切法知略廣相。佛言。色等真如無生無滅。亦無住異而可施設。菩薩如實了知。當於中學。於一切法。如實了知略廣之相。乃至無上菩提。一一問答亦爾。復次。如實了知色等實際相。是於一切法。如實了知略廣之相。

善現白佛。云何色實際相。佛言。無色際是名色實際相。乃至無上菩提。一一問答亦爾。復次。如實了知色等法界相。是於一切法。如實了知略廣之相。善現白佛。云何色法界相。佛言。色界虛空界。是名色法界。此色法界無斷無別而可施設。是名色法界相。乃至無上菩提。一一問答亦爾。

善現又問。復云何應知一切法略廣相。佛言。如實了知一切法不合不散。當知一切法略廣相。謂色等皆不合不散。何以

故。如是諸法。皆無自性。則無所有。則不可說有合有散。於一切法如是了知。則能了知略廣之相。善現白佛。如是名為略攝六度。若於中學。能多所作。初修業。乃至十住地。皆應於中學。學此略攝波羅密多。於一切法知廣略相。

佛言。如是。如是法門。利根能入。中根亦能入。定根能入。不定根亦能入。若專於中學。無不能入。非懈怠等之所能入。若如所說而學。能隨證得六度二十空等。福聚甚多。善知所緣門。善知行相門。善知字門。善知非字門。善知言。不言。一增語。二增語。乃至善知界。善知非界。又善知色等作意。又善知色等色等相空。又善知止息道。不止息道。生滅住異。乃至善知安立三乘方便。

善現白佛。菩薩云何當行般若。當引般若。當修般若。佛言。觀色等乃至老死寂靜故。可破故。不自在故。體虛妄故。不堅實故。應行般若。又如引虛空。應引般若。如修虛空。應

修般若。又問。為經幾時當行。當引。當修。佛言。從初發心。乃至坐菩提座。應行。應引。應修。又問。住何等心。無間當行引修。佛言。從初發心。乃至菩提。不容發起諸餘作意。唯常安住一切智智相應作意。應行引修般若。如是行引修般若。乃至能令心心所法。於境不轉。

又問。菩薩行引修般若。當得一切智智不。不行。不引。不修般若。當得一切智智不。亦行亦不行般若等。當得一切智智不。非行非不行般若等。當得一切智智不。佛一一答言。不也。又問。若爾。菩薩云何當得一切智智。佛言。如真如。云何真如。如實際。云何實際。如法界。云何法界。如我界。乃至補特伽羅界。云何如我界等。佛言。若我若有情等。為可得。善現言。不也。佛言。若我等不可得。云何可施設我界等。若菩薩不施設般若。亦不施設一切智智。及一切法。定得一切智智。

善現又問。為但般若不可施設。為靜慮等亦不可施設耶。佛言。一切法皆不可施設。又問。云何可施設是地獄。是傍生。乃至是諸佛。是一切法耶。佛言。有情施設。及法施設。實可得。善現言。不也。佛言。菩薩行般若時。應學一切法皆不可施設。善現又問。豈不應於色等學。佛言。應於色等學。不增不減。

又問。云何應於色等學。不增不減。佛言。應於色等不生不滅故學。又問。云何應於色等不生不滅故學。佛言。應於色等不起作諸行若有若無故學。又問。云何應於色等不起作諸行若有若無故學。佛言。應觀諸法自相皆空故學。如是應於色等不起作諸行若有若無故學。

又問。云何應觀諸法自相皆空故學。佛言。應觀色等色等相空故學。又問。若色等色等相空。云何菩薩當行般若。佛言。由此般若不可得。菩薩不可得。行亦不可得。若能行者。

若由此行。若所行處。皆不可得。是故都無所行。是行般若。以於其中一切戲論不可得故。

又問。初修業菩薩。云何當行。佛言。從初發心。應於一切法常學無所得。修施等時。以無所得而為方便。應住內空等時。以無所得而為方便。應住內空等。又問。云何名有所得。云何名無所得。佛言。諸有二者。名有所得。諸無二者。名無所得。諸眼諸色為二。乃至諸菩提諸佛為二。如是一切有戲論者。皆名有二。非眼非色為無二。乃至非菩提非諸佛為無二。如是一切離戲論者。皆名無二。

又答善現。非由有所得故無所得。亦非由無所得故無所得。然有所得無所得平等性。是名無所得。菩薩於有所得無所得平等性中。應勤修學。如是學時。名學般若無所得義。離諸過失。

善現白佛。若不著有所得。不著無所得。云何從一地至一

地。漸次圓滿。佛言。非住有所得中。能從一地至一地。亦非住無所得中。能從一地至一地。何以故。般若無所得故。菩提無所得故。行者。行處。行時。無所得故。此無所得法。亦無所得故。應當如是修行般若。

又問。若般若等俱不可得。云何菩薩修行般若時。於一切法常樂決擇。謂此是色等。佛言。雖於諸法常樂決擇。而不得色等。又問。若不得色等。云何能圓滿六度。入正性離生位。嚴淨佛土。成熟有情。得一切智智。轉法輪。作佛事。解脫有情生死眾苦。令證涅槃。佛言。菩薩不為色等故修行般若。又問。為何事故修行般若。佛言。無所為故。以一切法無所為。無所作。應以無所為無所作而為方便。修行般若。

又問。若一切法。皆無所為無所作。不應安立三乘差別。佛言。非無所為無所作法安立可得。要有所為有所作法安立可得。所以者何。愚夫異生。執著色等。由執著故。念色得色。

乃至念菩提得菩提。作如是念。色等實可得。我當決定證得菩提。脫諸有情生死眾苦。令獲究竟常樂涅槃。是諸愚夫無聞異生。顛倒因緣。作如是念。則為謗佛。何以故。佛以五眼求色等尚不可得。若有決定當得菩提。及脫有情生死。令獲涅槃。無有是處。

又問。若諸如來。皆以五眼求色等不可得故。諸有情類亦不可得。則定無有證得菩提。及脫有情生死。令獲涅槃。云何世尊證得菩提。安立有情。三聚差別。佛言。我以五眼如實觀察。決定無我能證菩提。安立有情。三聚差別。然諸有情。愚癡顛倒。於非實法。起實法想。於非實有情。起實有情想。我為遣除彼虛妄執。依世俗說。不依勝義。

善現復問。為住勝義證得菩提耶。為住顛倒證得菩提耶。將無世尊不證菩提耶。佛皆言。不也。我雖證得菩提。然不住有為界。亦不住無為界。如諸如來所變化者。雖不住有為無為

界。然有去來坐立等事。亦行布施等。亦住內空等。如來亦爾。知一切法皆如變化。說一切法皆如變化。雖有所作。而無真實。雖度有情。而無所度。如所化者。度化有情。如是菩薩修行般若。應如佛所化者。雖有所為而無執著。

次引過去善寂慧佛。留化半劫。作諸佛事。應信諸法皆如變化。次明佛身由法性故。作淨福田。化佛亦爾。由法性故。作淨福田。供佛供化。福皆無盡。慈敬憶念。散華稱名。善根亦皆無盡。菩薩應以諸法法性而為定量。修行般若善巧方便。入諸法法性已。而於諸法不壞法性。謂不分別此是般若。此是般若法性等。

善現白佛。云何如來自壞諸法法性。謂佛常說此是色等。乃至此是有為法。此是無為法。佛言。我不自壞諸法法性。但以名相方便。假說諸法法性。令諸有情得悟諸法法性無差別理。又問。云何佛於無名無相法。以名相說。令他悟入耶。佛

言。我隨世俗假立名相。方便宣說諸法法性。而無執著。如諸愚夫。聞說苦等。執著名相。不知假說。佛及弟子。如實知隨世俗說。無有真實諸法名相。菩薩住一切法但假名相。應行般若。而於其中不應住著。

善現又問。若一切法但有名相。菩薩為何事故。發菩提心。勤苦修行。佛言。以一切法但有名相。但假施設。名相性空。諸有情類顛倒執著。生死不脫。是故菩薩發心行行。證得一切相智。以三乘法。度脫令出生死。入涅槃界。而諸名相無生無滅。亦無住異施設可得。

又問。三智有何差別。佛言。一切智。共二乘。道相智。共菩薩。一切相智。是如來不共妙智。一切智者。謂蘊處界等。二乘亦能了知。而不能知一切道相及一切法一切種相。菩薩應學徧知一切道相。雖令此道作所應作。而不令其證於實際。知一切法皆同一相。謂寂滅相。故名一切相智。

復次。諸行狀相能表諸法。如來如實能徧覺知。故名一切相智。又問。道與涅槃。俱無自性。佛何故說此是預流。乃至此是如來。佛言。如是一切。無為所顯。又問。無為法中。實有預流乃至如來差別義不。佛言。我依世俗言說顯示。不依勝義。非勝義中有語言路。或分別慧。或復二種。然彼彼邊斷。立彼彼後際。

又問。既一切法自相皆空。前際尚無。況有後際。佛言。如是。然諸有情。不解諸法自相皆空。為饒益彼。方便為說此是前際。此是後際。然一切法自相空中。前際後際俱不可得。菩薩達一切法自相空已。修行般若。無所執著。

次達般若波羅密多名義。次明行般若甚深義趣。應作是念。我不應行貪等義非義。我不應行色等義非義。所以者何。如來得菩提時。不見有法。能與少法為義非義。如來出世。若不出世。諸法法性。法住。法定。法爾常住。無法於法為義非

義。如是菩薩應離義非義。常行般若甚深義趣。

實說品第六十二

佛答善現。譬如良田種樹。是人雖復不見此樹根莖枝葉華果受者。而種樹已。溉灌守護。漸得生長。眾人受用。愈疾獲安。菩薩亦復如是。

雖不見有有情佛果。而為有情求趣菩提。修六度滿。證得菩提。令諸有情受用佛樹。葉饒益者。脫惡趣苦。華饒益者。生人天中。果饒益者。住三乘果。是諸有情得成佛已。復用佛樹枝葉華果饒益有情。雖作如是大饒益事。而都不見真實有情得涅槃者。唯見妄想眾苦寂滅。如是菩薩修行般若。不得有情及彼施設。然為除彼我執顛倒。求趣菩提。甚為難事。

善現白佛。當知菩薩。即是如來。佛言。如是。若無菩薩。則無三世諸佛。亦無三乘。亦無有能永斷三界。若由此真如施設如來。即由此真如施設獨覺。乃至施設色等及一切法。

如是一切法真如。一切有情真如。一切如來真如。一切菩薩真如。實皆無異。故名真如。菩薩於此真如修學圓滿。證得菩提。故名如來。

如是菩薩應學真如甚深般若。若學真如甚深般若。則能學一切法真如。則能圓滿一切法真如。則於一切法真如得自在。則能善知有情根性勝劣。則能具知有情勝解差別。則知有情自業受果。則能具足願智。則能淨修三世妙智。則能無倒行菩薩行。則能如實成熟有情。則能如實嚴淨佛土。則能證得一切智智。則能轉妙法輪。則能安立有情於三乘道。則令有情入涅槃界。

菩薩見是自利利他一切功德。應發無上覺心。勇猛精修般若。堅固無退。次較福勝。次問初發心菩薩。何所思惟。佛言。恆正思惟一切相智。無性為性。無性為所緣。正念為增上。寂靜為行相。無相為相。又問。為色等亦無性為性。佛印

述之。

又問。何緣一切相智無性為性。色等亦無性為性。佛言。一切相智自性無故。若法自性無。是法無性為性。色等亦爾。又問。何緣一切相智自性無。佛言。無和合自性故。若法無和合自性。是法則以無性為性。色等一一問答亦爾。復次。一切法皆以空無相無願為自性。皆以真如法界等為自性。

善現白佛。若一切法皆以無性為自性者。初發心菩薩。成就何等善巧方便。能行布施等。能住內空等。成熟有情。嚴淨佛土。佛言。謂雖修學知一切法皆以無性為其自性。而常精勤成熟有情。嚴淨佛土。雖常精勤成熟有情。嚴淨佛土。而勤修學知諸有情及諸佛土。皆以無性為其自性。是菩薩雖行布施等。住內空等。學菩提道。而知菩提道。無性為自性。如是修行布施等。安住內空等。學菩提道。乃至未得如來十力等。皆名學菩提道未得圓滿。

若於此道已得圓滿。則於一切波羅密多亦已圓滿。由一剎那相應妙慧。證得如來一切相智。以無障礙清淨佛眼。徧觀十方三界諸法。尚不得無。況當得有。如是菩薩最勝善巧方便。謂行般若。觀一切法尚不得無。況當得有。常作是念。諸法皆以無性為性。如是無性。本性自爾。非佛等所作。以一切法皆無作者。離作者故。

善現白佛。一切法皆無知為性。云何菩薩修行般若。顯示諸法若有若無。佛言。隨世俗故顯示。非隨勝義。又問。世俗勝義為有異不。佛言。不也。世俗真如。即是勝義顛倒妄執。於此真如不知不見。哀愍彼故。隨世俗相。顯示諸法若有若無。復次。有情於蘊等法起實有想。菩薩哀愍彼故。分別諸法若有若無。令知皆非實有。

巧便行品第六十三

善現白佛。當於何處行菩薩行。佛言。當於色等空行菩薩

行。如佛菩提。於諸法中不作二相。次答佛陀名義。菩提名義。次問行布施等時。住內空等時。於何等法為益為損。為增為減。為生為滅。為染為淨。佛言。菩薩為菩提故。行布施等時。住內空等時。於一切法無益無損。乃至無染無淨。

又問。若為菩提行深般若。於一切法都無所緣而為方便。不為益。不為損。乃至不為染。不為淨故。現在前者。云何攝受六度二十空等。佛言。不以二故。攝受施等。乃至不以二故。證得菩提。又問。若不以二故。攝受施等。云何從初發心。乃至最後心起。於一切時。善法增長。佛言。若以二故行。則諸善法不得增長。行不二故。善根堅固。不可制伏。次明若不敬供諸佛。不能圓滿善根。不得善友攝受者。不能證得一切智智。又雖敬供佛等。遠離方便善巧力故。猶不能證一切智智。因即廣明方便善巧修行六度之相。及修一切善法之相。

徧學道品第六十四

佛告善現。菩薩能於色等無性自性無動。善現問言。有性法能現證無性不。無性法能現證有性不。有性法能現證有性不。無性法能現證無性不。佛皆答言。不也。又問。將無世尊不得現觀。佛言。有得現觀。然離四句。非有非無。絕諸戲論。乃名現觀。得亦如是。

又問。何為戲論。佛言。觀色等若常無常。乃至若是所徧知。若非所徧知。是為戲論。復次。若作是念。苦應徧知。集應永斷。滅應作證。道應修習。應修四靜慮等。應超預流果等。應行布施等。應住內空等。應趨入正性離生。應圓滿十地正行。應成熟有情。應嚴淨佛土。應起佛十力等。應斷煩惱習氣。應證無上菩提。是為戲論。

復次。菩薩行深般若時。應觀色等若常若無常等。不可戲論故。不應戲論。復次。觀苦聖諦。若應徧知。若不應徧知。

不可戲論故。不應戲論。以一切法有性不能戲論有性。無性不能戲論無性。有性不能戲論無性。無性不能戲論有性。離有無性。法不可得。若能戲論。若所戲論。若戲論處。都無所有。是故色無戲論。乃至佛菩提無戲論。菩薩應行無戲論甚深般若。

善現白佛。云何觀一切法皆無戲論。佛言。觀色等無自性。若法無自性。則不應戲論。是故色等無戲論。又問。菩薩用何等道。得入正性離生。佛言。非用聲聞道。非用獨覺道。非用佛道。然於一切道先徧學已。用菩薩道而入正性離生。謂菩薩從初發心。勇猛勤修六度。以勝智見。超過靜觀。至獨覺等八地。用道相智而入正性離生。復用一切相智。永斷習氣。入如來地。乃成一切智智。是菩薩所學第八。乃至獨覺若智若斷。皆是菩薩摩訶薩忍。

又問。云何當起一切淨道相智。佛言。若諸行狀相。能顯

發起淨道相智。菩薩徧現等覺。如實為他宣示施設。令諸有情得無倒解。趣向利樂。菩薩應於音聲語言。皆得善巧。徧為有情說法。令所聞皆如谷響。雖有解了。而無執著。應如實知有情隨眠意樂種種差別。應如實知六道因果。隨其所應。遮障彼道及彼因果。應如實知三十七品。乃至三智。三乘道及因果。以如是道。安立有情。

善現白佛。若一切種菩提分法及諸菩提。皆非相應。非不相應。無合。無散。無色。無見。無對。一相。所謂無相。云何如是菩提分法。能取菩提。譬如虛空。於一切法無取無捨。自相空故。諸法亦爾。自相皆空。非於餘法有取有捨。佛言。如是如是。然諸有情於一切法自相空義。不能解了。哀愍彼故。方便宣說菩提分法能取菩提。

復次。若色等一切法。於聖法毘奈耶中。皆非相應非不相應。乃至一相無相。佛為饒益有情。令得正解。入法實相。以

世俗說。非以勝義。菩薩於二乘法。學智見已。如實通達。不應攝受。於一切智智相應諸法。學智見已。如實通達一切種相。應可攝受。

善現又問。若菩薩不於如是諸法相學。亦應不於諸行相學。既不能學。云何能超二地。乃至以三乘法安立有情。令脫眾苦。佛言。若一切法實有相者。菩薩應於中學。以一切法實非有相。無色。無見。無對。一相。所謂無相。是故不於有相法學。亦不於無相法學。

又問。若爾。云何菩薩能修般若。超二乘地。乃至安立有情。佛言。如汝所說。一切法非有相。非無相。非一相。非異相。若菩薩知一切法若有相。若無相。若一相。若異相。咸同一相。所謂無相。修此無相。是修般若。又問。云何修此無相。是修般若。佛言。若修遣色等。亦遣此修。是修般若。又問。云何修遣色等。亦遣此修。佛言。若念有色等。有遣此

修。非修般若。何以故。非有想者能修般若。是故修遣色等。亦遣此修。是修般若。

復次。住有想者。若修布施等。若住內空等。必當執有我及我所。便著二邊。不解脫生死。無道。無涅槃。云何如實能修布施等。能住內空等。又問。何等是有。何等是非有。佛言。二是有。不二是非有。色想等為二。色想等空為不二。乃至一切想皆為二。乃至一切二皆是有。乃至一切有皆有生死。不能解脫。諸想空者。皆為無二。皆是非有。皆無生死。則能解脫。由此一切有二想者。定無六度。無道無果。亦無現觀。下至順忍。彼尚非有。況有色等徧知。況得三乘聖果。

三漸次品第六十五

善現白佛。住有想者。若無道果。住無想者。豈有道果。佛言。如是。又問。菩薩行深般若時。為有有想有無想不。為有色等想不。為有色等想。有色等斷想不。佛言。於一切法皆

無有想。亦無無想。當知即是順忍。即是修道。即是得果。當知無性即菩薩道。無性即菩薩現觀。又問。若一切法皆以無性為自性者。云何如來現等覺已。於一切法及諸境界。皆得自在。

佛言。我本修學菩薩道時。無倒修行六度。入四靜慮。於諸靜慮及靜慮支。雖善取相。而無所執。都無味著。都無所得。無所分別。具足安住。善淳熟已。發起五通。亦無所執。乃至無所分別。以一剎那相應妙慧。證得無上菩提。謂現等覺四諦。都無所有。成就十力等無邊功德。安立三聚有情。令獲利樂。

又問。云何如來能起無性為自性四靜慮。能發無性為自性五神通。能證無性為自性菩提。能立無性為自性有情。作三聚已。令獲利樂。佛言。若諸欲惡不善法等。有少自性。或復他性為自性者。我不應通達彼無性為自性已。能入靜慮。以彼無

自他性。但以無性為自性故。我通達已。能入靜慮。廣說五通。乃至有情亦復如是。

又問。云何於無性為自性法中。有漸次業。漸次學。漸次行。由此證得菩提。佛言。菩薩聞一切有情。一切行。一切法。皆以無性為自性。思惟勝解。發趣菩提。為度有情。作漸次業。修漸次學。行漸次行。如諸過去菩薩。次第修行六度。六念。二十空等。如是學一切法。皆以無性為其自性。於中尚無少念可得。況有念色等。

又問。則應無色等。乃至一切法。皆應是無。佛言。於一切法皆以無性為自性中。有性無性為不可得。答言。不也。佛言。若有性無性俱不可得。云何可為是問。則應無色等。善現白佛。我於是法。無惑無疑。然當來世。有苾芻等求三乘者。彼作是說。佛說一切法。皆以無性為其自性。誰染誰淨。誰縛誰解。彼於染淨縛解不了知故。破戒。破見。破威儀。破淨

命。當墮三塗。受諸劇苦。輪迴生死。難得解脫。我觀未來有是可怖畏事。故問如來如是深義。佛言。善哉。如汝所說。有性無性俱不可得。不應於此執有無性。

無相無得品第六十六

善現白佛。若一切法。皆以無性為自性者。菩薩見何等義。為利有情。求趣菩提。佛言。以一切法皆以無性為自性故。菩薩為利有情。求趣菩提。何以故。有情具斷常見。住有所得。難可調伏。愚癡顛倒。難可解脫。由有所得想。無得。無現觀。亦無菩提。若無所得。即是得。即是現觀。即是菩提。以不壞法界故。若有於是無所得中。欲有所得。欲得現觀。欲得菩提。當知彼為欲壞法界。

又問。云何得有極喜地等。佛言。以一切法無所得故。得有極喜地等。又問。六度有何差別。佛言。無所得者。皆無差別。為欲令彼有所得者離染著故。方便宣說有差別相。又問。

何故無所得者。皆無差別。佛言。不得布施。不得施者。不得受者。不得所施。而行布施。乃至不得一切佛法而得無上菩提。菩薩行是無所得般若。魔及眷屬所不能壞。

又問。云何一心具攝一切佛法。佛言。所行布施等。所住內空等。不離般若。皆為般若之所攝受。如是一剎那心。則能具攝一切諸法。又問。云何諸有所作。不離般若。般若所攝受故。一剎那心則能具攝施等。佛言。菩薩所行布施等。所住內空等。皆為般若所攝受故。遠離二想。

又問。云何雖行施等而無二想。佛言。為欲圓滿施度故。即於施度中攝受一切佛法而行布施。由是因緣而無二想。廣說乃至修八十好亦如是。復次。行施等時。住無漏心而行施等。故無二想。

又問。云何住無漏心而行施等。佛言。以離相心。修行施等。又問。於一切無相無覺無得無影無作法中。云何能圓滿施

等。佛言。以離相無漏之心而行施等。一一廣明行相。

無雜法義品第六十七

善現白佛。云何於一切無雜無相自相空法中。能圓滿修六度。云何於一切無漏無差別法中。施設如是諸法差別。及可了知。云何於般若中。攝受一切世出世法。云何於一切異相法中。施設一相。所謂無相。及於一相無相法中。施設種種差別法相。

佛言。安住如夢如響。乃至如變化事五取蘊中。修行六度。如實了知如夢等五取蘊皆無相。所以者何。諸夢響等。皆無自性。無性則無相。無相則一相。由此因緣。布施無相。施者無相。受者無相。施物無相。若如是知而行布施。則能圓滿施度。則不遠離六度。則能圓滿一切佛法。廣說乃至般若亦爾。

諸功德相品第六十八

善現白佛。云何如夢響等。而可安立是善是非善。乃至是菩提。是能證耶。佛言。愚夫異生。得夢。得見夢者。乃至得變化事。得見變化事者。得已。顛倒執著。造身口意業。福。非福。不動行。往來生死。流轉無窮。

菩薩行深般若。觀察畢竟無際二空。安住畢竟無際二空。為彼有情宣正法言。色等是空。無我我所。色等如夢等。都無自性。當知此中無色等。無夢等。亦無見夢者等。一切法皆無實事。皆以無性而為自性。

汝等虛妄分別力故。無色中見有色。乃至無無為法中見有無為法。當知蘊處界等一切法性。皆從眾緣和合建立顛倒所起。諸業異熟之所攝受。汝等何為於是虛妄無實事法。起實事想。是時菩薩修行般若。方便善巧。拔濟有情。令修施等一切佛法。若諸有情。耽著有為施等及果。以諸方便安慰拔濟。

令住三乘。如是菩薩觀察安住畢竟無際二空。雖知諸法如夢響等。而能安立是善是非善等。皆無雜亂。甚奇希有。

次更分別菩薩甚奇希有之法。謂住異熟生。布施等法及四攝等。善現白佛。若一切法。一切有情。自性畢竟皆不可得。云何菩薩修行布施等。安住內空等。乃至住異熟生六神通已。為諸有情說法。世尊。不可得中。無有情。無有情施設。無色等。無色等施設。一切有情法及施設既不可得。云何菩薩為諸有情說法。何以故。菩薩行深般若時。尚不得菩提。況有菩提分法可得。尚不得菩薩。況有菩薩法可得。

佛言。如是。一切有情。有情施設。一切法。法施設。皆不可得。無所有故。當知內空。乃至無性自性空。真如空。乃至不思議界空。苦聖諦空。集滅道聖諦空。色空。乃至八十隨好空。見一切法皆悉空已。為諸有情說法。令離顛倒。而於有情及法。都無所得。於諸空相。不增不減。無取無捨。

由是雖說諸法。而無所說。於一切法。得無障智。不壞諸法。無二分別。如化如來。教所化眾。雖不分別破壞法相。而能如實安立有情。住所應住。雖於有情及法。都無所得。而令有情解脫妄想顛倒執著。所以者何。色等本性無縛無脫。則非色等。畢竟淨故。

復次。以無所住為方便故。住色空等。色等無所住。色空等無所住。色等無自性不可得。色空等無自性不可得。非無自性不可得法有所住故。非無性法住無性法。非有性法住有性法。非無性法住有性法。非有性法住無性法。非自性法住自性法。非他性法住他性法。非自性法住他性法。非他性法住自性法。何以故。是一切法皆不可得。不可得法。當何所住。菩薩以是諸空修遣諸法。亦能如實說示有情。

善現白佛。若真法界真如實際無轉越者。色等與法界真如實際為有異不。佛言。不異。又問。若不異者。云何世尊安立

黑法感黑異熟。白法感白異熟。非黑非白法感非黑非白異熟。佛言。依世俗諦安立。不依勝義。勝義諦中。不可說有因果差別。色等無生無滅。無染無淨。以畢竟空無際空故。

又問。若依世俗安立因果。不依勝義者。則愚夫異生皆應有三乘果。佛言。愚夫異生。不如實知世俗諦及勝義諦。無聖道。無修聖道。云何有聖果。唯諸聖者。如實知二諦。有聖道。有修聖道。得有聖果差別。又菩薩自於諸法無所執著。亦能教他於法無所執著。無執著故。於一切處皆得無礙。如佛所變化者。雖行施等。而於彼果不受不著。唯為有情般涅槃故。

諸法平等品第六十九

善現白佛。云何於一切法。善達實相。佛言。如佛所變化者。不行於貪等。乃至不行於道果。於一切法都無所行。是為善達諸法實相。謂於法性都無分別。又問。一切色等皆如化不。佛言。如是。一切法皆如化。又問。諸所變化。皆無實色

等。云何菩薩於諸有情。有勝士用。佛言。菩薩頗見有情可脫三界不。答言。不也。佛言。菩薩於一切法。知見通達。皆如幻化。

又問。為何事故修行施等。佛言。若諸有情。能知皆如幻化。則菩薩不應無數劫為有情行道。以有情自不能知。皆如幻化。是故菩薩為諸有情行道。復次。若菩薩不如實知皆如幻化。則不應無數劫修菩薩行。嚴淨佛土。成熟有情。以如實知皆如幻化。故無數劫修菩薩行。

又問。若一切法如夢幻等。所化有情。住在何處。拔濟令出。佛言。住在名相虛妄分別。拔濟令出。名皆是客。皆是假立。皆屬施設。謂此名色等。愚夫妄執。菩薩教令遠離。說離名法相有二種。一色相。二無色相。愚夫執著。取相分別。生諸煩惱。菩薩教令遠離二相。雖教安住無相界中。而不令其墮二邊執。謂此是相。此是無相。

又問。若一切法但有名相。皆是假立。分別所起。非實有性。云何於諸善法能自增進。亦能令他增進。佛言。若諸法中少有實事。非但假立有名相者。則應於善法不自增進。不令他進。以諸法中無少實事。是故以無相為方便。能圓滿般若等諸善法。亦令他滿。

復次。若諸法中。有毛端量實法相者。則菩薩於一切法。不應覺知無相無念。亦無作意無漏性已。證得菩提。安立有情於無漏法。何以故。諸無漏法。皆無相無念無作意故。安立有情於無漏法。乃名真實饒益他事。復次。菩薩學三脫門。則能學五蘊等無量無邊佛法。次廣答學五蘊等。

又問。若行般若時。如實了知五蘊等法展轉差別。豈不以色等壞法界耶。法界無二無差別故。佛言。若離法界。餘法可得。可言彼法能壞法界。然離法界無法可得。故無餘法能壞法界。菩薩應學法界無二無別不可壞相。又問。欲學法界。當於

何學。佛言。當於一切法學。以一切法。皆入法界故。不由佛說。若學一切法。即學法界。

又問。若一切法。皆入法界。無二無別。云何菩薩當學般若。亦學靜慮等。非法界中有如是等種種分別。將無由此分別。行於顛倒。無戲論中。起諸戲論。世尊。法界非色等。亦不離色等。法界即色等。色等即法界。佛言。如是。色等非法界。亦不離色等別有法界。色等即法界。法界即色等。菩薩知一切法即法界。以方便善巧無名相法。為諸有情寄名相說。謂此是色等。如幻師幻作種種。無有實事可得。

不可動品第七十

善現白佛。若有情及有情施設畢竟不可得。菩薩為誰修行般若。佛言。以實際為量故。修行般若。以有情際。不異實際。以不壞實際法。安立有情於實際中。問言。若有情際即是實際。則為安立實際於實際。則為安立自性於自性。佛言。

不可安立實際於實際。亦不可安立自性於自性。然般若方便善巧。能安立有情於實際中。而有情際不異實際。如有情際與實際。無二無二分。

又問。何等名為方便善巧。佛為廣說。又問。本性空中。有情及法俱不可得。亦無非法。云何菩薩為諸有情求證菩提。常作饒益。佛言。以一切法皆本性不空。是故菩薩住一切法本性空理。修證菩提。為饒益有情。說本性空法。復次。本性空中。我等不可得。色等不可得。雖為有情說本性空。而諸有情實不可得。哀愍彼墮顛倒法故。拔濟令住無顛倒法。謂無分別。此無所有。即本性空。

菩薩安住此中。見諸有情墮顛倒想。方便善巧。令得解脫無我我想。乃至亦令解脫無菩提菩提想。當知此中無我可得。乃至亦無菩提可得。菩薩唯為諸法本性空故。求趣菩提。是本性空。前後中際。常本性空。未曾不空。即本性空。名為佛

眼。

善現白佛。菩薩甚為希有。行本性空。而於本性空。曾無失壞。謂不執色等異本性空。世尊。色等即是本性空。本性空即是色等。佛印述之。

復次。若色等異本性空。本性空異色等。色等非本性空。本性空非色等。則菩薩不應觀一切法皆本性空。證得菩提。以色等不異本性空（云云）。是故觀一切法皆本性空。證得菩提。以離本性空。無有一法是實是常。可壞可斷。本性空中。亦無一法是實是常。可壞可斷。

唯諸愚夫。迷謬顛倒。起別異想。謂執色等。異本性空。不如實知色等。便執著色等。計我我所。著內外物。受後色等。菩薩住本性空。修行般若。不執受色等。亦不壞色等若空若不空。所以者何。色等不壞空。空不壞色等。謂此是色等。此是空。譬如虛空不壞虛空。如是諸法。俱無自性。不可相

壞。謂此是空。此是不空。

善現白佛。本性空中。都無差別。菩薩為何所住。發無上心。無上菩提。無二行相。非二行相。能證菩提。佛言。如是菩提。無二亦無分別。若行二相有分別者。必不能證。菩薩不於菩提行於二相。亦不分別。都無所住。發無上心。於一切法不行二相。亦不分別。都無所行。則能趣證菩提。謂不於色等行。不緣名聲執我我所。不作是念。我行於色等。

復次。菩薩所有菩提。非取故行。非捨故行。如佛化身。如羅漢夢。都無行處。本性空故。又問。若都無行處。豈不行布施等。佛言。菩薩所有菩提。雖無行處。而要行施等。乃得菩提。又問。若無行處。將無不住施等久修令滿。佛言。雖無行處。而要住施等久修令滿。乃得菩提。

復次。菩薩欲得菩提。應住色等本性空。應住一切法一切有情本性空。修諸功德。令圓滿已。便證菩提。是本性空。

最極寂靜。無有少法能增能減。能生能滅。能斷能常。能染能淨。能得果。能現觀。依世俗言說施設法故。說修般若。如實了知本性空已。證得菩提。非真勝義。真勝義中。無色等可得。菩薩修行般若。從初發心。雖極猛利。為諸有情行菩提行。而於此心。於諸有情。於大菩提。於佛菩薩。都無所得。善現白佛。云何行菩提行。云何能得菩提。佛言。汝得果時。頗見有情若心若道若諸道果有可得。答言。不也。佛言。云何言得阿羅漢果。答言。依世俗說。不依勝義。佛言。菩薩亦復如是。

成熟有情品第七十一

善現白佛。若菩薩修行布施等。安住內空等。若未圓滿。不能證得菩提。云何修菩薩道。令得圓滿。佛言。菩薩方便善巧。修行布施等。不得布施等。不得能修。不得所修。不得所為。亦不遠離如是諸法。而行布施等。則能圓滿修菩薩道。能

證菩提。

舍利子問。云何勇猛正勤。修菩薩道。佛言。方便善巧。不和合色等。不離散色等。以如是諸法。皆無自性可合離故。又問。若一切法都無自性可合離者。云何引發般若於中修學。能得菩提。佛言。如是。要學般若。乃證菩提。非無方便善巧而可證得。菩薩行般若時。不見有法自性可得。當何所取。如實了知一切法性皆不可取。是不可取波羅密多。即是無障波羅密多。即是般若波羅密多。應於中學。

又問。若一切法。都非實有。依何等事而可了知此是異生。此是異生法。乃至此是如來。此是如來法。佛言。為實有色等。如諸愚夫異生執不。一一答言。不也。但由顛倒愚夫異生有如是執。佛言。菩薩修行般若方便善巧。雖觀諸法都非實有。而依世俗發趣菩提。為有情說。令得正解。

又問。云何方便善巧。雖觀諸法皆無自性。而依世俗發趣

菩提。為有情說。令離顛倒。佛言。方便善巧者。謂都不見有少實法可於中住。而有罣礙。有退沒。心劣弱。生懈怠。唯有愚夫。迷謬顛倒執著色等。菩薩觀一切法本性空寂。自性空寂。修行般若。為有情說法。令得三乘。於諸有情。非有所得。唯有世俗假說有情。菩薩安住二諦。為有情說法。雖二諦中。有情不可得。有情施設亦不可得。而方便善巧。為有情說法。有情聞已。於現法中尚不得我。何況當得所求果證。

舍利子。若有情類。諸趣生死。先有後無。菩薩如來。應有過失。先無後有。理亦不然。如來出世。若不出世。法相常住。終無改轉。尚無我等。況有色等。既無諸法。何有諸趣生死。生死既不可得。云何令得解脫。唯依世俗。假說為有。以如是法自性皆空。菩薩從過去佛如實聞已。為脫有情。顛倒執著。發趣菩提。於發趣時。不作是念。我於此法。已得當得。令彼有情。已度當度。是菩薩常於菩提不起猶豫。雖脫有情迷

謬顛倒諸趣生死。而無所得。但如幻事。

善現白佛。云何修行布施方便善巧。成熟有情。佛廣答之。又問淨戒及餘大菩提道。佛略答之。

嚴淨佛土品第七十二

善現念言。何法名菩薩道。佛言。六度。三十七品。二十空等。總一切法。皆菩薩道。若菩薩不學一切法。終不能得一切智智。善現問言。若一切法自性皆空。云何學一切法。佛言。以一切法自性皆空。是故菩薩能得菩提。若諸有情。知一切法皆自性空。則菩薩不應學一切法。證得菩提。為有情說。菩薩初修學時。應審觀察諸法自性。都不可得。唯有執著和合所作。我當審察皆畢竟空。不應執著色等。雖無執著。而於諸法常學無倦。觀察了知有情心行。但行虛妄所執。方便善巧。教授教誡。令修施等。令勿恃此而生憍逸。此中都無堅實事故。如是以無所住而為方便。雖行施等而無所住。以如是自

性。行者。行相。一切空故。

善現白佛。若一切法皆不生者。云何菩薩起菩提道。佛言。諸無所作無所趣者。知一切法皆不生故。然諸有情。不了諸法。法界。法爾常住。菩薩為饒益故。起菩提道。又不用道得菩提。亦不用非道得菩提。菩提即是道。道即是菩提。菩薩若已圓滿施等妙法。以一剎那金剛喻定相應妙慧。永斷二障麤重習氣相續。證無上覺。乃名如來。於一切法。得大自在。盡未來際。利樂有情。

又問。云何嚴淨佛土。佛言。從初發心。乃至究竟。常清淨自他三業麤重。則能嚴淨佛土。十惡是麤重。五分不清淨。六蔽。離三十七品等一切善法。貪二乘果證。起色等想。皆名麤重。遠離是已。自行施等。教他亦爾。持此善根。與諸有情平等共有。回向所求嚴淨佛土。令速圓滿。利樂有情。又以通願力。施妙七寶。妙音樂。妙香華。妙飲食塗香衣服。妙五塵

境。供三寶等。

又自住內空等。修四念住等。亦勸他住等。一一發願回向。由此便能嚴淨佛土。自他成就善法。莊嚴相好。又成正覺時。所化有情。咸生彼土。土中不聞有三惡趣等聲。但聞空無相無願等聲。十方如來。皆稱讚彼名。及自說法。有情不疑。又於所化眾生。不具善根。墮惡趣者。以神通方便教化。令離惡趣。修習勝行。定得無上正等菩提。

淨土方便品第七十三

善現白佛。菩薩住何等聚。佛言。正定聚。又問。何乘正定聚。佛言。佛乘。又問。何時安住。佛言。初心。不退。最後身。皆悉安住。又問。為墮惡趣不。佛言。由菩薩初發心時。修諸勝行。伏斷一切惡不善法。不墮八難。善現白佛。何故世尊說自本生。亦生惡趣。爾時善根。為何所在。

佛言。非由不淨業受惡趣身。但為利樂有情。由故思願而

受彼身。不為傍生過失所染。菩薩為得菩提。一切善法。皆應圓滿。若一切善法未能圓滿而得菩提。無有是處。受傍生身。如佛化作。如羅漢化。亦如幻作。安住般若。能作如是善巧方便。

又問。云何引發神通。能往十方供佛聞法。種諸善根。佛言。由徧觀空方便善巧。能引發殊勝神通自在。成熟有情。嚴淨佛土。證得菩提。若遠離神通。如鳥無翅不能飛翔。菩提資糧未具。不得菩提。一切善法。皆是菩提資糧。

無性自性品第七十四

佛答善現。如是法即菩薩法。亦即佛法。雖位有異。而法無別。善現又問。自相空中。云何得有種種差別。佛言。有情於一切法自相空理。不能盡知。造作諸業。罪業墮三塗。福業生人天。不動業生上二界。無漏業得二乘果。若知諸法自相皆空。或入菩薩地。或證佛菩提。由此因緣。諸菩薩修行布施

等。安住內空等。令圓滿已。證得菩提。說名如來。利樂有情。諸有所為。常無失壞。不墮輪迴。

又問。佛證菩提。為得諸趣生死法不。為得黑業白業黑白業非黑白業不。佛皆言不也。又問。云何施設此是地獄。乃至此是如來。佛言。以諸有情不知諸法自相空故。流轉受苦。菩薩聞一切法自相空已。求證菩提。設教拔諸有情生死。又問。為由四諦得涅槃。為由四諦智得涅槃。

佛言。非由四諦四諦智得涅槃。我說四諦平等性。即是涅槃。但由般若證平等性。名得涅槃。菩薩修行般若時。無有少法不如實見。於一切法如實見時。都無所得。則如實見一切法空。能入菩薩正性離生。即住菩薩種性地中。不從頂墮。安住奢摩他地。能決擇一切法。及隨覺四聖諦。起隨順趣向臨入菩提之心。於一切法觀察實相。

次更為廣說夢喻。像喻。響喻。陽燄喻。光影喻。幻事

喻。變化喻。尋香城喻。

勝義瑜伽品第七十五

善現白佛。諸見實者。無染無淨。不見實者。亦無染無淨。乃至無自性有自性法。亦無染無淨。何故有時佛說有清淨法耶。佛言。我說一切法平等性。為清淨法。依世俗說。不依勝義。勝義諦中。無分別。無戲論。一切音聲名字路絕。

又問。若一切法如夢像等。云何菩薩依止如是非真實法。發菩提願。佛言。汝所說法。豈不亦如夢像等耶。答言。如是。云何菩薩行般若時。發誠諦言。我當圓滿一切功德。利樂有情。非夢所見物等能行布施等法。況能圓滿。佛言。如是。如汝所說。非實有法。尚不能行施等。況能圓滿。

復次。施等非實有故。不能證得菩提。如是諸法。一切皆是思惟所造作法。皆不能得一切智智。如是諸法。於菩提道雖能引發。而於其果無資助能。由是諸法無生無起無實相故。菩

薩從初發心。雖起種種身語意善。而知一切如夢像等。復次。如是諸法雖非實有。若不圓滿。決定不能成熟有情。嚴淨佛土。證得菩提。

復次。菩薩隨所修行一切善法。皆如實知如夢像等。復次。菩薩於一切法不取為有。不取為無。何以故。施等不可取故。乃至無為法亦不可取故。知一切法不可取已。求趣菩提。所以者何。以一切法皆如夢等。然諸有情不知不見。為度彼故。求取菩提。復次。菩薩從初發心。為有情故。修行施等。不為己身。非為餘事。

復次。菩薩見諸愚夫於非我中而住我想。乃至非使見者而住使見者想。深生憐愍。方便教他。令離顛倒妄想執著。安置無相甘露界中。由此方便。自於諸法無所執著。亦能教他無所執著。此依世俗。不依勝義。佛證菩提所得佛法。亦依世俗故說。若依勝義。能得所得。俱不可得。若謂此人得如是法。便

執有二。執有二者。不能得果。亦無現觀。執無二者。亦復如是。若無二無不二。即名得果。亦名現觀。

善現復問。何謂法平等性。佛言。若於是處都無有性。亦無無性。亦不可說為平等性。如是乃名法平等性。既不可說。亦不可知。除平等性無法可得。離一切法無平等性。異生。聖者。俱不能行。非彼境故。又問。如來於一切法。皆得自在。云何可言法平等性。亦非所行境耶。佛言。如來於一切法。雖得自在。若平等性與佛有異。可言是所行境。然平等性與佛無異。云何可說佛行彼境。

又問。平等性中。異生聖者法及有情俱無差別。云何三寶出現世間。佛言。佛法僧寶。與平等性。各有異耶。答言。皆無有異。然佛於無相中。方便善巧建立差別。佛言。如是。若佛不證菩提。設證菩提。不為有情施設諸法差別之相。有情能自知此是地獄。乃至此是如來等不。答言。不也。佛言。是故

佛於無相法。方便善巧。雖為有情施設差別之相。而於平等法性。都無所動。又問。一切異生等。亦於平等法性無所動不。佛言。如是。

又問。若一切法平等性。令一切法及諸有情相各異故。性亦應異。是則法性亦應各異。云何於諸異相法等。可得安立法性一相。云何菩薩修行般若。不分別法及諸有情有種種相。若不分別。則應不能修行般若。不能從一地至一地。不能趣入正性離生。超二乘地。不能圓滿神通。乃至不能證得菩提。佛言。諸色等法性。是空性不。答言。如是。佛言。於空性中。色等異相為可得不。答言。不也。佛言。由此當知平等法性。非色等。不離色等。

又問。平等法性是有為。是無為。佛言。非是有為。非是無為。然離有為法。無為法。不可得。離無為法。有為法亦不可得。即有為無為平等法性。說名勝義。修般若時。不動勝

義。而行菩薩行。

無動法性品第七十六

善現白佛。平等法性。皆本性空。於有無法。非能所作。云何不動勝義。而作菩薩所應作事。佛言。若諸有情。自知諸法皆本性空。則佛菩薩不現神通作希有事。謂於諸法本性空中。雖無所動。而令有情遠離妄想顛倒。安住無為界。解脫生死苦。無為界者。即諸法空。依世俗說。名無為界。

又問。由何空故。說諸法空。佛言。由想空故。復次。無一法非化。是諸化者。無不皆空。依如是法。施設異生。乃至如來。又問。世界蘊處界等。可皆是化。出世波羅密多等。豈亦是化。佛言。無非是化。然有是聲聞所化。有是獨覺所化。有是菩薩所化。有是如來所化。有是煩惱所化。有是善法所化。由此說一切法。皆如變化。若法不與生滅相合。是法非化。即是涅槃。

又問。佛說無有少法非自性空。云何涅槃可言非化。佛言。此自性空。非佛等所作。其性常空。此即涅槃。非實有法名為涅槃。可說無生無滅非化。

常啼菩薩品第七十七

善現白佛。云何教授教誡初業菩薩。令其信解諸法自性畢竟皆空。佛言。豈一切法先有後無。然一切法非有非無。無自性。無他性。先既非有。後亦非無。自性常空。無所怖畏。應如是教初業菩薩。令其信解。

復次。欲求般若。應如常啼菩薩。今在大雲雷音佛所。修行梵行。本求般若時。不惜身命。不顧珍財。不徇名譽。不希恭敬。居阿蘭若。聞空中聲。從是東行。復作是念。我寧不問至何城邑。復從誰聞。悲泣嘆恨。有佛像現。為說過五百踰繕那妙香城中法涌菩薩。常啼聞已。於一切法中。起無障智見。即入五十四三摩地。見十方佛宣說般若。咸共慶讚。令歡喜

已。忽然不現。

常啼從三昧起。作是思惟。佛從何來。今往何所。我當疾詣法涌菩薩。彼能為我斷如是疑。漸次至一大城。高唱賣身。魔隱蔽其聲。不令人聞。唯長者女宿善根力。魔不能蔽。帝釋化作少婆羅門試之。買血髓心。常啼出血出髓。將欲剖心。長者女止之。帝釋愧謝。長者女白父母同往。

至妙香城。以供養具分作二分。先持一分。詣寶臺所。供養般若。復持一分。供養法涌菩薩。菩薩威神。令所散華。合作一妙華臺。香成一妙香蓋。衣成一妙寶帳。長者女並諸眷屬。皆發無上心願。常啼自述始末。並問佛從何來。今往何所。

法涌菩薩品第七十八

法涌告常啼言。法身無所從來。亦無所去。諸法實性。皆不動故。兼說陽燄。幻事。鏡像。谷響。光影。尋香城。變化

事。夢所見等喻。若執如來身是名是色。有來有去。迷法性故。愚癡流轉。遠離般若。若於甚深法義能如實知。不執佛身是名是色。亦不謂佛有來有去。由不執故。能行般若。勤修佛法。鄰近菩提。

復次。如海中寶。非十方來。非有情作。亦非無因緣生。有情善根力故。海有寶生。善根力盡。令彼滅沒。諸有為法。緣合故生。緣離故滅。都無生者滅者。是故諸法。無來無去。佛身亦然。依本修淨行圓滿為因緣故。及依有情先修見佛業成熟故。有如來身出現於世。因緣和合力盡。即便滅沒。是故諸佛無來無去。

又如筵篋。種種因緣和合。而有聲生。是聲生位。無所從來。於息滅時。無所至去。佛身亦爾。說是法時。大千六種變動。八千眾生證無生忍。八十那庾多眾生發無上心。八萬四千眾生淨法眼。常啼上昇虛空七多羅樹。帝釋化作無量香華助

之。奉散供養。下禮雙足。以身奉充給使。時長者女及諸眷屬。亦以身奉常啼。常啼以奉法涌。法涌受已。還施常啼。日將欲沒。法涌還宮。

常啼於七歲中。不坐不臥。唯行唯立。長者女等亦爾。過七歲中。空中聲言。卻後七日。法涌當從定出。宣說正法。常啼敷師子座。求水灑地。魔隱蔽水。常啼刺身出血。長者女等亦爾。帝釋變血成栴檀水。化作妙華。奉施常啼。常啼受已。分作二分。一分嚴布其地。一分擬奉大師。法涌過七日已。昇座宣說般若。常啼聞已。得六十億三摩地門。現見十方各恆沙佛。聞說如是般若。

結勸品第七十九

先向善現結勸。次囑阿難受持。

(已上共四百卷)

第二分

緣起品第一

佛住鷲峰山。與五千苾芻。五百苾芻尼等俱。並如初分中說。

歡喜品第二

佛知有緣眾。一切來集。告舍利子言。菩薩欲於一切法等覺一切相。當學般若。舍利子歡喜禮問。佛言。應以無住而為方便。安住般若。所住能住不可得故。復以無所得而為方便。應修習四念住。乃至無量無邊佛法。如是諸法。不可得故。復次欲疾證一切智智。乃至成就無量功德。當學般若。若修行般若。天人歡喜。

舍利子問。菩薩決有父母妻子等耶。佛言。或有。或無。或示受五欲。厭捨出家。

觀照品第三

舍利子問。云何修行般若。佛言。應如是觀。不見有菩薩。不見菩薩名。不見般若。不見般若名。不見行。不見不行。何以故。菩薩自性空。菩薩名空。色等自性空。不由空故。色等空。非色等。色等不離空。空不離色等。色等即是空。空即是色等。如是自性。無生無滅。無染無淨。不見生滅染淨故。不生執著。觀一切法。但有名。實不可得。如是修行般若。除諸佛慧。二乘等慧所不能及。以不可得空故。

舍利子問。三乘般若差別既不可得。云何說菩薩所修般若。二乘所不能及。佛言。菩薩皆作是念。我當修行六度。成熟有情。嚴淨佛土。滿佛十力等法。度無量眾。譬如日光。照無不徧。二乘如螢。無如是念。依菩薩故。一切善法出現世間。便有人天三乘。又問。與何法相應故。言與般若相應。佛言。與色等空相應故。不見色等若相應若不相應。若生若滅。

若染若淨。無有少法與法合者。以本性空故。復次。入一切法自相空已。不觀一切法若合若散。

復次。不著色等有性無性。常無常。乃至無願有願。不作是念。我行般若。不行般若。亦行亦不行般若。非行非不行般若。不為布施。乃至不為平等性故。修行般若。以不見諸法性差別故。如是與般若相應。則能安立無量有情於涅槃界。魔不得便。佛菩薩皆護念。諸天擁護。苦報轉輕。常不離佛。是菩薩不見諸法與空相應。亦不見空與諸法相應。是為第一與空相應。普能引發十力等佛法。畢竟不起慳貪犯戒等心。

舍利子問。與般若相應菩薩。從何處來生。從此生何處。佛言。有從餘佛土來。有從覩史天來。有從人中來。從此間沒。生餘佛土。常得值佛。次廣分別無方便善巧。有方便善巧。種種差別之相。乃至淨五眼。發六通。不自高舉。於著不著。俱無所著。說此修行般若獲勝利時。三百苾芻。

以衣奉佛。發無上心。佛授其記。一萬有情。各隨願力生
萬佛土。

無等等品第四

舍利子。大目連。善現。大飲光。滿慈子等。同讚菩薩般
若。佛印成之。

舌根相品第五

世尊現舌根相。量等大千。出無數光。照十方界。十方無
量菩薩皆來供養。諸天亦來供養。佛令供具合成臺蓋。量等大
千。百千俱胝那庾多眾。悟無生忍。佛授其記。

善現品第六

佛告善現。汝以辯才。為菩薩宣說般若。善現白佛。我都
不見有一法可名菩薩。可名般若。云何令我為菩薩宣說般若。
佛言。菩薩唯有名。般若唯有名。如是二名。亦唯有名。不生
不滅。唯假施設。不在內外兩間。不可得故。如世間我等。色

等。唯有假名。如是假名。不生不滅。唯假施設謂唯我等。

菩薩於一切法。名假。法假。方便假。應正修學。不應觀色名若常無常。樂苦。我無我。淨不淨。空不空。有相無相。有願無願。寂靜不寂靜。遠離不遠離。雜染。清淨。生滅。乃至意觸為緣。所生諸受。名亦如是。若菩薩。若菩薩名。若般若。若般若名。皆不見在有為界中。亦不見在無為界中。於一切法。不作分別。能修布施等。能住內空等。善達實相。於名法假如實覺已。不執著一切法。增益六度。趣入正性離生。見佛聞法。一切陀羅尼門。三摩地門。皆得自在。

復次。即色等是菩薩不。離色等有菩薩不。善現一一答言。不也。佛言。善哉。若菩提。若薩埵。若色等法。不可得故。菩薩及所行般若。亦不可得。菩薩應如是學。復次。即色等真如是菩薩不。離色等真如有菩薩不。善現一一答言。不也。佛言。善哉。色等法不可得故。色等真如亦不可得。菩薩

及般若亦不可得。應如是學。

復次。色等增語。色等常無常等增語。是菩薩不。善現一一答言。不也。佛言。善哉。色等法及常無常等不可得故。增語亦不可得。菩薩及般若亦不可得。應如是學。復次。諸法不見諸法。諸法不見法界。法界不見諸法。法界不見法界。有為界不見無為界。無為界不見有為界。非離有為施設無為。非離無為施設有為。菩薩於一切法都無所見。其心不驚恐怖沈沒憂悔。應如是教誡教授諸菩薩。令於般若皆得成辦。

入離生品第七

善現白佛。菩薩欲圓滿六度。欲徧知一切法。欲斷一切惡。修一切善。得一切佛法。滿一切有情心願等。當學般若。舍利子問。何名頂墮。善現答言。無方便善巧而行六度。住三脫門。退墮二乘地。是名頂墮。若不見空。依空觀空。如實知色等不應執。知心本性清淨。無變異。無分別。一切法亦無變

異。無分別。能如是學。住不退地。則為徧學三乘諸法。

勝軍品第八

善現白佛。我於菩薩及般若。皆不知不得。云何令我以般若相應法教菩薩。我於色等一切法。若增若減。不知不得。如何可言此是色等。是色等名。皆無所住。亦非不住。是色等義。無所有故。我於菩薩及般若。若義若名。不知不得。若以是法教諸菩薩。我當有悔。

若菩薩聞如是說。心不沈沒憂悔。不驚恐怖。決定已住不退。以無所住方便而住。若無方便善巧。我我所執所纏擾故。心住色等。於色等作加行。不能攝受修學圓滿般若。不能成辦一切智智。何以故。色等不應攝受。便非色等。本性空故。乃至其所攝受修學圓滿甚深般若。亦不應攝受。便非般若。本性空故。

以本性空。觀一切法。心無行處。是名無所攝受三摩地。

不共二乘。其所成辦一切智智。亦不應攝受。便非一切智。以內空故。乃至無性自性空故。非取相修得。諸取相皆是煩惱。若取相修得一切智智者。勝軍梵志於一切智智不應信解。彼生淨信。由勝解力。思察一切智智。不以相為方便。亦不以非相為方便。以相與非相俱不可取故。雖名隨信行。而能以本性空悟入一切智智。不取諸相。乃至涅槃亦不取著。

菩薩雖於一切皆無所取。而以本願所行未滿。所證未辦。終不涅槃。雖能圓滿所行。成辦所證。而不見四念住。乃至十八不共法。以四念住。即非四念住。乃至十八不共法。即非十八不共法。以一切法。非法非非法故。是菩薩雖不取著一切法。而能成辦一切事業。

行相品第九

善現白佛。菩薩無方便善巧。若行色等。是行其相。若行常無常等。是行其相。非行般若。又謂舍利子言。若於色等住

想勝解。則作加行。不能解脫。尚不能證二乘。況證菩提。此名無方便善巧者。若不行色等。不行色等相。不行常無常等。不行常無常等相。有方便善巧故。能證菩提。是菩薩不取行。不取不行。不取亦行亦不行。不取非行非不行。於不取亦不取。由般若以無性為自性故。是名無所取著三摩地。不共二乘。

若菩薩於是勝三摩地。恆住不捨。速證菩提。復有健行三摩地等。略舉一百十五名。及餘無量無數三摩地門。陀羅尼門。若能恆善修學。亦令速證菩提。菩薩雖依一切法平等性。證入如是等持。而於平等性及諸等持。不作想解。以無所有中。分別想解無容起故。佛讚印云。菩薩應如是學。於一切法。都無所學。

舍利子問。若爾。諸法如何而有。佛言。諸法如無所有。如是而有。若於如是無所有法。不能了達。說名無明。由無明

及愛勢力。分別執著斷常二邊。於諸法不知不見。不能出離三界。於三乘法。不能成辦。若以無所得為方便。速能成辦一切智智。

幻喻品第十

善現白佛。設有問言。幻士能學般若等。能成辦一切智智不。當云何答。佛言。色等與幻有異不。答言。色等不異幻。幻不異色等。色等即是幻。幻即是色等。佛言。幻有染淨生滅不。答言。不也。佛言。無染淨生滅法。能學般若。成辦一切智智不。答言。不也。佛言。於五蘊中起想等想。施設言說。假名菩薩不。答言。如是。

佛言。假建立者。有生滅染淨不。答言。不也。佛言。無想。無等想。無施設。無言說。無假名。無身身業。語語業。意業。無染淨生滅法。能學般若。成辦一切智智不。答言。不也。佛言。菩薩以無所得而為方便。修學如是甚深般若。速

成一切智智。乃至若無方便善巧。不為善友所攝受者。聞說是法。心驚恐怖。有方便善巧者。其心不驚恐怖。次更分別善友惡友之相。

譬喻品第十一

佛答善現。無句義是菩薩句義。如空中鳥跡等。次釋善不善法等。次釋摩訶薩義。

斷諸見品第十二

舍利子亦說摩訶薩義。以能說法。令斷諸見故。善現亦說摩訶薩義。發菩提心。不取著故。

六到彼岸品第十三

滿慈子亦說摩訶薩義。普為利樂一切有情。修行六度。於一一度。皆修六度。令得圓滿。是名被大功德鎧故。

乘大乘品第十四

舍利子問。云何菩薩乘於大乘。滿慈子答。以一切智智相

應作意。大悲為首。用無所得而為方便。雖行六度等。而不得六度等。如實觀察一切。但有假名。施設言說不可得故。

無縛解品第十五

善現白佛。云何菩薩被大乘鎧。佛言。六度三十七品等。雖有所為。而無其實。諸法性相。皆如幻故。善現言。不被功德鎧。當知是為被大乘鎧。以一切法自相空故。佛言。一切智智無造無作。一切有情亦無造無作。菩薩為此事故。被大乘鎧。由諸作者。不可得故。

善現言。色等無縛無解。滿慈子問。何等色無縛無解。答言。如夢如響等色。去來現在善不善無記等色。一切無縛無解。以一切法無所有故。遠離故。寂靜故。無生滅染淨故。

三摩地品第十六

善現白佛。何等是大乘相。齊何當知發趣大乘。從何處出。至何處住。為何所住。誰乘而出。佛言。六度是大乘相。

二十空。百千三摩地。是大乘相。

念住等品第十七

復次。四念住等。三十七品（於中身念住觀最詳）。三解脫門。十一智。三無漏根。三三摩地。十隨念。四靜慮等。十力。四無所畏。四無礙解。十八不共法。入諸字門。得二十種功德。是大乘相。

修治地品第十八

答齊何當知發趣大乘之問。明初地修治十勝業等。

出住品第十九

答從何處出。至何處住之問。謂從三界中出。至一切智智中住。然以無二為方便故。無出無住。又答誰乘而出之問。都無乘是大乘出者。以若所。若能。若時。若處。皆不可得故。菩薩修行般若。雖觀諸法皆無所有。畢竟淨故。無乘大乘而出住者。然無所得而為方便。乘於大乘。從生死中出。至一切智

智中住。盡未來際。利樂有情。

超勝品第二十

善現讚大乘超勝。佛廣明之。

無所有品第二十一

廣明大乘與虛空等。普能容受。無來無去。無住可見。前中後際。皆不可得。三世平等。超出三世。故名大乘。菩薩修行般若時。住此三際平等性中。精勤修學一切相智。無取著故。速得圓滿。

隨順品第二十二

滿慈子問。如來令善現說般若。今何故說大乘。佛言。般若大乘二名。義無異故。

無邊際品第二十三

善現明三際菩薩皆不可得。一切法無邊際故。菩薩亦無邊際。即一切法。離一切法。菩薩不可得。諸法畢竟不生。但有

假名。都無自性。舍利子一一重問。善現廣答。

次白佛言。菩薩修行般若。觀察諸法無受。無取。無住。無著。亦不施設為我。以不見一切法故。以一切法性空。無生滅故。一切法不生不滅。即非一切法。以一切法與不生不滅。無二無處。不生不滅法。非一非二。非多非別故。一切法入無二法數。

遠離品第二十四

舍利子問。云何菩薩。云何般若。云何觀察諸法。善現對曰。勤求菩提。利樂有情。名菩薩。具如實覺。徧知一切法相而無所執。名摩訶薩。有勝妙慧。遠有所離。遠有所到。名般若。觀一切法。非常無常等。名觀察諸法。次白佛言。菩薩見一切法無生。畢竟淨故。

舍利子言。六趣應無差別。三乘不應得果。善現對曰。非勝義中。有三乘六趣等。次明諸法不生。都無所依。次明應淨

菩提道。有世出世二種六度。次明大功德聚。皆由般若所辦。般若為善法母。三乘從此生故。

舍利子言。若菩薩住如是住。恆不捨離成就大悲相應作意者。則一切有情。亦應成就菩薩。以一切有情亦於此住。及此作意常不捨離。則菩薩與有情應無差別。善現報言。善哉。能如實知我所說意。雖似難我。而成我意。何以故。有情非有故。無實故。無性故。遠離故。寂靜故。無覺知故。當知如是住及作意。亦非有。乃至無覺知。歷一切法。廣說亦爾。

由此因緣。菩薩於如是住及此作意。常不捨離。與諸有情亦無差別。以一切法無差別故。佛讚印之。大千震動。佛笑顯益。

帝釋品第二十五

諸天來集。佛光赫奕。帝釋重問。何謂般若。云何應住。應學。善現先勸諸天發心。次示以無所得而為方便。思惟世法

皆無常苦苦等。佛讚印之。善現白言。為報恩故。又為帝釋說如所應住。不應住相。

舍利子念言。若一切法不應住。云何應住般若。善現謂言。同諸如來。於一切法都無所住。亦非不住。以色等法。無二相故。天子作念。咒句猶可了知。般若竟不能解。善現告言。我曾不說一字。汝亦不聞。當何所解。如化。如夢。谷響。幻事。說聽及解。都不可得。

天子復念。轉深轉妙。善現告言。色等非深非妙。色等自性非深非妙。天子復念。善現所說不施設色等。善現告言。從初發心。應住無說。無聽。無解。甚深般若。

信受品第二十六

天子作念。善現欲為何等有情。樂說何法。善現告言。欲為如幻化夢有情。樂說如幻化夢之法。諸聲聞及菩薩同問。誰能信受。阿難答。以有能信受。善現告諸天子。其中實無能信

受者。舍利子問。豈不於中說三乘法。乃至令得最勝妙辯。善現答言。誠如所說。此般若中。以無所得而為方便。說三乘法等。由內空等故。

散花品第二十七

諸天化華散供。佛令合成華臺。善現念為從心化出。帝釋言。但變現耳。善現言。既非生法。則不名華。乃至一切法亦如是。佛答帝釋。善現不違色等假名。而說法性。善現謂言。菩薩知一切法但假名已。應學般若。不於色等學。不見色等可於中學故。

舍利子問。何故不為攝受色等。亦不為壞滅色等故學。善現對曰。不見有色等可攝受。可壞滅。亦不見有能攝受及壞滅者。若能。若所。內外空故。以無所學無所成辦為方便故。而學般若。則能成辦一切智智。

次明諸法皆無依持。隨順世俗。說依佛力。次答菩薩所學

般若。不應於色等求。不應離色等求。帝釋歎般若大。無量無邊。善現印之。

授記品第二十八

天仙三返唱善。佛述見然燈佛得授記事。預命帝釋。勤加守護。

攝受品第二十九

佛為帝釋說現法當來功德勝利。

宰堵波品第三十

佛明修般若者。能降自他貪等刀仗。是大明咒等。書經功德。勝於供設利羅。

福生品第三十一

佛印帝釋歎經功德。

功德品第三十二

諸天及佛。皆勸帝釋受持般若。

外道品第三十三

外道來求佛過。帝釋念般若退之。魔軍亦爾。

天來品第三十四

慶喜白佛。何緣但讚般若。佛言。般若為尊為導故。帝釋更說功德。佛又廣說功德。並明諸天龍神來禮般若之相。是故經典隨所在處。應周匝除穢。掃拭塗治。香水散灑。寶座安措。香華珍寶莊嚴供養。

設利羅品第三十五

帝釋答佛。於設利羅寧取般若。以諸佛身。皆因般若生故。

經文品第三十六

佛為帝釋展轉較顯書經功德。帝釋白佛。應以種種巧妙文義。為他演說。佛又較顯功德。並明說相似法。真正法。不同之義。

隨喜回向品第三十七

慈氏菩薩與善現酬唱隨喜回向之法。諸天讚美。

大師品第三十八

舍利子向佛廣讚般若。佛言。般若即是大師。善現亦歎般若。若是大波羅密多。

地獄品第三十九

舍利子問。能信解者。從何處來。乃至修習。為已久如。佛言。從十方法會來。乃至信解甚久。又為善現分別修學久近之相。並說謗般若者。墮三塗相。

清淨品第四十

佛與舍利子明一切法。畢竟淨故。是法清淨。最為甚深。善現答帝釋問所起執著。佛又為說微細執著。

無標幟品第四十一

善現問。云何應行般若。佛言。不行色等若常若無常等。

善現白佛。菩薩如為虛空擐功德鎧。會中有一苾芻作念。般若微妙難測。雖非有法。而亦非無。佛讚印之。善現答天帝釋。若欲守護修般若者。不異守護虛空幻夢化等。諸天以佛神力。見十方各有千佛同說般若。

佛告善現。慈氏證菩提時。亦於此處宣說般若。乃至諸天慶慰唱言。今見第二轉妙法輪。佛告善現。如是法輪。非第一轉。亦非第二。於一切法。不為轉故。還故。出現世間。但以無性自性空故。標幟名言。皆不可得。是故名大波羅密多。

不可得品第四十二

善現廣歎。佛為釋成。

東北方品第四十三

帝釋念聞經善根。舍利子讚信解功德。佛答帝釋云何住習之問。又印舍利子甚深等讚。舍利子又說王都前相等喻。佛讚印之。又印善現甚深等讚。次為舍利子說此經從東南方。乃至

最後於東北方興盛。

魔事品第四十四

佛為善現說修行時留難魔事。

不和合品第四十五

次說學法與持法者。種種兩不和合。皆為魔事。及說惡魔所化作事。

佛母品第四十六

佛告善現。佛觀般若。如子護母。

示相品第四十七

諸天問。般若以何為相。佛言。以空。無相。無願等為相。依世俗說。不依勝義。當知般若遠離眾相。不應問言以何為相。乃至一切法相。如來如實覺為無相。般若不見色等故。名示色等相。能為如來顯色等世間空。示色等世間遠離寂靜等。由是能示世間實相。名如來母。能生如來。又色等皆不可

思議。不可稱量。無數量。無等等。以不可得故。於是四眾得益。菩薩得記。

成辦品第四十八

佛答善現。般若能辦六度十八空等。信解般若菩薩。從人中來。或從他方佛處來。或從覩史多天來。

船等喻品第四十九

佛為善現說海船破喻。不取所依。則溺死。能取所依。則至岸。菩薩亦爾。不依般若。則退入二乘。能依般若。則定證菩提。及說度曠野等諸喻。

初業品第五十

佛答善現。初業菩薩。應親近真淨善友。

調伏貪等品第五十一

善現白佛。誰於般若。能生淨信勝解。若生信解心。何性何相。何狀何貌。佛言。心心調伏貪瞋癡等。為性相狀貌。

真如品第五十二

諸天散華禮讚。佛印述之。又讚善現隨如來生。善現答之。大千震動。天又散華。善現復說真如相義。眾生獲益。六千菩薩成阿羅漢。佛告舍利子。此由不攝受般若。遠離方便善巧。如大鳥無翅故。

次諸天謂菩提極難信解證得。善現謂極易信解證得。舍利子謂若易信解證得。不應有退屈者。善現問。色等有退屈不。色等真如有退屈不。離色等及色等真如有法有退屈不。舍利子一一答言。不也。然佛何故說三種乘。

滿慈子令問。為許有一菩薩乘不。善現以真如義反徵辯竟。結云。若菩薩聞說諸法真如不可得相。心不驚恐怖等。速證菩提。定無退屈。佛讚印之。善現請問。菩薩欲疾成辦菩提。當於何住。應云何住。佛廣答之。二千菩薩得無生忍。

不退轉品第五十三

佛為善現說不退轉菩薩諸行狀相。乃至常得身語意淨。魔不能惑。

轉不轉品第五十四

佛答善現。不退轉菩薩。既名不退轉。亦得名退轉。於色等想有退轉故。復次。不退轉菩薩。當作上士。不作下士。常不遠離念佛作意。聞法作意。生生之處。常不離佛。恆聞正法。

甚深義品第五十五

善現白佛。惟願復為菩薩說甚深義。令住其中。能修施等。令速圓滿。佛言。種種增語。皆顯涅槃為甚深義。乃至色等亦名甚深。色等真如甚深故。色等真如。非即色等。非離色等。是故甚深。

次較顯如教住。如說學之功德。又較顯隨喜回向功德。又

答無數無量無邊之義。又明依止無增減無所有為方便。修行般若。由此為門。集諸功德。便證菩提。如燄焦炷。非初非後。不離初後。

夢行品第五十六

舍利子問。夢中行此三三摩地。於深般若有增益不。善現答言。晝行有增益者。夢行亦有增益。次與彌勒菩薩問答。

願行品第五十七

佛告善現。菩薩修行施等。為諸有情發大願行。

殊伽天品第五十八

授天女記。

習近品第五十九

佛答善現。觀色等空。不令心亂。則不見法。不作證。未入定位。繫心於所緣。已入定時。不繫心於境。不退施等。不證漏盡。如壯士過曠野。如堅翅翔虛空等。

增上慢品第六十

佛為善現說菩薩不退轉相。及說增上慢相。次明菩薩欲證菩提。應常親近真善知識。次說般若妙相。次較說經功德。

同學品第六十一

帝釋歎持說者。非少善根所能。佛為較顯勝德。帝釋復為一苾芻廣明勝德。兼為慶喜明仗佛力。佛又為慶喜分別有惱亂不惱亂之所由。次明菩薩與菩薩共住。相視應如大師。

同性品第六十二

佛答善現。內空等是菩薩同性。住此中學。名為同學。又問。若一切法本性清淨。菩薩云何復於妙法而得清淨。佛言。於性淨中。精勤修學甚深般若。如實通達。遠離煩惱染著。故說復得清淨。復次。方便善巧威德力故。攝持增長。導引一切波羅密多。如薩迦耶見。如命根。

無分別品第六十三

帝釋散華發願。問隨喜福。佛為較顯。善現問如幻心。云何能證菩提。佛為徵釋。並歎菩薩能為難事。善現復言。不應說彼能為難事。以所證。能證。證法。證者。證處。證時。都不可得。如幻。如影。乃至如化。如機關等。無分別故。

舍利子言。若一切法皆無分別。云何分別五趣三乘。善現答言。有情顛倒惑業因緣。施設五趣差別。無分別故。施設三乘聖者。三世如來。皆由分別斷故。可施設有種種差別。菩薩應行無所分別甚深般若。便能證得無所分別微妙菩提。覺一切法。無分別性。盡未來際。利樂有情。

堅非堅品第六十四

善現答舍利子。菩薩修行般若。行非堅法。不行堅法。又為諸天明希有事。如欲調伏虛空。當知色等離故。即施等離。又答佛不沈不沒之問。次問何等菩薩。為佛讚歎。佛言。住不退轉位者。又隨不動佛為菩薩時所行而學者。又隨寶幢頂髻二

菩薩所行而學者。

實語品第六十五

佛為帝釋歎善現住於勝住。然猶不及菩薩所住甚深行住。六百苾芻發菩提願。佛授其記。次以般若付囑慶喜。並現不動佛國。令大眾見。又出舌相。再囑慶喜。

無盡品第六十六

佛答善現。般若菩提。皆如虛空。不可盡故。應觀色等無盡故。引發般若。乃至魔皆愁苦。

相攝品第六十七

佛答善現。六度互相攝取之相。

巧便品第六十八

佛答善現。菩薩成就巧方便者。發心甚久。乃至善根甚多。又般若雖於五度最為前導。而無分別作用真實自體。菩薩為有情故。勤行六度。前五攝在般若。性無差別。為度有情。

假說差別。又般若於一切法。都無所捨。若不思惟色等。便能增長善根。圓滿六度。證得菩提。乃至著無所有不可取法。則離般若。般若如轉輪王。一切善法。隨行隨至。

又能示現道非道相。又如實觀色等非相應非不相應。是能與六度常共相應。不相捨離。又般若是諸善法所趣向門。如水趣海。又應於諸法如實了知略廣之相。又應觀色等彫落故。破壞故。乃至性虛偽故。行深般若。如引虛空。引深般若。破壞諸法。修深般若。從初發心。至菩提座。應行。應引。應修。無容橫起諸餘作意。

又應學一切法皆不可施設而趣菩提。都無所行。是行般若。從初發心。常學無所得而為方便。應修布施等。應住內空等。諸有二者。名有所得。諸無二者。名無所得。雖於諸法常樂決擇。而不得色等。以無為無作而為方便。行深般若。佛以淨五眼。求色等不可得。雖證一切智智。不住有為界。亦不

住無為界。如變化者。度化有情。如來與變化佛。俱為真淨福田。諸法法性為定量故。

又一切法。但有名相。唯假施設。名相性空。有情執著。沈淪生死。菩薩悲愍。發心行行。證得一切智智。拔濟令出。然諸名相。無生無滅。亦無住異施設可得。又前際後際。俱不可得。達一切法自相空已。應行般若。無所執著。次釋般若不與諸法為義非義。

樹喻品第六十九

善現以空中種樹。喻菩薩能為難事。佛以良田種樹之喻答之。次釋菩薩當知如佛。並較發心不退。乃至如來功德。展轉增勝。又答初發心菩薩。恆正思惟一切智智。信解一切法。皆無性為性。

菩薩行品第七十

佛答善現。當於色等空。行菩薩行。不以二故。攝受修行

六度。乃至證得一切智智。恆時增長一切善法。

親近品第七十一

佛答善現。若不親近諸佛。圓滿善根。承事善友。尚不名菩薩。豈能證一切智智。

徧學品第七十二

佛答善現。菩薩成就最勝覺慧。雖能受行清淨深法。而不攝受殊勝果報。於法自性。能不動故。次明離四句。而有得有現觀。以一切法常無常等為戲論。應離諸戲論。行深般若。徧學諸道。由菩薩道。得入正性離生。於聖法毗柰耶中。應如是學甚深般若。修除遣一切法。若一切有二想者。定無布施等。下至順忍。彼尚非有。況能徧知一切法。況能得一切智智。

漸次品第七十三

佛答善現。住無想者。亦無順忍。菩薩於一切法。皆無有想。亦無無想。以無性為聖道。以無性為現觀。若一切法有少

自性。或復他性為自性者。佛不應通達一切法無性為性已。入四禪。起五通。證菩提。度有情。

菩薩初發心位。聞一切法。及諸有情。皆以無性為性。證得此故。說名為佛。乃至預流深信此故。名賢善士。故我定應發趣菩提。普為有情得涅槃故。作漸次業。修漸次學。行漸次行。所謂六度。六念。乃至一切相智。

無相品第七十四

佛答善現。以一切法。皆以無性為性。諸有情類。具斷常見。住有所得。難可解脫。若無所得。即是得。即是現觀。即是菩提。以不壞法界相故。由此故得有初地。乃至十地。得有異熟神通六度等法。由離諸相無漏心力。能於無相無作法中。圓滿一切功德。

無雜品第七十五

佛答善現。安住如夢等五取蘊中。為諸有情布施。持戒。

安忍。精進。修定。學慧。如實了知如夢等五蘊。皆同一相。所謂無相。若如是知而行施等。則能圓滿一切善法。

眾德相品第七十六

佛答善現。愚夫異生。於夢得夢。得見夢者。乃至於化得化。得見化者。顛倒執著。造三業行。往來生死。菩薩以二種空。觀察諸法。一畢竟空。二無際空。安住二空。為說正法。色等是空。離我我所。如夢。如化。都無自性。又以方便神力。拔濟令出。得三乘果。

次明菩薩甚奇希有之法。安住異熟六度五通等。隨應攝受有情。布施。愛語。利行。同事。財施。法施。說三十七品。乃至相好等法。四十二字母等。不壞諸法。無二分別。為諸有情。如實宣說。令離妄想顛倒執著。趣三乘果。譬如化佛。教所化眾。又一切法。不異真法界等。而依世俗施設因果差別。菩薩於諸法中。自無執著。教他無執。善達諸法如實相故。

善達品第七十七

佛答善現。如所變化。於一切法都無所行。是為善達諸法實相。以諸法但有假立名相。是故菩薩於諸善法。能自增進。亦能令他增進。又如實知色等相。色等生滅。色等真如。是為能學三解脫門。則能學一切法。又欲學法界。當於一切法學。知一切法。即真法界。初中後際。常無差別。

實際品第七十八

佛答善現。菩薩但以實際為量。行深般若。由方便善巧力故。安立有情。令住施等。而不執著。觀本性空。都無所得。為度執有情想及法想故。行道相智。得三乘道。趣證無上菩提。佛眼常無斷壞。

無闕品第七十九

佛答善現。菩薩具足殊勝方便善巧。修行施等。不得施等。亦不遠離施等。修菩提道。次答舍利子。不和合一切法。

不離散一切法。諸法皆無自性可合離故。如實了知一切法性。皆不可取。於一切法。得無障礙。安住二諦。宣說正法。如化食施化眾等。又答善現。修行施等。及餘大菩提道。皆能成熟有情。

道士品第八十

佛告善現。總一切法。皆菩薩道。不學一切法。定不能得一切智智。審察諸法。皆畢竟空。不應執著。而於諸法。學無厭倦。觀諸有情心行差別。如實了知。但行虛妄所執。方便善巧教令遠離所執。修諸善行。然勿恃此而生憍逸。次明清淨自他三種麤重。能淨佛土。

正定品第八十一

佛答善現。是菩薩從初發心。至最後有。皆住菩薩正性定聚。次釋如來本生之疑。次明一切善法。皆是菩提資糧。

佛法品第八十二

佛答善現。即菩薩法。亦是佛法。由位有異。法性非異。

無事品第八十三

佛答善現。無性法中。無業無果。亦無作用。愚夫不了。顛倒發業。受三界身。為拔濟故。施設聖法及毗柰耶分位差別。廣說夢。像。響。燄。影。幻。變化。尋香城喻。

實說品第八十四

佛答善現。我說一切法平等性為清淨法。菩薩知一切法不可取已。為饒益彼諸有情故。求趣菩提。不為己身。非為餘事。乃至依世俗故。說得菩提。若執有二。不能得果。亦無現觀。執無二者。亦復如是。法平等性。非佛所行。以與佛無別故。又復法平等性。非即一切。非離一切。說名勝義。菩薩行深般若。不動勝義而行菩薩行。成熟有情。嚴淨佛土。證得菩提。說法度眾。

空性品第八十五

佛答善現。若有情自知諸法皆本性空。則佛菩薩不現神通作希有事。又一切世出世法。無非是化。然有聲聞化。有獨覺化。有菩薩化。有如來化。有煩惱化。有諸業化。乃至非實有法。名為涅槃。是故可說涅槃非化。又一切法。先既非有。後亦非無。自性常空。不應驚怖。

（已上共七十八卷。與初分品有開合。文略義同。但無常啼法涌二品。）

第三分

緣起品第一

佛住鷲峰。與五億苾芻等俱。餘並同初二分。而九方文略。

舍利子品第二

與初分學現品至現舌相品同。而文較第二分又稍略。

善現品第三

與初分教誡教授品至淨道品同。

天帝品第四

與初分天帝品至歎眾德品同。

現宰堵波品第五

與初分攝受品同。

稱揚功德品第六

佛設利羅品第七

福聚品第八

隨喜回向品第九

地獄品第十

歎淨品第十一

讚德品第十二

陀羅尼品第十三

魔事品第十四

現世間品第十五

與初分佛母品同。

不思議等品第十六

譬喻品第十七

與初分辦事品等同。

善友品第十八

真如品第十九

不退相品第二十

空相品第二十一

殊伽天品第二十二

巧便品第二十三

學時品第二十四

見不動品第二十五

即初分願喻品等。

方便善巧品第二十六

即初分無盡品等。

慧到彼岸品第二十七

妙相品第二十八

施等品第二十九

佛國品第三十

宣化品第三十一

（共五十九卷。與第二分開合不同。亦無常啼法涌二品。）

第四分

妙行品第一

即善現教誡品等。

帝釋品第二

供養宰堵波品第三
稱揚功德品第四
福門品第五
隨喜回向品第六
地獄品第七
清淨品第八
讚歎品第九
總持品第十
魔事品第十一
現世間品第十二
不思議等品第十三
譬喻品第十四
天讚品第十五
真如品第十六

不退相品第十七

空相品第十八

深功德品第十九

談夢覺義。較前三分更明暢。

殊伽天品第二十

覺魔事品第二十一

善友品第二十二

天主品第二十三

無雜無異品第二十四

迅速品第二十五

幻喻品第二十六

堅固品第二十七

散華品第二十八

隨順品第二十九

(共一十八卷。隨順品中。文與初二三分不同。)

第五分

善現品第一

天帝品第二

宰堵波品第三

神咒品第四

設利羅品第五

經典品第六

回向品第七

地獄品第八

清淨品第九

不思議品第十

魔事品第十一

真如品第十二

甚深相品第十三

船等喻品第十四

如來品第十五

不退品第十六

貪行品第十七

姊妹品第十八

夢行品第十九

勝意樂品第二十

修學品第二十一

根栽品第二十二

付囑品第二十三

見不動佛品第二十四

(共十卷。較第四分更略。)

第六分

緣起品第一

佛住鷲峰。與四萬二千苾芻。七萬二千菩薩。及天龍鬼神眾俱。面門出光。照無邊界。還歸面門。東方普光佛所。離障菩薩。南方日光佛所。日藏菩薩。西方功德光明佛所。功德藏菩薩。北方自在王佛所。廣聞菩薩。東南方甘露王佛所。不退轉菩薩。西南方智炬佛所。大慧菩薩。西北方妙音王佛所。功德聚菩薩。東北方智上佛所。常喜菩薩。上方金剛相佛所。寶幢菩薩。下方金剛寶莊嚴王佛所。寶信菩薩。皆來集會。

通達品第二

最勝天王請問。云何菩薩修學一法。能通達一切法。佛答以修學般若。能通達十波羅密。

顯相品第三

佛答最勝。如地水火風空等相。甚深般若亦復如是。

法界品第四

佛答最勝。菩薩學深般若。有妙慧故。通達法界。即是不虛妄性。不變異性。諸法真如。但可智知。非言能說。於是大千變動。菩薩脫衣敷座。諸天散華奏樂。龍澍香雨。十方佛放眉光。徧照此土。還歸佛頂。眾會獲益。

最勝復問。甚深般若。既絕語言。離諸文字。云何菩薩為諸有情說法。隨順甚深法相。不違世俗。佛言。具大方便善巧力故。謂大慈悲喜捨。又問。云何為度有情。示現諸相。佛言。相不可得。但由方便善巧威力。示現入胎。乃至涅槃種種化相。

念住品第五

佛答最勝。菩薩行深般若。心正無亂。善修身受心法念

住。及說如來功德大威神相。

法性品第六

佛答最勝。如來法性不可思議。如無價珠。墮在淤泥。不為所染。依此法性修習善根。具足方便大悲願力。不捨有情。遠離一切虛妄分別。心得清淨。深如大海。一一行中。具眾行故。生淨佛土。不為胎汙。於是舊住天神。空中讚歎。並為光德天子現淨土相。

平等品第七

佛答最勝法性平等之義。並為授記。

現相品第八

舍利子問先現苦行等事。最勝答之。

無所得品第九

善思菩薩問最勝得受記耶。答言。我雖受記。而猶夢等。乃至重重問答。令眾獲益。最勝問佛。云何未發心者。即能

發心。皆悉成就。得不退轉。佛言。以純淨意。發菩提心。親近賢聖。樂聞正法。遠離慳嫉。正信業果。設為身命。終不作惡。乃至佛為破四見故。說無常。苦。無我。涅槃。寂靜四法。次說神咒。

證勸品第十

佛為最勝說過去功德寶王佛時。治世輪王問深正法。成然燈佛。彼時千子。即是賢劫千佛。最勝又問。云何修行。速成大道。佛言。一切善法。無不修滿。又問。現何色像。佛言：如鏡隨現。又般若猶如虛空。無有一法可為譬喻。

顯德品第十一

佛答曼殊室利。過去多聞佛時。精進力菩薩。即今最勝天王。又答云何護持正法。云何能調伏心等問。

現化品第十二

最勝答善思問。佛所化身。更能化作無量化佛。往昔願力

清淨故。及答護正法問。又有賢德天子。相與問答。

陀羅尼品第十三

曼殊室利及寂靜慧菩薩。共說眾法不入陀羅尼功德。大千振動。天雨妙華。佛說過去寶月佛時。寶功德菩薩。有大辯才。即今寂靜慧是。

勸誡品第十四

佛答曼殊室利。具明信受福聚。毀謗罪過。

二行品第十五

佛為曼殊室利說化他自行二種般若。及說五事不可思議。三十二相。八十隨好。

讚歎品第十六

曼殊室利。妙色天子。善名天子。大梵天王。各以頌讚。佛印成之。

付囑品第十七

佛以十法付囑阿難。一書寫。二供養。三施他。四諦聽。五披讀。六受持。七廣說。八諷誦。九思惟。十修習。及為持髻梵天。說佛讚三事最為無上。一發菩提心。二護持正法。三如教修行。(八卷)

第七曼殊室利分

佛在給孤獨園。與百千苾芻。十千菩薩眾俱。曼殊室利明相現時。詣如來所。在外而立。舍利子等亦然。佛出敷坐跏趺。曼殊答佛。為欲利樂有情。以真如相觀於如來。次與舍利子互相酬唱。復答佛發明甚深般若。觀一切法。皆是佛法。於是舍利子。慈氏菩薩。曼殊室利。無緣慮女。皆歎聞說不沈沒驚怖者。已住不退轉地。佛印成之。

又與舍利子互相問答。顯真法界性平等義。又與佛互相問

答。明福田相不可思議。大地變動。眾會得益。次明初學不思議定。如初學射。久習成就。不復作意。大迦葉問當來誰能信解修學。佛具答之。次為曼殊說一相莊嚴三摩地。謂不動法界。念一如來。即為普觀三世諸佛。乃至佛現神力。護持般若久住世間。饒益有情。（二卷。與大寶積經第四十六會同。）

第八那伽室利分

佛在給孤獨園。妙吉祥菩薩於日初分。著衣持鉢。漸將入城。龍吉祥菩薩見已問答。無能勝菩薩來讚。妙吉祥菩薩。答以一切非實。皆如谷響。龍吉祥復相問答。既承教誡。入海喻定。善思菩薩。變動大千。不能令出。後從定起。雨諸香花。向佛歸命。妙吉祥又為說無上法食。善現來問。何所談論。妙吉祥詰以何法名為大士。如響。豈能有所談論。善現入無所得三摩地門。出定。向佛皈命。

妙吉祥又說諸法如幻夢等。善現又入滅定。舍利子來問答。善現出定。妙吉祥為說希有妙食。善現及舍利子俱入滅定。次從定起。各各入城。善現化一女人。妙吉祥與諸菩薩聲聞等眾。各飯食已。俱詣佛所。以如上事。具白世尊。佛讚印之。妙吉祥曰。彼女所斷我見。即非我見。是故如來說名我見。乃至夫法想者。即非法想。是故如來說名法想。

次歎持四句頌。福聚甚多。世尊說頌。如星。翳。燈。幻。露。泡。夢。電。雲。於一切有為。應作如是觀。(一卷)

第九能斷金剛分

與流通金剛般若同本。頌曰。諸和合所為。如星翳燈幻。露泡夢電雲。應作如是觀。(一卷)

第十般若理趣分

佛住他化自在天王宮。與八百萬大菩薩俱。為諸菩薩。說一切德甚深微妙般若理趣清淨法門。此門即是菩薩句義。理極妙樂清淨句義。諸見永寂清淨句義。乃至一切有記無記法。有漏無漏法。有為無為法。世間出世間法。空寂清淨句義。是菩薩句義。

復依徧照如來之相。說寂靜法性般若理趣現等覺門。復依調伏一切惡法釋迦牟尼如來之相。說調伏眾惡般若理趣普勝法。復依性靜如來之相。說平等智印般若理趣清淨法。復依一切三界勝主如來之相。說灌頂法門般若理趣智藏法。復依一切如來智印持一切佛祕密法門如來之相。說如來智印般若理趣金剛法。復依一切無戲論法如來之相。說離戲論般若理趣輪字法。

復依一切如來輪攝如來之相。說入廣大輪般若理趣平等性。復依一切廣受供養真淨器田如來之相。說真淨供養甚深理趣無上法。復依一切能善調伏如來之相。說能善調伏甚深理趣智藏法。復依一切能善建立性平等法如來之相。說性平等性甚深理趣最勝法。復依一切住持藏法如來之相。說有情住持甚深理趣勝藏法。復依究竟無邊際如來之相。說無邊無際究竟理趣金剛法。復依徧照如來之相。說三神咒。一一告金剛手受持功德。(一卷。與密部實相般若同。而咒不同。)

第十一 布施波羅密多分

佛在給孤獨園。與千二百苾芻俱。再三命勸舍利子。為諸菩薩宣說布施波羅密多。舍利子言。應緣一切智智。以大悲為上首。修行布施。則能攝受一切智智。疾證無上菩提。寧以無記心行施。或不行施。終不以回向二乘地心行施。

次答滿慈子問。喻說菩薩聲聞行施勝劣意願。滿慈子亦說二施譬喻。舍利子廣說有巧方便所行布施。及隨喜回向所引善根。如月。如日。如吠琉璃寶。如馬寶。又常於有情。作大饒益。如真金。如日月。如商主。如善士。如王種。次更廣說應起決定施心。應學無染布施。

又觀諸法。若順若違。皆能助引一切智智。又明二乘於一切智。亦有助。然諸二乘作意。於一切智及此資糧。俱無助力。故制菩薩定不應起二乘相應作意。次明能捨眾相回向菩提。欲為有情作大饒益。乃名能得無上善利。方便善巧。不取法相。得入居頂諸菩薩數。

次明說如是法。皆如來力。佛囑阿難受持。滿慈子問。若一切法。皆非實有。行布施。何所捨。成正覺。何所得。佛言。無所捨。無所得。無所損。無所益。如二幻師。戲為變易。以幻價直。易化美團等。

又舍利子答滿慈子。菩薩先應思惟一切法性。畢竟空寂。次應思惟一切智智。具勝功德。後應愍念一切有情貧乏珍財。受諸苦惱。作是念已。便捨一切珍財。施諸有情。心無所著。亦以正法施諸有情。亦以無邊上妙供具。恭敬供養佛法僧寶。如是布施。隨順菩提。疾能證得一切智智。與諸有情。作大饒益。

於是佛以神力。令諸大眾。見十方各各無數殍伽沙數世界。各有無量菩薩。行施精勤。乃結勸云。菩薩欲疾證得一切智智。窮未來際。利樂有情。應觀法空。緣一切智。具勝功德。愍念有情。受貧匱苦。應行布施波羅密多。持此善根。普施一切。令脫惡趣生死眾苦。作是願言。十方世界諸有情類。由我善根功德威力。未發無上心者。令速發心。已發心者。令永不退。已不退者。令速圓滿一切智智。

舍利子問。最初發心。第二發心。住不退地。坐菩提座差

別。佛答示之。並以神力。令見十方各無數界。無數菩薩。行菩薩行種種差別。無數如來。種種方便。饒益有情。乃結勸云。若定發心求一切智。彼必當作世間第一真淨福田。及作大千最大法師。亦作如來。利樂一切有情。

次答舍利子問。廣明菩薩初心。勝於二乘後心。及明菩薩不退心力。於餘神力。最為無上。次滿慈子與舍利子互相問答。明退心者。非真菩薩。是增上慢。欲證菩提。應正發起一切智智相應作意。乃至佛囑阿難受持。（五卷）

第十二淨戒波羅密多分

佛在給孤獨園。與千二百五十苾芻俱。命舍利子宣說戒度。滿慈子問。云何應知菩薩持戒犯戒。舍利子答。若住二乘作意。是名非所行處。是名菩薩犯戒。

又問。若求一切智智而修布施。豈不執著一切智智。成戒

禁取。云何名為持菩薩戒。答言。一切智智。遠離眾相。非方處攝。既非有法。亦非無法。由此因緣。不可執取。是故菩薩行施。持戒。回向菩提。雖求證得一切智智。而不名為戒禁取攝。若回向二乘地。執取淨戒。是失菩薩戒。名犯戒菩薩。若未見聖諦。未證實際。或有因緣。易可還淨。若見聖諦。證實際已。異見深重。難可還淨。

又雖經沙數大劫修行淨戒令滿。而不回向菩提。饒益有情。不能攝受菩薩戒度。雖經沙數大劫居家受妙五欲。而不發趣二乘地心。求一切智。增上意樂無退壞故。不名犯菩薩戒。又若見有少法名為作者。名為犯戒菩薩。若隨所修六度。皆用大悲為首。發起隨順回向一切智智相應之心。是名具戒菩薩。次廣歎初心一菩薩戒。遠勝世出世間一切淨戒。以其心無分限。普度有情。求大菩提。引發淨戒。是故除佛所有淨戒。於餘淨戒。最為第一。又寧遲證菩提。不為速求墮二乘地。又

菩薩不應欲勝菩薩。不應輕慢菩薩。不應降伏菩薩。於餘菩薩。供養恭敬。應如如來。乃至應普恭敬一切有情。

又一切法。無少有實。皆如幻事。故諸菩薩回向趣求一切智智。皆由了達諸法非實。如幻如化。有所堪能。又菩薩於六度二十空等。乃至一切相智。雖應精勇修習。如救頭然。不應味著。又明菩薩於二乘地。但應遠離。不應讚毀。佛讚印之。並為廣說方便善巧。又明如來皆深愍念一切有情。心無差別。不隨欲行。然於菩薩。最不棄捨。(五卷)

第十三安忍波羅密多分

佛在給孤獨園。與千二百五十苾芻眾俱。命滿慈子宣說忍度。舍利子問。菩薩忍。聲聞忍。有何差別。滿慈子答。聲聞唯為捨棄自身煩惱。名為少分安忍。菩薩欲度無量有情。名為具分安忍。於檀塗火燒。起平等心。俱欲畢竟利樂。

又聲聞唯觀蘊等無我有情之所引發。菩薩亦觀蘊等無性無生之所引發。菩薩欲證菩提。應修其心。令與地水火風空等。寧受無邊大苦。而不愛著二乘自利眾善。又若住二乘地。起二乘作意。乃至樂觀蘊等常無常等。是為行他行處。若修六度一切智智相應作意。是為行自行處。一切惡魔。不能得便。(一

卷)

第十四精進波羅密多分

佛在給孤獨園。與千二百五十苾芻眾俱。滿慈子問菩薩精進。佛言。初發心時。若身。若心。先應為他作饒益事。如僕任主。不應自在。諸有所為。皆隨主欲。亦如馬寶。盤迴去住。遲速任人。又常勤修六度二十空等。能為難事。(一卷)

第十五靜慮波羅密多分

佛住鷲峰。與千二百五十苾芻眾俱。舍利子問。菩薩云何方便。安住靜慮。佛言。漸次入四靜慮。引發五通。降魔成覺。又雖現入四禪四定。而不味著。亦不離染。雖觀一切法都不可得。而不棄捨一切智智。滿慈子問。何緣如來許諸菩薩入四禪四定。不許久住其中。心生染著。舍利子答。若生欲界。速能圓滿一切智智。生色無色。無斯用故。滿慈子問。云何安住靜慮。攝受般若精進忍戒施等。佛一一答。

又明若住二乘相應作意。名為散亂。若隨所集一切善根。回向趣求一切智智。名為心定。舍利子問。菩薩安住靜慮。云何方便。還從定起。佛言。於色無色靜慮等至。順逆次第。超越串習。極善純熟。遊戲自在。復入欲界非等引心。由起此心。還生欲界。親近供養諸佛。引發菩提分法。生色無色。無

如是能。上二界生。身心鈍故。(二卷)

第十六般若波羅密多分

佛住竹林白鷺池側。與千二百五十苾芻。無量無數一生所繫菩薩眾俱。有善勇猛菩薩。請問何謂般若。云何修行。云何令速圓滿。云何惡魔不能得便。能覺魔事。云何安住。速能圓滿一切智法。

佛言。實無少法可名般若。謂如實知一切法性。無實無生。亦無虛妄。雖不見有菩提心性。而能發起大菩提心。彼雖如是發菩提心。而於菩提無所引發。若能遠達諸法實性。是謂般若微妙甚深。實不可說。今隨世俗文句。方便演說。即蘊等。非般若。離蘊等。非般若。般若於一切法。都無所依。不在蘊等內。不在蘊等外。不在兩間。遠離而住。與蘊等非相應。非不相應。蘊等真如。不虛妄性。不變異性。如所有性。

是謂般若。

復次一切法無自性。是謂般若。一切法非一切法所行故。無知無見。是謂般若。一切法不捨自性。如是徧知。是謂般若。一切法與一切法非合非離。是謂般若。一切法非增非減。是謂般若。一切法非染非淨。是謂般若。一切法非有淨法。非有不淨法。是謂般若。一切法非移轉。非趣入。是謂般若。

一切法非繫非離繫。非死非生。非生非死。非流轉非有流轉法。非盡非有盡法。非有集法。非有滅法。非有起法。非有盡法。非有變壞法。非無變壞法。非常非無常等。非有貪瞋癡法。非離貪瞋癡法。非作者非使作者等。非斷非常。非有邊非無邊。非見趣非見趣斷。非愛非愛斷。非善非非善。是謂般若。

如是般若。非一切法攝。亦非遠離如是等法。別有般若。如夢。如幻。如燄。如影。如響。如沫。如泡。如芭蕉。如虛。

空。如影光。如寶光。如燈光。非圓成實。於是舍利子廣歎難見難覺。乃至無邊際等。佛一一印述之。

舍利子問。云何菩薩依如是法。行諸境相。佛言。尚不得法。何況非法。尚不得道。何況非道。知一切境。皆無境性。於一切境。皆無住著。以無邊法為所行境。如空。如風。無有少相而可得者。又此甚深法要。非但耳聞。即名為果。要不放逸。精進修行。如實了知。遠離眾惡。自他俱利。乃名為果。若於正法起異解行。不名聞法。若於法義起顛倒解。不正修行。定無順忍。不應深信微少善根。謂彼即能脫諸惡趣。若得順忍。能不復造感惡趣業。

不復懈怠起順退分。時舍利子告善現言。云何具壽默然不說般若。善現答言。我於諸法都無所見。故無所說。乃至甚深般若不可說示。佛告善勇猛言。菩薩修行般若。於一切法。都無所行。以一切法。皆是顛倒之所等起。非實。非有。邪偽虛

妄。若能行無所行。為行般若。徧知一切所緣而行。除遣一切所緣而行。善勇猛言。菩薩修行甚深般若。不可思議。佛言。如是。一切法皆不可思議故。菩薩修行般若亦不可思議。善勇猛言。如是行深般若。是無上行。清淨行。明白行。無生行。無滅行。超出行。難伏行。佛印成之。

又明一切法皆以無性為性。不可修。亦不可遣。菩薩於一切法。無取無執。無住無著。成就功德智慧大威神力。能降伏魔。乃至付囑賢守導師等五百上首菩薩。及善勇猛菩薩。又復微笑放光。令大千界處處有情。互得相見。天龍鬼神。花香供養。讚詠神力。無數菩薩得無生忍。無邊有情發無上心。(八

卷)

大般若經異譯本一覽表

經名	卷數	品數	譯人名	知津
放光般若波羅密多經	三十	九十	西晉無羅叉共竺叔蘭	與大般若第二分同本而有常啼法上二品
摩訶般若波羅密經	三十	九十	姚秦鳩摩羅什共僧叡	同放光般若而文較順暢
光讚般若波羅密經	十	二十一	西晉竺法護	同上論而文來未盡
道行般若波羅密經	十	三十	後漢支婁迦讖	與大般若第四分同而有常啼曇無竭二菩薩事
小品般若波羅密經	十	二十九	姚秦鳩摩羅什	與道行同
佛母出生三法藏般若波羅密多經	南廿五 北十四	三十二	宋施護	亦同道行而文暢順
佛母寶德藏般若波羅密經	三 今二		宋法賢	即佛母般若三十二品之攝頌也
大明度無極經	六	三十	吳支謙	亦同道行

經 金剛能斷般若波羅密	金剛般若波羅密經	金剛般若波羅密經	金剛般若波羅密經	佛說濡首菩薩無上清淨分衛經（一名決了諸法如幻三昧）	文殊師利所說般若波羅密經	文殊師利所說摩訶般若波羅密經	勝天王般若波羅密經	摩訶般若波羅密鈔經
一	一	一	一	二	一	一	七	五
								十三
隋達摩笈多	真諦	元魏菩提留支	姚秦鳩摩羅什	劉宋翔公	蕭梁僧伽婆羅	蕭梁曼陀羅仙	月婆首那	苻秦曇摩婢共竺佛念
文掘甚		亦同第九會而分作十二分	與大般若第九會同而舉世流通	與大般若第八會同	亦與大般若第七會同	與大般若第七會同又收入寶積第四十六會	與大般若第六分同	亦同道行而文來未盡

般若部別行經一覽表

經 能斷金剛般若波羅密 多經	能斷金剛般若波羅密 多經	經 名	卷 數	品 數	譯 人 名	知 津
仁王護國般若波羅密 多經	二	八	唐不空	佛在鷲峰。初年月八日。入大寂靜妙三摩地。放毛孔光。普照十方。菩薩來集。為證觀如來品。菩薩行品。二諦品。護國品。不思議品。奉持品。囑累品等八品。文更順暢。最宜流通。		
經 仁王護國般若波羅密	二		姚秦鳩摩羅什	與上經同有智者大師疏		
一	唐義淨	已上並是同本異譯				
一	唐玄奘	即第九會抄出別行				

佛說聖佛母般若波羅密多經	摩訶般若波羅密大明咒經	般若波羅密多心經	佛說帝釋般若波羅密多心經	佛說五十頌聖般若波羅密經	佛說了義般若波羅密多經
一紙半	一紙頁	十六行半	三紙餘	二紙頁	二紙餘
宋施護	姚秦鳩摩羅什	唐玄奘	宋施護	宋施護	宋施護
二經俱與上同本。而後譯有序後流通。佛在鷲峰入定。舍利子問觀世音。觀世音說竟。佛出定讚之。		舉世流通。文約義富。	佛在鷲峰。為帝釋說般若義無邊。及說頌。說咒。	佛在鷲峰。告須菩提般若波羅密經於三乘法。聚集攝受。平等如一。	佛告舍利子。般若波羅密相應行者。當於諸法如實了知。諸有所作。離一切相。即能圓滿六度。又當斷除十種疑惑。

大般若經易檢表

永寧沙門亡言編錄

第四次	第三次	第二次	初分 <small>(亦名初會 已下同)</small>	分次	卷數	品數	品名(或分名)	別譯
共十八卷 由卷第五百三十八 至卷第五百五十五	共五十九卷 由卷第四百七十九 至卷第五百三十七	共七十八卷 由卷第四百一 至卷第四百七十八	共四百卷 由卷第一 至卷第四百					
二十九品	三十一品	八十五品	七十九品					
妙行品 乃至隨順品	緣起品 乃至宣化品	緣起品 乃至空性品	緣起品 乃至結勸品					
有六種 <small>(註二)</small>		有三種 <small>(註一)</small>						

第十分	第九分	第八分	第七分	第六分	第五分
共一卷 卷第五百七十八	共一卷 卷第五百七十七	共一卷 卷第五百七十六	共二卷 卷第五百七十四 至卷第五百七十五	共八卷 由卷第五百六十六 至卷第五百七十三	共十卷 由卷第五百五十六 至卷第五百六十五
				十七品	二十四品
般若理趣分	能斷金剛分	那伽室利分	曼殊室利分	緣起品 乃至付囑品	善現品 乃至見不動佛品
有四種 (註七)	有五種 (註六)	有一種 (註五)	有二種 (註四)	有一種 (註三)	

第十六分	第十五分	第十四分	第十三分	第十二分	第十一分
共八卷 由卷第五百九十三 至卷第六百	共二卷 卷第五百九十一 及卷第五百九十二	共一卷 卷第五百九十	共一卷 卷第五百八十九	共五卷 由卷第五百八十四 至卷第五百八十八	共五卷 由卷第五百七十九 至卷第五百八十三
般若波羅密多分	靜慮波羅密多分	精進波羅密多分	安忍波羅密多分	淨戒波羅密多分	布施波羅密多分

(註一) 放光般若波羅密多經三十卷 共九十品 同第二分而有常啼法上二品

摩訶般若波羅密經三十卷 共九十品 同

光讚般若波羅密經十卷 共二十一品 同上文來未盡

(註二) 道行般若波羅密經十卷 共三十品 同第四分而有常啼曇無竭事

小品般若波羅密經十卷 共二十九品 同

佛母出生三法藏般若波羅密多經二十五卷 北藏作十四卷 共三十二品 同

佛母寶德藏般若波羅密經三卷 今作二卷 即前經之攝頌也

大明度無極經六卷 共三十品 亦同道行般若

摩訶般若波羅密鈔經五卷 共十三品 同上而文來未盡

(註三) 勝天王般若波羅密經七卷 同第六分 陳優禪尼國王子月婆首那譯

(註四) 文殊師利所說摩訶般若波羅密經一卷 同第七分 蕭梁扶南國沙門曼陀羅仙譯

文殊師利所說般若波羅密經一卷 同上 蕭梁扶南國沙門僧伽婆羅譯

(註五) 佛說濡首菩薩無上清淨分衛經二卷 同第八分 劉宋沙門釋翔公譯

(註六) 金剛般若波羅密經一卷 同第九分 姚秦天竺沙門鳩摩羅什譯

金剛般若波羅密經 一卷 同上 元魏北天竺沙門菩提留支譯

金剛般若波羅密經 一卷 同上 陳優禪尼國沙門真諦譯

金剛能斷般若波羅密經 一卷 同上 隋南天竺沙門達摩笈多譯

能斷金剛般若波羅密經 一卷 同上 唐大薦福寺沙門釋義淨譯

(註七)

般若理趣分與密部實相般若經同而咒不同 此經又有三種別譯本皆收入密部今不具錄

大般若經共六百卷都十六分

初分至第五分 如汪洋瀛渤大義都陳

第六分至第十分 如江漢之支流

第十一分至第十六分 為一度之各別

若欲周觀當觀前五分

初分為一類 極詳

然前五但詳略異而義

第二分第三分為一類 稍略

事同今分詳略如下表

第四分第五分為一類 極略